

**NATIONAL ASSEMBLY OF  
SEYCHELLES**

*Wednesday 17<sup>th</sup> November,  
2021*

*The Assembly met at 9am*

*National Anthem*

*Moment of Reflection*

*Mr Speaker in the Chair*

**MR SPEAKER**

Bonzour tou dimoun. Manm Onorab. Nou piblik ki pe swiv nou. Byenveni pou zwenn nou pou sa lazournen travay e nou pe kontinyen deba lo *Appropriation Bill*. Madanm raporter nou ava apel Minis silvouple.

Bonzour e byenveni Minis Naadir Hassan pou nou kontinyen deba lo *Appropriation Bill, 2022*. E nou pou komans avek Onorab Egbert Aglae. Onorab.

**HON EGBERT AGLAE**

Mersi Mr Speaker. Bonzour Minis. Bonzour tou Manm Onorab, tou zabitan Port Glaud e pep Seselwa.

Mr Speaker dabor *United Seychelles* pe ganny akize pou dir pa ouver *Airport*. Mon oule fer kler poudir ki a sa moman ki

*COVID* ti'n fini sa Minister Lasante e Gouvernman *LDS* e antre dan *full community transmission*.

Pli bon desizyon parey lezot pei ti fer se *lockdown* nou *Airport* pou en peryod letan ki ti a dire ant 2 a 3 semenn. E evalye sityasyon, maksimiz kanpanny vaksinyasyon e konn stati gravite to lenfeksyon e apre reouver pei dan en fason pli *safe* posib.

Sa ti pou fer ki nou ti ava kapab sov lavi de santenn lavi Seselwa ki nou'n perdi ziska prezan. Fodre pa bliye ki ler *COVID* ti komans tap nou, kan ti annan zis 7 a 9 ka, *LDS* sa letan ki ti dan Lopozisyon ti pe kriye '*lockdown!*'

*US* pa'n zanmen le detri lekonomi Sesel ki in konstri pandan sa 43an. Se pa *US* ki ti dir tap Sesel kot i pli for avek Linyon Eropeen. Nou lo sa kote latab, nou fermeman krwar dan Lazistis sosyal e progresis, me pa dan en sistenm liberal kapitalis.

Mr Speaker mon lentervansyon lo sa Bidze ozordi; Sesel i en pei ki'n fer bokou progre pandan sa 43an. Seselwa i en pep ki fyer son lakonplisman. Seselwa i en pep ki krwar dan lape. Seselwa i en Nasyon ki atas gran valer ek

son standar lavi e Seselwa i fyer pou sa ki i ete ozordi.

Fodre zanmen nou perdi nou bann aki stati sosyal, mank respe e dignite. Fodre zanmen nou fer sa pep retourn an aryer. Seselwa i rekonnèt ki dan lavi pa tou ki fasil. Seselwa i konsyan i bezwen kontribye pou kontinyen batir sa pei. Sa Nasyon Seselwa ki sa lemond i regarde koman en legzanp lakonplisman, i bezwen ganny dirize avek en lespri nob e sazes. Annou fer Sesel fyer.

Mr Speaker pandan sa 2an dan en kriz sanniter mondyal, kot nou war bokou nou frer e ser perdi son lavi fas a kriz, bokou nou fanmir zanmi e konesans pa'n arive dir sa dernyen adye son pros e menm tann son dernyen parol adye. I vreman fermal pandan sa dernyen 2an bokou rev Seselwa in brize ouswa retarde. Nou'n bezwen reprioritize, aziste e solider ansanm.

Wi pandan sa letan Ladministrasyon Prezidan Faure in sey tou pou ede soulaz sa pep, avek diferan mezir e menm siport biznes prive avek bi redwir sok e lenpak direk ki ti pou afekte tou kous nou sosyete. Byensir sa ti pou vin avek serten konsekans.

Mr Speaker pa tou ki'n parfe. Me ladministrasyon

Prezidan Faure pa ti oule son pep mor lafen. I pa'n oule ki pep Seselwa vin en mandyan obor semen. I pa'n oule war plis voler ouswa bandi. I ti apiy e soutenir sa ki pli vilnerab e in touzour rod fason sey soulaze.

Mr Speaker ki i fouti en pe ki ris me ki ou pep pa an bonn sante e ou pep pe viv dan lamizer? Mr Speaker sa Bidze 2022 ti en Bidze dan lentere *le riche*, me non pa dan lentere malere. Ler Minis Finans i vin anons nou rediksyon dan biznes taks pou benefisye bann gro biznes, pou kontinyen anrisir zot lakonpanyen ki an retour bann *shareholder* ki pou viv dan lazwa finansyel.

E ki de lot kote sa pep pou bezwen al esper 65an pou tous en pti pansyon e osi esper 2023 pre ek lavey en eleksyon pou ganny en pti logmantasyon saler. Larealite mon demande oli lazistis e *fairness*?

Mr Speaker Minis in prezant nou en Bidze ki get zis son lanmen drwat me bliye ki i osi annan en lanmen gos. Sa Gouvernman i paret in bliye ki zot ti prese pou ariv o pouvwar. Sa pep in fer zot konfyans, zot ti dir pou met larzan dan pos Seselwa, logmantasyon dan sekirite sosyal pou ariv R10mil, rediksyon dan kou lavi.

Zot in promet laliberte, latransparans e rankont, me ki noun war se pirman le kontrer. Nou'n war zot prop Minis refize rann kont dan sa Lasanble. Nou'n war nou frer e ser ganny menase avek zarm e zouti.

E ozordi nou pe war nou frer e ser pe mandyan en latet zonnyon, en boutey gas e en bouyon, larzan pou pey bis ouswa larzan pou zot zanfan al lekòl.

Mr Speaker Minis in dir nou ki i annan plis ki 700 *post* dan servis piblik. Sa i relye avek bann *delay in recruitment*, ki an menm tan Gouvernman pe koz lo restriktirasyon ki ofe Gouvernman bezwen onor langazman anba programm *IMF*.

Zot koz lo *leaner* Gouvernman, Selman nou war bann *heavy* Departman e lenstitisyon ganny kree. Eski nou pe ganny dir tou laverite kwa ki dan sa program *IMF*? Eski pep Seselwa i konpran byen ki pe pase?

Mr Speaker sa Bidze ki la devan nou pa egal en soulazman, sa pep pe kontinyen soufer e viv dan fristrasyon. Bokou pe dir nou'n aste kabri dan sak e pe regrete. Mr Speaker pa mwan ki'n dir me bokou parmi sa pep laba deor.

Eski Minis pa ti kapab anmenn en balans dan sa Bidze kot son Gouvernman i pa zis get lanmen drwat me osi get lanmen gos?

Zot dir nou dan Lopoziyon donn en koudmen fer avanse sa pei, be ler nou met bann propozisyon aköz i sorti lo nou kote, zot pa zanmen aksepté.

Mr Speaker semen pase avek *Bill* 13enm mwan saler nou plede isi lo sa kote latab, aköz nou konpran kisisa lamizer. Aköz nou konpran ki douler pa kapab fer de bout zwenn. Aköz nou konnen ki savedir le 10 e le 15 dan le mwan pou rod larzan bis, larzan lekòl zanfan. Nou konnen kwa sa mank komodite de baz dan lakour.

E se sa ki nou ti dir kanmenm 50poursan e menm desann ziska 25poursan ki ti ava en bon zes pou sa pep ki'n travay dir pandan sa lepidemi. Nou'n demann Minis pou re al diskite me i paret ki zot sourd lo nou e lo sa pep.

Mr Speaker Sesel i en pei ki ser, menm etranze i rekonnet sa. Kou lavi in pet plafon, e menm Minis in dir lannen prosen pa espekte rediksyon dan kou lavi. Be kote sa pep pou taye pou al rod en

soulazman si pa atraver son Gouvernman?

Pri bis in monte, pri lilitite in ogmante, komodite esansyel pa kapab gete. *STC* pri diri in monte, disik, delwil, diber, zonnyon, ponmdeter, e bokou lezot ankor. *Welfare* in koupe, *Outlet STC* ki ti ede minimiz gran kou dan deplasman in fermen. E la mon senpatiz ek bann zilwa e bann dan leo, kote nou pe ale?

Mr Speaker *URS* ki ti soutenir plizyer vilnerab e donn en dezyenm sans pou sa bann ki'n tonbe. Me in ganny aboli e ozordi bokou in retourn obor semen. E nou pe dir poudir e konplent ki i annan plis vol e kriminalite.

Mr Speaker sa bann mezir anonse pa dan lentere malere. Mon retir mon sapo avek tou sa pep Seselwa ki pe leve e trimouse, menm dan moman difisil e mon demann zot pou reste ferm.

En kantite koze in ganny dir lo nou sekirite alimanter, pou asire ki sa pep i ganny manze, me lo lot kote se zis bann gro fermye ki pe benefisy - pti fermye pe seye me zot dan en kantite difikilte. Napa akse ek kredi ouswa si zot ganny akse se zis en sonm kosmetik.

Labank Santral in met dispozisyon Finans, me labank

ennler ou a dir pe swazir lekel ki zot pou donner, e get bann prosedir ki vreman konplike.

Mr Speaker ler Minis i dir ki nek 2023 ki pei pou re war li lo semen prosperite e pou war rediksyon lo nou *GDP*, me i lans lapel pou biznes e endividi dan biznes pou dan 6mwan rekomans pey zot det e taks, eski sa lekonomi pou zot ki dan biznes pe al relanse dan zis 6 mwan? Kan pou pei pou relanse e vin ver prosperite an 2023. Sa pou mwan i poz plis kestyon.

Nou'n ganny dir ki nou rezerv *forex* dan Labank Santral i pli o ki i ti deza ete e ki to lesanz in desann. Wi mon konstata. Me realite se ki i en fason artifisyel e ki se *loan IMF* ki ede ogmant sa reserve, me pa neserman sa lekonomi.

Mon swete ki Minis i eklersi sa. Si nou pe dir ki lekonomi i stab annou met plis lenvestisman e ankouraz plis envestiser envestir dan bann sekter ki pou kre plis lanplwa.

Mr Speaker lo size lenportasyon, mon konpran globalman ki kou lenportasyon i kontinyen ogmante, fas a bann defi eksteryer tel ki rediksyon dan *supply* e prodiksyon, *availability of containers* e logmantasyon dan pri *fuel*,

logmantasyon dan *cost insurance and freight*,

Mon ti ava kontan demann Minis ki Gouvernman i anvizaze fer pou anpese ki pri e kou i kontinyen monte e monte lo letazer?

Ki legzersis pou konn pri reel e ki napa okenn fason *price fixing* ouswa tro gran *profit margin* lo pri komodite? Mon konnen Mr Speaker ki nou dan en marse lib.

Minis, mon dakor ki tou *retailers* i merit annan en *point of sale system*. Nou tou nou konnen sa i ava ede amelyor koleksyon reveni ek deklarasyon dan taks. Me eski pa in ler pou osi revwar avek nou bann labank bann *fees and charges* atase ek sa servis, ki a tonm osi dan benefis sa biznes.

Mr Speaker sa ki sa pep pe rode, se en meyer kou lavi. Pa fer sans ogmant saler e *allowances* si kou lavi pou kontinyen ogmante, akoz sa pa pou sanz naryen dan pos sa endividi.

I pli meyer nou sey de takse sa pep e larger kont tou form koripsyon e move pratik dan sekter lenportasyon ki nou Seselwa ordiner napa kontrol lo la.

Mr Speaker kot i konsern proze kapital Gouvernman Minis i sit detrwa proze anbisye

in menm koz lo bann lenvestisman dan kad *private public partnership* avek GICC, ki mon konstate ki yer ti bann size kritik par LDS.

Minis in osi mansyonn *low cost housing*. Minis eski ou kapab dir ek sa Lasanble, kwa ki *entail* dan en *low cost housing*? Ki bann *amenities* ki atase avek sa bann lakaz? eski Seselwa pou nepli viv dan en lakaz en *block tiles* ater, *built-in wardrobe* e en lasanmben konvenab ou en lakwizin modern? Mon vreman konsernen ek sa lanons.

Mr Speaker lakaz i reste enn nou bann pli gran defi. Ladministrasyon oparavan ti lans li lo en proze tre anbisye 24/24/24. Menm si pa tou ki'n parfe menm si in annan retar *at least* lamazorite distrik ozordi i annan en proze lakaz. E ki mon war sa Gouvernman pe fer louvertir, ki mon apresye.

Donk Minis laliny ki in pran i montre ki Gouvernman pa pe neserman reste ver menm direksyon.

Alors Minis ou'n mansyonn etabli fasilite pou plis Seselwa konstri zot prop lakaz. Kan eski bann detay konkret pou ganny mete devan sa pep, ki enkli konponan finansyel ki parfwa bann lenstitisyon ki pret larzan i met

plizyer kondisyon konplike? So ki *mechanism fairness* e transparans ki pou vin an plas?

Mr Speaker en eleman atase avek konstriksyon lakaz, se kou konstriksyon li menm. Mon rapel zefor Minis Bastienne pou sey al negosye ek kontrakter e osi founniser materyo konstriksyon, pou ganny pli pri abordab e ti pe komans war bes dan kou konstriksyon, pou ariv apepre R5mil a R6mil par met kare ki ozordi *average* i R10mil e plis par met kare.

Wi sityasyon *COVID* in agrav sa sekter, me Minis kwa ki Gouvernman pe mazin fer pou soulaz sa sekter? Si nou les marse dikte son lekor, nou pa pou war okenn amelyorasyon dan sekter konstriksyon, me plito entrodwir serten mezir. E la ma dakor e siport ou si zot re antre an negosyasyon avan bann founniser pou ganny bann *best deal* ki dan lentere lepep.

Mr Speaker larealite ki la deor i annan en kantite Seselwa ki pe *struggle* pou konstri zot lakaz. I annan ki *loan* in fini me lakaz pa ankor konplete. I annan ki proze in bezwen aret dan semen pou rezon finansyel, alors Minis, Gouvernman i pronons son lekor pou asiste e met fasilite kredi a en to lentere pli ba ki mon apresye.

Me mon egalman enplor Minis Finans pou vwar ki mannyer pou osi asiste sa bann ki'n bite finansyelman ek zot proze, akoz kanmenm zot pe sey rod *additional loan* zot pa pe reisi. Alors en legzersis i enportan pou konn bann ki tonm dan sa kategori.

Akoz i pa zot lafot si *loan* in fini avan lakaz i konplete me se ki to lenflasyon plis ki 30 poursan ki loter sa problem, ki'n elev kou konstriksyon konsiderableman.

Mr Speaker Bidze parey labitid i pran kont bann pti kontrakter *LWMA* ki pe fer fas ek dout e lensertitid. Sa ki mon'n koz avek i annan i degoute. Keksoz pa kler pou sa bann ki lo *extended contract*. Sa ki'n resevwar let e pe ganny demande pou aksepte en lof pli ba.

Eski sa i norm ou pratik ki sa Gouvernman i oule adopte kot i konsern donn tou kontra an zeneral? Eski byento nou pou war lamannman dan *Procurement Act* e regilasyon *Tender Board*? Eski sa pratik pa pou ouver en laport pou plis tandans koripsyon?

Mr Speaker Minis ou menm ou ti pronons ou lekor ki sa bann pti kontra i tro *cumbersome* pou *manage*, e ki ou ti ava plifere war en sistenm

kontra pli minim par distrik e rezyon, ki pou fer ki si sa i arive bokou fanmir pou perdi en lasyet manze ki ti ganny kree dan kad "leve debourye" plizyer lannen pase e ki'n ede kre plis loportinite pou pti kontrakter.

So Minis ki formil zot anvizaze vin avek pou miniz lenpak? Mr Speaker *Local Government* i en Departman kle pou administre nou bann distrik.

Mon le dabor remersye tou bann *DA* ki pe fer son travay nob e dan en fason enparsyal. Mon rekonnèt ki sa travay pa enn ki fasil. Mon remersi Mrs Leone Florentine pou son devouman dan distrik Port Glaud, e mon swete laba kot i ete Anse Boileau pou fer pli byen ankòr.

Mon osi rekonnèt Madame Linette Dodin ki'n met son *resignation* ki pran lefe le premye Desanm. Mon swet zot tou le meyer, e mon pare pou *welcome* sa nouvo *DA* ki pe vin pou travay e avans Distrik Port Glaud.

Mr Speaker R20milyon in ganny mete a dispozisyon *Local Government* pou bann pti proze. Mon rekonnèt ki difikilte bidzeter lannen pase - sa lannen li menm pa ase pou bokou proze kominoter. Mon sezi loportinite pou dir zabitan

Port Glaud pou annan en pe plis pasyans e zot bann konsern e laspirasyon i ava ganny adrese o fir e anmezir sityasyon finansyel i permet.

Me de lot kote sityasyon finansyel i fer ki in anmenn en pe lenpak negativ lo program distrik. La ki abolisyon *CSR* i anmenn en lot difikilte finansyel sirtou pou bann klib sportif, e bokou zot pa pou kapab ganny soutenir.

Mon demande akòz ki Gouvernman in bezwen taye aboli sa *CSR program*? Si i ti annan labi zot ti kapab pran bann mezir neserer. Wi *COVID* ti pe tap nou lekonomi e akòz zot pa ti *delay* sa peyman pou en peryod letan ziska ki biznes i relanse e lekonomi i stab?

Mr Speaker menm si Minis in dir nou ki pou annan lezot mekanizm anba regilasyon taks, me sa pa vèdir en lobligasyon anver sa antite biznes. Sa pou plito en zafer koneksyon ek bann sef, *CEO*, e zot ki pou swazir *who's to help* e sa napa en lasirans klib, *sport*, program distrik pou ganny gete ouswa ede e sirtou avek bann lezot proze lenfrastruktir.

Mr Speaker mon distrik in benefisyè anba sa program *CSR*, tel ki *bus terminal* Gazebo Lwazir Port Launay, ki tou

piblik i zwir menm si ou pa en zabitan Port Glaud. *Bus shelter* in ganny konstrir, lenfrastriktir pon e semen. So in annan son benefis akote Bidze *Local Government*. Kestyon se akoz aboli?

Mr Speaker sekter agrikol pe fer fas ek mankman mendev e ki napa ase Seselwa pou travay dan sa sekter. E la Minis in dir ki dezormen zot pou pe bezwen pey taks apartir 2022. E ki sekter lapas li i pou *tax free*. Mon demande oli *fairness* dan sa desizyon? Eski zis sekter lapas ki enportan? Ouswa akoz bokou nou dalon e *sponsor* ki dan sa sekter?

Mon rapel parol Vis-Prezidan Afif isi dan sa Lasanble kot i ti dir, "annou kre en sistenm taks kot nou tou i kontribye" me pa sa ki pe arive. Pti fermye pe demande ki zot osi zot lavwa i tande e i neser soutenir zot.

Mr Speaker Vis-Prezidan isi dan sa Lasanble ti deklare logmantasyon 30poursan dan prodiksyon *livestock*, me nou bann fermye i ankor pe fer fas ek defi. Mon swete ki plis zefor finansyel i al ver mentenans e konstriksyon bann lenfrastriktir neser tel ki semen, pon, pli bon system irigasyon e stokaz delo.

Akoz i annan plizyer fermye sirtou dan rezyon sid was, ki pe fer fas ek problem delo akoz tipografi e lokasyon zot laferm ki sitye lo montanny. I pa fer sans ou dir en fermye ki fodre i itiliz 80poursan son teren kan i pa kapab annan delo adekwat. Kan i napa en semen kot i bezwen sot kap ros e tonbe ek bal lo latet, bouret i glise e kase.

Alors mon krwar ki Minis Lagrikiltir, atraver ou Mr Speaker e avek sipor Minis Finans i fer li son priyorite pou adres sa size lenfrastriktir, dan en mannyer ki Jonathan ek Ralph Port Launay ava maksimiz prodiksyon. E osi akse semen pou fanmir Joubert e Essack lo blok Mahe Beach, i ava en lot soulazman ki pou ede elev moral e prodiksyon.

Mr Speaker sanzman klima i poz en gran defi pou sa sekter e bann program mitigasyon e nouvo fason fer i bezwen ganny enplimante vit e adapte vit.

Mr Speaker kot i konsern lord ek lape - lord ek lape e sekirite sa pep i merit kontinyen garanti anba sa Bidze. Nou pe war en logmantasyon konsiderab dan to kriminalite. Toulezour pilye nou lendistri nimer 1, (sa i touris) pe ganny vole. Zot pe



ganny *rip-off*. Loto pe kase e touris pe vin bann viktim. E sa i tradwir dan move piblikasyon pou Sesel, lo medya enternasyonal.

Alors Bidze, mon enplor Komisyoner Lapolis ansanm ek mon sipor, ki ler i pou vin devan sa Lasanble pou eksplik e defann son Bidze Lapolis, pou nou koz fran e tal tou kart ater. E Minis Finans ek son *PS* i bezwen ekoute.

Akoz mon krwar dan lord ek lape. Sa pep pa pou kapab viv anfermen dan son prop lakaz, ouswa bezwen barikad partou parey plizyer pei lafrik i fer pou rezon sekirite.

Alors Mr Speaker Lalwa i bezwen aplik pou tou dimoun. Lalwa i bezwen morde. Sa pep i oule war aksyon apropiye pran ek bann ki pe kre lannwi dan kominote. Bann tapaz eksektiv apre ler. Bann konfli personnel e group konmsi i annan *gang* Sesel. Sa fodre arete.

Plizyer *Housing Estate* parey Beoliere Dan Limon pe kontinyen ganny tourmante, e mon pe demann Lapolis silvouple vin gete e annou met lord kot i fodre ansanm ek mon sipor.

E de la Mr Speaker mwan mon enn ki krwar dan sa lalit kot drog ilegal. Menm si par malisye e en *attempt* pou *frame*

mwan lo size drog, mon le dir ki mon osi mon garson Bondye e ki mon lanmen e moral i reste touzour prop.

Mon pou donn tou mon sipor pou sov mon bann fer e ser ki'n vin viktim sa fleo. E mo lankourazman pou tou bann zofisye ki enplike dan sa lalit, zot pou annan mon sipor.

Mr Speaker sa Bidze Minister Lasante ki plis ki R1bilyon, mon le dabor siport e dir mersi tou travayer ki dan Minister Lasante e konman dan prive.

Wi latas pa fasil. Mon mazine mon bann ansyen koleg farmasi parey Nerrick, Paul Garry, Claude, David e Mrs De Commarmond enkli lezot, mon demann zot pou kontinyen travay dir.

Set avek sa Minis ki mon demann ou ki sa bann ki ti pe resevwar en *COVID allowance* pou get dan zot *welfare*. Si Minister Lasante i santi ki serten kad sa *allowance* i merit ganny redwir, en dyalog enportan i merit ganny fer atraver zot Departman e met larealite devan zot. Si zot in travay zot merit ganny rekonpanse.

Mr Speaker mon osi *welcome* nide enkorpor *allowance* dan *basic salary*. Sa i ava ede soulaz sa bann

travayer ler zot pe *apply* pou en *loan* ki difisil avek kriter nou sistenm banker ki fer zot pa kalifye. Me eski tou *mechanism* i an plas dan Departman Ladministrasyon Piblik?

Akoz pou annan en lenpak direk lo *entry point* e latab grid saler. Ki travay imedyat ki pe ganny fer pou akonpli sa? ki lenpak sa pou annan lo tann servis e gratwite?

Mr Speaker Minis in tous sa size ou servis enternet ki en zouti nesese e enportan pou biznes e kominikasyon an zeneral; Osi enportan ozordi dan ledikasyon nou zanfan.

Mon'n osi egalman anmenn kestyon isi dan sa Lasanble lo sa menm size. Mon senserman krwar ki negosyasyon ek bann *service provider* i primordyal. E osi ek sa lakonpanyen ki zer nou kad soumaren, fodre nou arete zis koze, koze. In ler pou pran aksyon konkret e regard byen sa marse ki pe fer plizyer Milyon, Milyon Roupri profi lannen apre lannen.

Mr Speaker lemonn ozordi i viz ever plis desantralizasyon servis e *COVID* in montre nou sa nesese. Me i regretab serten pa ki nou ti'n fer avan nou'n war regrese e nou pe war plis kontrol santralize. Nou koz lo *Ease of doing business* e

amelyorasyon lo lendeks enternasyonal. Wi i enportan, me i reste bokou pou fer.

Tan ki sa pti Sesel, sa pti Mae ler nou fer en letour ki dan ki serten landrwa ou perdi *network*. Sa i en defayans dan li menm. Ler ou bezwen vwayaz plizyer kilomet pou al akse en *ATM*, sa i en defayans dan li menm. Ler ou bezwen deplas pli lwen pou akse en Biro Desanz pou sanz sa pti *forex* ki ou'n *earn*, li osi enpoz defayans an *Ease of doing Business*.

Mon swete ki Minis Finans pa sourd lo sa ki mon pe dir e vwar ek son bann partner e *stakeholders* dan sekter finansyel e kominikasyon, pou met en plan pou adres sa bann pwen pertinan.

Mr Speaker kot i konsern lazenes ki pa'n ganny en mansyon spesyal dan sa Bidze. Me mon soulaze ler mon war bann zenn dan lemonn *IT* pe reprezant Sesel e ki'n fer Sesel sa pti pwen dan Losean ganny rekonnet.

E mon panse ki i kapab annan regre par Gouvernman pou *repeal* Lalwa legzistans *NISTI*, ki ti lenstitisyon byen ankadre pou devlop talan nou bann zenn. Egalman parey *Board SNYC* e restriktirasyon dan *SNYC* san gran konsiltasyon avek sa kous

zenes. Eski nou pe valoriz nou bann zenn?

Pou konklir Mr Speaker pep Seselwa letan in sanze. Lepase pa pou retournen. Nou dan movetan, asize esper botan pa meyer solisyon. Si ou kapab al travay, al travay pou siport ou fanmir. Si ou annan en rev biznes tap laport konsernen e ou ava sey ede. I nepli letan pou esper lasarite, akoz botan in fini ale.

Mon osi demande ki pep Seselwa i reste solider. Lavi pa pe vin pli fasil. Mon demann tou zabitan Port Glaud pou ede devlop nou distrik e pou reste an konformite ek Lalwa pou garanti lord ek lape.

Nou bann etidyan mon demann zot pou kontinyen pourswiv zot letid atraver sa sistenm ledikasyon ki'n progrese pandan sa 43an pou garanti en meyer ledikasyon. e ki tou travayer servis piblik i desarz son responsabilite pou byennet sa pep. Annou refer Sesel fyer. Mersi.

**(APPLAUSE)**

**MR SPEAKER**

Mersi Onorab. Nou ava ekout Onorab Terence Mondon. Onorab.

**HON TERENCE MONDON**

Mersi Mr Speaker. Bonzour Minis, koleg MNAs, zabitan mon distrik Takamaka e tou dimoun ki pe ekout nou Lasanble.

Mon pran laparol pou donn mon reaksyon lo Bidze 2022, anliny avek bann diferan stratezi e linisyativ ki Gouvernman pe met an plas apartir lannen prosenn.

Mr Speaker permet mwan dabor remersye Minis pou prezant avek nou Lasanble Nasyonal, en Bidze ki enspir konfyans ki nou lekonomi pe rebran menm si nou sitasyon i ankor frazil.

Ser, frer Seselwa, i fer selman 1an depi ki LDS in pran gouvrenans nou pei e pandan sa 1an, bokou in ganny akonplir. Bann size pertinan ki ti pe preokip nou pep pe ganny adrese. Seselwa pe komans apresye sa nouvo lapros e fason fer.

Ozordi, nou annan en plan konkret e pep Seselwa i konnen kwa ki priyorite Nasyonal. Ozordi, nou pe vwar disiplin fiskal pe ganny egzerse a tou nivo. Desizyon pou re aziste nou Bidze e redwir nou defisit fiskal i demontre langazman e komitman nou Gouvernman dan zesyon larzan piblik.

Nou konnen ki nou bezwen fer pou transform nou pei e nou osi konnen ki difikilte ki nou pep pe fer fas avek toulezour. Menm si bokou pe ganny fer, i reste ankor bokou plis pou fer pou redres nou pei.

Anba Gouvernman *LDS*, Seselwa pe retrouv valer travay dir. Anba nou governans, Sesel pou bokou pli prospere dan lavenir e lavi nou pep pou sanze pou le meyer.

Mr Speaker, se atraver travay *LDS* dan Lasanble Nasyonal ki nou pep in konnen lekel ki ti pe abiz lo resours piblik pour zot gen personnel. Plizyer zot in vin miltimilyonner lo byen pep Seselwa.

Larealite se ki parti *US* in retard nou lekonomi e si nou ti ekout zot lo zot propozisyon *lockdown*, nou pei ti pou fini faid ozordi. I kler ki zot in nepli konnen ki pou dir e ki pou fer. Mr Speaker, *LDS* i krwar dan bon governans.

Nou Gouvernman pe ankouraz partisipasyon e met lanfaz lo lentegrite, lazistis e respe pour Lalwa. Nou Gouvernman pe rod lefikasite dan sistenm servis piblik e fer bann desizyon ki efektiv.

Nou pe kree en Sesel kot tou Seselwa i annan lespas pou pran linisyativ e develop meyer fason fer. Nou pe kre en

lanvironnman pozitiv ki favoriz biznes e met lanfaz lo solisyon a tou moman.

Mr Speaker Minis in prezant nou en Bidze avek en krwasans pozitiv 7.2poursan pou lannen 2022 konpare avek 6.1poursan pou lannen 2021. Minis in dir nou ki nou ekspekte fini lannen 2021 avek en defisit primer 6.6poursan ekivalan R1.6bilyon konpare avek en defisit 2.6bilyon parey ti'n ganny prevwar okomansman sa lannen.

Dan prozeksyon fiskal pou 2022, Gouvernman i ekspekte fer en defisit primer selman 222milyon oubyen 0.8 poursan *GDP*. Alor, nou kapab ekspekte en gran amelyorasyon dan nou prop performans fiskal ver lafen lannen 2022.

Mr Speaker nou bezwen konpran gravite sityasyon ekonomik e finansyel ki nou pei pe fer fas avek. Nou stok det lo *GDP* i ankor tro o, en nivo ki pa soutenab. Ozordi 92 poursan *GDP* sorti 92 poursan *GDP* an 2020 pou vin 81 poursan an 2021 e pou fini avek 76 poursan *GDP* pou lannen 2022.

Sa i vedir ki nou Gouvernman i bezwen pran bann desizyon difisil ziska ki lekonomi i ariv lo en nivo ki soutenab. Sa i en realite ki nou bezwen viv avek pou sa lannen.

E mon apresye vwar ki Gouvernman pe adres sityasyon avek bokou kouraz e dan en fason konpreansiv.

Gouvernman in relans nou lekonomi dan sekter lapes, lagrikiltir, sekter finansyel e lekonomi dizital. Keksoz pe bouze. I pa drol si politisyen US pa rekonnèt sa diferans akòz zot ladministrasyon ti napa sa kouraz pou adres sa problem ki pep ti pe fer fas avek.

I enportan pou nou pep konpran ki en pei pa kapab soutenir son lekonomi si son depans i bokou plis ki sa reveni. Atraver Bidze 2022, gouvernman pe met an plas serten mezir pou pli byen kontrol depans e ogmant koleksyon reveni.

Mon apresye vwar ki zefor pe kontinyen pou adres problem gaspiyaz, retir labi e bann pratik trenn lipye ki ankor egziste dan Gouvernman.

Nou langazman pou adres problem koripsyon dan nou pei i bezwen ganny renouvle. E mon rekonnèt ki plis zefor i bezwen ganny fer pou ranforsi bann striktir ek sistenm ki kapab ed konmisyon Anti-koripsyon delivre pli byen.

Mon ekspekte ki byento nou ava kapab vwar rezilta travay lo bann ka koripsyon ki devan lofis *Attorney Zeneral*.

Program pou retir depandans lo sistenm byennet sosyal pe marse e an menm tan Gouvernman in fer provizyon pou en R40.7milyon dan Bidze pou asiste bann dimoun ki vremen dan bezwen.

Mr Speaker bon zesyon bann byen Leta i esansyel pou byennet nou sosyete. Proteksyon byen piblik i reste en langazman sa Gouvernman e nou pa pou toler okenn dimoun ki travay dan en fason malonnet.

Minis, mon konnen ki mon kapab kont lo ou pou pran bann desizyon apropiye pou protez resours piblik. I enportan pou travayer sekter piblik develop en kiltir travay ki konparab avek sekter prive.

Mr Speaker Gouvernman pe debout for akote bann biznes dan sa parkour difisil e donn zot letan pou aziste. I ti neser pou retir presyon finansyel lo sekter prive e kre lespas pou krwasans ekonomik. Seselwa pe adapte avek nouvo sikonstans e i kler ki nou pou kapab fer bokou plis ler nou met zepol ansanm.

Nou bezwen adopte nouvo lapros e rod meyer fason fer keksoz. Wi, nou kapab fer plis avek mwens. Nou bezwen senpleman, en sanzman dan persepsyon, dan nou *mindset* e

dan nou konportman, e wi nou pou kapab akonplir bokou plis.

Mr Speaker mon apresye vwar ki stratezi Bidze 2022 pe fer provizyon pou kreasyon bann diferan platform nimerik. E mon dakor avek Minis ler i dir ki teknolozi i reste en konponan fondamantal dan sa transformasyon ekonomik e sosyal ki nou pei i bezwen.

Sa nouvo lapros pe met lanfaz lo akse egal dan loportinite. Devlop sistenm peyman e platform nimerik dan servis piblik pou san okenn dout, fasilite bann tranzaksyon biznes. Stratezi Gouvernman pou kree diferan platform pou ede ranforsi enteraksyon ant kliyan e bann diferan kantite piblik e prive.

Nou Gouvernman i krwar e rekonnet rol ki sekter prive i zwe dan kreasyon larises pou nou pei. Bokou zefor pe ganny fer pou kree en lanvironnman biznes ki pli modern e pli diversifye. Bokou lanfaz in ganny mete pou ranforsi leksplwatasyon soutenab nou resours maritim.

Wi nou bezwen en lekonomi ki rezilyan pou pli byen kapab soutenir bann sok ekonomik a lavenir. Kriz finansyel 2008 ti devret en leson pou nou tou, me ansyen Gouvernman pa'n fer ase pou

pli byen protez nou lekonomi kont bann sok parey.

Mr Speaker i en plezir pou vwar ki sa nouvo Gouvernman pe travay pou fer Sesel vin en landrwa, kot i pli fasil pou fer biznes. Mon salye tou bann zefor ki pe ganny fer e sirtou pou sa volonte politik pou transform lanvironnman biznes dan Sesel.

Mr Speaker malgre defi pandemik COVID-19, mon annan lespwar ki nouvo plan devlopman ledikasyon pou kapab anmenn sa lenspirasyon ki nou zanfan i bezwen. Ledikasyon i reste en domenn priyoriter pou nou Gouvernman e Bidze i fer en provizyon R1.03bilyon pou sa lannen 2022.

Nou Gouvernman pe met lanfaz lo litalizasyon nouvo teknolozi koman en zouti pou ogmant nivo laprantisaz. Mon salye zefor ki pe ganny fer pour ki tou zanfan seselwa i annan akse avek teknolozi modern.

I en plezir vwar sa zefor ekstra ki bann biznes e serten endividi pe aporte dan devlopman laprantisaz nou zanfan. Akse avek *wifi* pou bann zanfan ek ansenyan i esansyel dan sa parkour e mon dir mersi Minister Ledikasyon pou sa linisyativ.

Nou bann lekòl piblik pe ganny sa nouvo souf. Bokou bon lidè e fason fer pe ganny valorize. Tou sa, pou ede ranforsi sa lanvironnman edikasyonnel e donn nou zanfan en meyer sans pou reisir dan lavi.

Mr Speaker mon vwar bokou ki zefor pe ganny fer pou protez nou pei kont sanzman klima. Nou vilnerabilite koman en Pti Leta Zil i mesaz ki nou pe pase dan sak rankont enternasyonal. I en plezir vwar ki Sesel i annan en lavwa tre for dan bann foronm enternasyonal lo sa size.

Mr Speaker nou Gouvernman i konsyan ki lenerzi soler i devret vin nou sours prensipal pou lenerzi. Nou pa kapab kontinyen depan antyerman lo prodwi petrol, kan nou annan en meyer alternativ. Nou fitir zenerasyon pe depan lo nou ozordi pou adopte lenerzi ki prop e abordab pou lavenir.

Mon distrik Takamaka; Ser zabitan Takamaka, mon rekonnèt ki Bidze 2022 pe fer provizyon pou serten proze selman. I mon swe ki semen Alcide Rose ti kapab demare lannen prosenn, sirtou avek sikonstans spesyal ki serten zabitan dan sa landrwa pe fer fas avek.

Mon'n deza apros Minister konsernen pou ki sa proze i ganny tou konsiderasyon neser pou lenplimantasyon lannen prosenn. Sityasyon lakaz i reste en gran konsern dan mon distrik.

Mon apresye ki Minister konsernen pou osi fer lakaz *low cost* e en tel linisyativ pou anmenn serten soulazman sirtou pou bann dimoun ki pe viv dan bann kondisyon kritik.

Anliny avek lanons Prezidan pou akseler distribisyon later *land bank* pou bann dimoun ki'n deza kalifye pou en morso later, mon swete ki lannen prosenn nou kapab devlop sa gran morso later ex-St Ange Estate e anmenn en soulazman pou nou zabitan.

Ser zabitan apre en seri diskisyon avek Minister Responsab pou Later e Labita, nou pe revwar plan devlopman Anse Marie Louise pou kree plis loportinite biznes pou dimoun dan kominote. I enportan pou nou kominote retir benefis dan sa devlopman tourizm ki pe arive dan nou distrik.

E Anse Marie Louise i devret vin sa landrwa kot viziter i kapab eksperyans nou bann valer tradisyonnel e kiltirel. Avek lespwar ki sa proze i avar kapab demare lannen prosenn, mon profite pou lans en lapel

avek bann dimoun dan kominote pou kapitaliz lo sa nouvo loportinite. Ser zabitan, avek ou sipor e partisipasyon, nou pou fer reviv nou kominote.

Pou konklir Mr Speaker, mon annan lespwar ki nou pou sorti dan sa moman difisil bokou pli for ki zanmen e ki Bondye pou kontinyen ekler nou pti pei Sesel avek tou son zanfan. Mon remerci ou Mr Speaker.

**(APPLAUSE)**

**MR SPEAKER**

Mersi Onorab. Mon pas laparol Onorab Andy labonte.

**HON ANDY LABONTE**

Mersi Mr Speaker. Bonzour Mr Speaker. Bonzour Minis. Bonzour tou Manm koleg Onorab. Bonzour tou zabitan La Rivière Anglaise ki a lekout e pep Seselwa.

Mr Speaker, permet mwan partaz sa lekritir pour refleksyon. Levanzil Zezi Kri dapre St Zan Sapit 6 vers 63. Zezi i dir. Mon Site; “Se Lespri Bondye ki donn lavi. Pouwar zonn napa valer. Bann parol ki mon’n dir zot i lespri e i lavi”. Fen sitasyon.

Mr Speaker se Bondye papa ki ti kre sa liniver dan 6 zour. E enn son kreasyon se

zonn li menm, dan son zimaz, a son resanblans. I ti beni nou e soumet anba nou dominasyon, tou pwason dan lanmer, tou zwazo dan lesyel e tou bann zannimo lo later. Lavi ti gou e i ti an roz.

An term Kreol Seselwa veditou sa ki nou ti anvi, ti vin dan dalo. Se apre dezobeisans Adan ek Eve, anver nou kreater, travay in vin nou devwar e priyorite. Alors pou nou kapab ganny nou dipen toulezour se travay, e par travay dir ki nou pou kapab anmenn larises pour nou personelman, koman en endividi, pour nou fanmir, pour nou pei e pour lemonn antye.

Ler nou pe koz larises, nou osi pe koz lo finans. E pour mwan Bidze se planifikasyon finans an term reveni e depans. Mon lentervansyon lo repons sa Bidze pou konsantre lo tou sa ki pozitiv dan sa Bidze e met lanfaz lo travay e travay dir pour ogmant reveni e anmenn larises pour nou prop lekor, pour nou fanmir e pour nou pei.

Mr Speaker enn rol sa Lasanble se annan en *oversight* lo depans sa Gouvernman. Alors mon santi mon oblize, e i enportan ki avan mon vot lo sa Bidze mon regarde kwa ki zabitan La Rivière Anglaise pou benefisye anba sa Bidze 2022.



Ki sa Bidze pou anmennen pour zabitan e pep Seselwa? Pep Seselwa tou konstriksiyon i bezwen en fondasyon. E ler ou annan en fondasyon ki solid e byen kalkile ou konstriksiyon pou enn ki dirab e dinamik. Sa Bidze ki en valer R10, 091, 651, 146 i pe set en nouvo fondasyon ki donn nou lespwar, pour nou batir en lekonomi dirab e soutenab.

Parey Minis in dir, sa Bidze pou batir sa fondasyon pou konmans sa transformasyon ki nou bezwen dan Sesel. I en Bidze ki pou anmenn nou pep ver en lekonomi kot Sesel e Seselwa pou benefisye dan lavenir. I en Bidze ki pe regilariz, e striktirel.

Seselwa sa Bidze i zis pou en lannen. Nou annan ankor 4 an pou nou kontinyen. I annan bokou ankor ki pou vini dan Bidze a lavenir. Sa ki ou pa'n ganyen dan sa enn i ava dan en lot. Zis met ou konsern devan nou dan en fason disiplin.

Sa lannen Bidze pe demann nou koman en pep pou solider avek sityasyon aktyel nou pei. Mon bann frer ek ser Seselwa pa les politisyen oubyen serten endividi, ki ankor dan sok apre sa dernyen rezilta eleksyon, oubyen ki pa ankor aksepte ki zot lanpir in

fini degrengole e servi ou koman sa leskalye pou remont pli o. Dan nou *manifesto* pour eleksyon 2020, paz 3 nou misyon pour Sesel i kler. Mon site "*We will lead Seychelles into a new era as a well-governed country, championing the rights of our citizens, enabling a thriving economy and ensuring the secure wellbeing of our people,*" Fen sitasyon.

Mr Speaker se sa ki nou pe fer e nou pou kontinyen fer pour nou zoli Sesel. Premyerman mon kontan sa lapros ki Gouvernman LDS in pran e pe adopte. En nouvo prensip pou adres bann defayans dan servis piblik.

Ankor en fwa Paz 7 sa menm *manifesto* i liste 6 prensip ki pe gid nou Gouvernman. Sa se Linite Nasyonal, promot loportinite, delivre en servis efikas, responsabilite ek la transparans, lazistis e egalite pour tou, e respe pour lord ek Lalwa.

Dan lepase mon'n touzour travay dan sekter prive kot prensip e lankadreman *RBM - Result Based Management* in toultan anmenn sikse. Avek en tel lankadreman ki'n ganny adopte parey Minis in dir, sa pou ede amelyor kalite e nivo

servis ki zabitan i resevwar avek travayer servis piblik.

I pou vin pli ekitab, dan la transparan, efikas e efektiv. E la mon anvi dir ou sa *PS*, ou sa *CEO*, ou sa msye oubyen madanm dan sa biro Gouvernman ki ankor pe trenn ou lipye, kot *file* zabitan La Rivière Anglaise, lapousyer pe kontinyen akimile lo la.

Ou ki ankor pe donn Seselwa bann larepons banal e pa akseptab. Balans ou, akoz zabitan i anvi en repons pozitiv e realis. Ou ki pa oule reponn ou telefonn oubyen pa rann repons ou *email* serye ou! Akoz le 25 Oktob 2020 zabitan La Rivière Anglaise ti swazir mon koman meyer Kandida pou reprezant zot.

Alors mon pou fer sir ki zot ganny en servis ki efikas e en meyer dil dan tou zot swe. Ou ki krwar ou pe vin fer politik dan travay arete! Swa ki ou siport *US* ou *LDS* pa enteres mwan. Mon anvi latransparans, efikasite e rezilta, akoz nou tou nou annan menm drwa ek menm responsabilite anba sa Konstitisyon.

Sesel pour tou son zanfani ti nou moto dan sa dernyen eleksyon, me ozordi parti *US* i war sa i bon pour zot, e zot in adopte sa moto. Me san ki zot konpran ki savedir ‘Sesel pour

tou son zanfani.’ Si zot oule konpran sa moto fodre zot lir e adopte nou *manifesto* ki nou Parti *LDS* ti met an valer devan Lepep Seselwa sa dernyen eleksyon.

Me parkont se zot Parti *US* ki’n elve sa pti minorite move zanfani dan Sesel ki pa pe delivre ozordi. E nou dan *LDS* nou pe dir zot sa bann move zanfani dezobeisan, dres zot bor! Mazorite pep Seselwa ti vot pour en sanzman Oktob 2020 e anvi vwar rezilta.

Mon espere ki sa bann *dead wood* zot tann mwan, akoz mon pou kontinyen pouse pour mon zabitan. Si ou pa kontan *just too bad*. Sed laplas pour sa enn ki anvi travay e ki pa anvi vin fer politik dan travay, parey *US* pe ankouraz zot bann siporter pou fer, apre pou vin kriy viktimizasyon.

Me parkont mon anvi felisit tou sa bann ki pe rann lapel Minis, kot Minis pe demann zot pou koste pou rekonstri nou Nasyon. En alokasyon 215.8milyon in ganny bidzete pour 733 *post* pou fer nouvo rekritman dan bann Minister, Departman e Lazans.

I montre ki i annan plas pour Seselwa ki anvi travay dan sa pei. I vre ki napa alokasyon pour logmantasyon dan saler e

dan *long service allowance* dan sa Bidze pou travayer servis piblik. Me i pa'n dir ki pou annan koupir.

Parkont bokou Seselwa pe santi zot ankouraze e pe antisipe ki sa revi striktir saler ki byento pou vin an plas ki pou *consolidate* bann *allowance* ek saler kot prezan i pou bokou pli fasil pour labank pran konsiderasyon e fasilite ler sa endividi pe al rod en *loan*.

Alors si Onorab Pillay ti'n ekout byen, i ti pou'n tande ki Minis in fini pran kont sa. Ki ou pe sey fer sa pep krwar ankore Onorab Pillay? Atraver ou Mr Speaker

Mr Speaker swa ki ou travay dan servis piblik, parastatal oubyen prive ki vedir ki ou pe kontribye dan sa pei. Mon anvi zwenn ek Minis pou felisitou Seselwa ki leve tou le bomaten pour travay, e travay dir pour devlopman sa pei. Ler nou vin efikas nou ede ogmant larises e fer Sesel briye.

La ki Minis in anonse ki lannen 2023 laz pansyon ek retret pou sorti 63an pou vin 65an, e Minis in osi dir ki Fon Pansyon pou permet sa ki anvi pran son pansyon 60an me, avek en pansyon redwir, mon annan sa pou dir.

Minis, mon konpran. Mon rekonnèt akòz Gouvènmàn in

azir brav e dir Seselwa laverite konpare avek Gouvènmàn presedan ki ti touzour per pou pran sa bann tel desizyon sitan brav, akòz i pa popilis. Akòz *US* ti pe mazin zis reste o pouvwar.

Me sa pa'n abouti zot dan naryen. Pa oubliye ki se Prezidan Wavel ki ti lager ki pansyon i sorti apepre R3200 pou ariv en pe plis ki R5mil ler Parti *US* ki sa letan ti Parti Lepep ti dir ki pei pou faid si nou fer sa.

Me i enportan pou rekonnèt ki se nou bann paran ek gran paran ki'n travay dir zour e lannwit pour anmenn sa pei kot in arive ozordi. Non se pa senpleman en parti politik oubyen serten endividi ki'n travay dan sa pei.

Sa pei in progrese akòz se zot nou bann paran e gran paran ki'n ede batir sa pei. Fodre ki nou dir mersi e annan gratitid pour tou nou bann paran e gran paran pour zot kouraz, devosyon e kontribisyon.

Se zot, nou bann zanset ki'n rente e trimouse ki nou'n ariv kot nou ete. Alors annou valoriz e sipòrt nou bann dimoun aze. Mon senpatiz avek tou sa ki'n perdi enn son pros pandan lannen 2021, swa avek *COVID* ou en lot maladi. Swa sa ki pli zenn ou sa ki aze.

Mwan dan distrik La Rivière Anglaise e Sesel nou'n perdi zabitan ki ti pli aze Madanm Nancy Elisabeth Marie ki tin ariv 112an e ti kit nou le 11 Me sa lannen.

La i reste nou 2 santener dan La Rivière Anglaise Madanm Bibianne Therese Mein ki pou selebre son 101 an le 11 Desanm sa lannen, Madanm Simone *Lady Charles* ki pou osi selebre son 101an le 12 Desanm sa lannen. E Madanm Claire Cout ki pou selebre son 100 an le 11 Zanvyè 2022, avek lagras Bondye Papa. Mon anvi dir zot, ki zot pou reste touzour bann bizou dan nou leker.

Minis pep Seselwa i konnen ki larzan sa pep in touzour ganny mal zere dan lepase anba sa ansyen Gouvernman. Me i enportan pou eksplik sa pep aköz en tel desizyon pou sa revizyon dan laz pansyon e laz retret. Eski i aköz bann lenvestisman pa apropiye ki Fon Pansyon in fer?

La dan en Konferans Lapres nou'n tann en ansyen Minis ki'n byen benefisyè e pe tous son gro pansyon vin dir nenport kwa. Minis i enportan ki zabitan i ganny sa leksplikasyon. Aköz parey Prezidan Mandela in deza dir

Mon site "*Fools multiply when wise men are silent.*" Fen sitasyon.

Mon osi anvi konsey lazenes Seselwa, silvouple pran en lanplwa formel, e ede kontribye dan sa fon. Pa zis travay zournen pran larzan bwar, fimen apre benefisyè lo sa ki ou kanmarad pe kontribye. Bann zenn fiy ek bann zenn garson Seselwa leve pran ou responsabilite, travay pou batir ou desten.

Travay pa en dezoner. Travay pa touy dimoun. Mr Speaker bat kannel pa ti zanmen en laont pour nou bann zanset. Zenn aprann anmans en kas par en kas, en sou par en sou, R1 par R1 demen ou ava kapab ganny en lavenir. Pa zis diverti kontan apre zis vole ouswa mandyan.

Vole ou mandyan pa zanmen en metye. Apre ou konsider ou lekor koman vilnerab. Konte pa komans kont par milyon parey serten i le fer nou krwar.

Minis Finans ek ou bann teknisyen e tou travayer ou Minister, mon anvi felisit zot ankor enn fwa, pour sa Bidze lannen 2021 ki ti ganny soumet devan sa Lasanble le 16 Fevriye 2021 e kot Finans in ganny byen zere par sa Gouvernman *LDS*.

I vreman enportan pour note ki pour la premye fwa dan listwar Sesel ki Gouvernman i depans mwens ki in ti'n bidzete. E sa i montre ou ki *LDS* pa pe vin depanse zis akoz larzan in ganny bidzete. Sa i en siny lespwar ki konfirman ki dan lepase larzan pep Seselwa ti pe ganny donn bal ladan e ti napa bon zesyon.

Mon oule dir bravo tou sa bann travayer e akter ki'n fer sa posib. Mr Speaker prezan ler zabitan La Rivière Anglaise e pep Seselwa i tann Prezidan en parti ki son parti in mal zer larzan sa pep pandan plis ki 40 lannen - pa 40 zour - e kot \$50milyon in disparet, i vin lo televizyon nasyonal e dir ki sa 9 mwan ki Gouvernman *LDS* in o pouvwar se 9 mwan ki bann sotrel in manze.

Lepep Seselwa pe demande lekel sa bann sotrel ki'n manz lekel? Eski sotrel i menm fanmir ek bann grenwir? Akoz Sesel napa sotrel. Eski sotrel in degize e vin grenwir parfwa?

Mr Speaker dan zistwar Kreol Seselwa nou'n tann bokou sa term 'sougoula'. Me zanmen mon'n war oubyen konnen ki sougoula ki annan lake kartron i egziste, me parfwa mon le krwar ki bann sougoula i vreman egziste isi

Sesel e zot konmans pe vin aktiv dan bann konferans lapres lo televizyon nasyonal.

Se bann sougoula fouter dezord ki konn zis divizyon. Sa bann sougoula zot vreman kalifye avek bann kalifikasyon lo nivo doktora. Zot manz zis gato e bwar *champagne*. E par lao sa nou annan en Lopoziyon ki pa serye;- en Lopoziyon ki divize. Kot en *Leader* dan Lasanble i touzour pe kriy '*point of order*' e finalman *walkout*!

Son Prezidan Parti li in pri dan en rev e en kosmar egzaktaman parey bann *show Teletubbies*. Mr Speaker ler nou Prezidan ti dir ki *LDS* in erit en kales kase, bokou mon bann zanmi *US* i mekontan.

Me enn fwa Prezidan aktyel Parti *US* ki in dir dan enn son konferans lapres ki Gouvernman *LDS* son gouvrenay in kase. I vedir ki se Gouvernman *SPUP/SPPF/Lepep* e *US* ki'n kas gouvrenay sa pei. Aksepte ki *LDS* in pran labar dan en peryod pli difisil e kritik.

Minis Finans in konfirman ki Gouvernman pe travay pou anpes nou pei koule. Me pa trakase akoz se nou Prezidan Wavel John Charles Ramkalawan ki pou repar sa gouvrenay ki zot in kase. Me kit antet ki 2025 pep Seselwa pa

pou kapab fer zot konfyans akoz *US* zot konn zis kase, vole, touye e fer disparet dimoun!

Pep Seselwa i dir zot kontinyen plennyen, gronnyen parey bann grenwir akoz zot ipokrit. Me kit antet ki pou napa ankor koudeta dan sa pei.

Mr Speaker Sa Bidze i pa enn ki parfe, ou enn ki nou ti ava swete. Me dan sa moman difisil ki nou pe viv ladan avek *COVID* ki pe kontinyen ravaz lemond e nou zoli pti pei Sesel, ankor enn fwa nou bezwen rekonnèt devosyon ki Minis finans ek son bann *staff* in mete, pou kapab prepare e prezant pep Seselwa avek en tel Bidze byen kalkile.

Zabitan La Rivière Anglez regarde enn bann rezon akoz mon pou siport sa Bidze. Pli gro alokasyon, 1.44 bilyon in ganny *allocate* pour Benefis e Program Lazans Proteksyon Sosyal (*ASP*), e alokasyon i *comme* swivan;

R820.6milyon pour benefis retret. Alors ou ki retrete sa Gouvernman pe siport ou.

R109.4milyon pour benefis envalidite. Ou ki envalid, Gouvernman *LDS* pa'n oubliy ou.

R141.8milyon pour benefis dezabilite. Ou ki annan

en dezabilite nou pa pe kit ou ater.

R299.4milyon pour *Scheme Home Carer*. Ou ki pe pran ka avek nou bann trwazyenm az nou pou kontinyen siport ou. E ou menm sa trwazyenm-az, Gouvernman *LDS* i rekonnèt ou kontribisyon ki ou'n fer dan sa pei.

R40.75milyon pour *Safety Net* ki Minis in dir in retire e pou ganny administer anba sa bann antite swivan;

R27.95milyon pour *Scheme Daycare* avek Lenstiti pour Devlopman Pti Anfans (*IECD*).

R9.2milyon pour *Scheme* avek *SPTC* pour bann retrete ek dimoun ki otreman kapab

R1.2milyon pour *Scheme* Transpor pour bann Zil Pros pour referans medikal pou al kot Minister Lasante

R2.4milyon pour *Scheme* Lasistans Lakaz pou bann endividi dan sirkonstans *emergency*, kan i annan en dife ouswa dezas pou al kot Minister responsab pour Gouvernman Lokal.

E R50milyon pour bann depans enprevi, oubyen *Contingency*.

Alors Mon frer ek ser, abiye parey Lala ouswa Tinky Winky dan Sanmdi kot Lorloz

pa pou fer ou okenn dibyen. Akoz Gouvernman pe pran kont pou donn lasistans bann ki'n vremen dan bezwen e merite.

Me pa pou parese e paresez. La mon mazin sa zenn madanm anler Union Vale ki dir; “mon frer ou konn en keksoz? Malgre ki mon lo sibstans e mon'n perdi sa travay lo *URS* me mon apresye e remersye sa Gouvernman *LDS*, in fer mwan aprann pran mon responsabilite e depan lo mon prop lekor. Ozordi mon kalkil de fwa avan mon al rod en pti *steam*.”

E i fini par dir; “Kontinyen sa bon travay frer. Bondye pou pitye zot e zot pou reisir.” Mr Speaker ki pli gran lankourazman ki sa?

Mr Speaker lakaz i reste en gro demann dan La Rivière Anglaise e dan Sesel. Alors, mon ti ava swete war plis zefor ganny mete dan devlopman lakaz.

Parey mon'n deza dir oparavan, i annan bokou bann kontrakter ki dan domenn konstriksyon ki anvi travay avek Gouvernman pou rod finansman lo zot menm. Fer lakaz e vann bann endividi atraver *loan* avek bann Labank Komersyal.

Zabitan pe zis demann en twatir par lao zot latet. Alors

Minis wi, zabitan pe rod en lakaz afordab parey ou dir zis en lakaz *low cost* e sa ava permet nou fer plis lakaz avek mwens resours.

Mon pran sa lokazyon pou felisit sa 8 fanmir pour zot bon konportman e respe ki zot pe montre sa kominote, apre ki zot in fek benefisy e avek sa 8 blok 2 lasanm kot proze *Luxury Housing Estate Ex-Chateau Vallon Union Vale*. Se koumsa ki ou ganny respe par montre respe.

Sa i en legzanp pou tou lezot *housing estate*. Menm ki Onorab Pillay i zalou akoz pa li ki'n ganny sa priyorite pou al koup riban.

### **MR SPEAKER**

Onorab! Onorab! Mon pa krwar ou devret fer en lakizasyon zalou avek Onorab Pillay lo son diskour. I *improper motive* Silvouple! E mon *remind* ou annou gard respe pou Manm lo tou lede kote latab. Mersi ou a kontinyen silvouple.

### **HON ANDY LABONTE**

Mersi Mr Speaker. Mon *retract* sa bout Mr Speaker. Me ler ou envit li pour fer son kontribisyon, parey lo Komite *Platinum* i per pou vini akoz Prezidan son parti pou bat li avek roten.

Zot le fer Seselwa krwar

**MR SPEAKER**

Onorab! Eski ou'n fer sa referans avek Onorab Pillay la?

*(Off-Mic)*

**MR SPEAKER**

Les Onorab Labonte koze silvouple, zot pa la pou reponn pou li. Onorab mon repet, mon demann evit komanter ki atake anver lezot Manm *ok?* Sa ki ou'n dir mon pa krwar in annan fondasyon mon pa konnen kote ou'n, ki referans ou pe fer avek. Silvouple evite. Kontinyen.

**HON ANDY LABONTE**

Mersi Mr Speaker. Zot oule fer Seselwa krwar ki se larzan *US* ki'n fer sa bann devlopman. Seselwa lizye in ouver. Zot in menm dir ki ledikasyon e lasante i pou naryen. Me *sorry* Onorab Pillay atraver ou Mr Speaker, napa naryen ki pou naryen. Se larzan *tax payers* ki pe pey sa bann tel depans. Aret koz mansonz avek sa pep.

Mr Speaker mon lot konsern se ki mon pe demande ki sa ladministrasyon avan in fer avek sa bann gro alokasyon larzan ki zot ti gannyen, pour proze distrik dan le pase. Avek zis 200mil par distrik sa lannen, nou dan distrik La

Rivière Anglaise nou'n kapab konplet 4 proze kot nou'n ede amelyor lavi nou sitwayen.

En Proze Drenaz La Rosière e 2 proze drenaze Majoie kot plizyer fanmir aprezan delo pou nepli devid dan zot lakaz ler gro lapli. Nou'n fer proze peron pou bann nouvo zaban Union Vale.

Minis avek sa alokasyon en pe plis ki 700 mil sa lannen pou lannen 2022 pou proze distrik, nou pe antisipe pou fer bokou plis ankor pour amelyor lavi nou bann zaban. Avek sa negosyasyon pou konstriksyon nou bazar La Rivière Anglaise kominote peser i pe espere avek lespwar, ki enn fwa pour tou zot rev ava vin en realite sa lannen ki pe vini.

Mr Speaker pep Seselwa i apresye sa gran amelyorasyon dan travay ki Lapolis pe fer pou elimin bann *hard drugs* parey eroin e kokain lo later Sesel. Menm Prezidan Parti *US* i apresye sa travay e dekrir sa travay koman 'formidab.' Nou konnen ki zot lavi pa fasil sa bann polisye.

Mon anvi dir Lapolis kontinyen sa lalit ki zot in konmanse mazorite pep Seselwa i deryer zot. Me parkont prezans Lapolis lo nivo kominoter i merit ganny ranforsi.



Mr Speaker bann lakonpannyen parey *Seychelles Nation* malgre zot pa pe pran finansman sorti kot Gouvernman, mon ti ava swete ki zot zwe en rol en pe pli aktiv, e moral pour osi endik e enform sa pep avek lenformasyon apropiye, lo bann devlopman ou topik enportan dan pei ki annan en lenpak enportan lo sitwayen Seselwa.

En legzanp se ler *STC* i fer okenn promosyon kot pri marsandiz i desann, ki annan en lenpak pozitiv lo pep Seselwa. Mon swe se ki Zournal Nasyon pa merit esper *STC* vin kot zot pou pey en *advert*. Mr Govinden ek son lekip i merit vin proaktiv e santi li oblize met en *advert* dan zournal Nasyon pour ki Seselwa i konnen.

Me non pa donn priyorite okenn parti politik pou fer politik dezespere. La mon osi anvi felisit sa bann travayer devoue kot *Seychelles Nation*, pour zot bann bonn travay ek bann ler ki pa vremen favorab parfwa.

Mon osi anvi dir *STC* kontinyen konsantre lo zot priyorite e misyon, pou rod tou fason ki pri marsandiz dan laboutik kontinyen desann. Sa *RRP* pe vremen ede e nou osi bezwen rekonnnet e apresye ki *Seychelles Retailers Association*

avek bann boutikye dan distrik pe osi ede dan sa demars pou ede adopte bann pri ki afordab.

Alors mon anvi dir *Retailers Association* ki nou rekonnnet e felisit zot pour sa zefor remarkab. Nou swete ki mazorite boutikye i zwenn sa lasosyasyon.

Mr Speaker avan mon terminen mon oblize dir mersi Bondye Papa pour tou ou benediksyon dan mon lavi. Mersi Mr Prezidan avek ou *Cabinet Minister*. Mersi mon Clerk Ms Florie Rosette ek mon *DA* Ms Jancy Volcere. Mersi Ms Mary, Ms Kathleen, Ms Anette, Ms Angel, Ms Ethel, Mr Michael, Madanm Ah-Tave, Mr Charles ek Mr Delton.

Se sa mon lekip ki pe fer sa travay remarkab e formidab pou anmenn distrik La Rivière Anglaise lo sa lot nivo. En lekip ki ansanm anba mon direktiv nou'n kapab elimin politik dan da Ladministrasyon Distrik kot tou zabitan ozordi zot santi zot *welcome*. Bravo sa tim. Sa ti enn mon pli gran swe.

Mersi osi tou mon bann Manm koleg Onorab e travayer Lasanble. Mon gratitid i montre sa lespri travay lekip solid. Mon pa pou kapab oubliy tou mon bann aktivis - sa 1429 zabitan ki'n fer mwan konfyans e tou zabitan La Rivière Anglaise ki

pe apresye mon travay. Mon pou kontinyen reste konekte avek zot. Ansanm lavenir i briyan.

E pour terminen Mr Speaker les mwan dir zot kwa mon priorite. Ler nou koz pov nou souvandfwa mazin zis sa ki napa larzan. Me mwan koman en krwayan. Pov i verdir bann ki pa kapab koze oubyen bann ki feb. E mwan mon la pou reprezant sa ki pov. Alors mon anvi dir avek tou pep Seselwa e sirtou zabitan La Rivière Anglaise, deza 1an in pase i reste 4an.

Mon pou kontinyen reste sa lavwa e pou travay dan zot lentere san okenn lapreferans. E zot mon bann koleg lo lot kote latab mon anvi zot note ki se mwan Lavwa Prezidan zot parti US isi dan sa Lasanble Nasyonal, akoz i enn mon *constituent*.

E mon pare pou ekout li. Vini nou ava dyaloge. Mon ava anmenn ou bann konsern devan kot i merite.

Mon pou termin mon lentervansyon parey mon ti konmanse. Levanzil Zezi Kri dapre St Zan Sapit 6 vers 63 Zezi i dir. Mon Site; “se Lespri Bondye ki donn lavi; pouvwar zonn napa valer. Bann parol ki mon’n dir zot i lespri e i lavi”.

Fen sitasyon. Mersi Mr Speaker.

**(APPLAUSE)**

**MR SPEAKER**

Mersi Onorab. Bann Manm Onorab mon santi mon annan en gran tolerans pou politik, bann referans avek sa ki en parti in fer, sa ki lot in fer e mon respekte sa dan zot diskour.

Me selman mon pa anvi war nou Lasanble desann dan en *pattern* kot nou akiz kanmarad mansonz lalang. Akoz sa ki en kote i fer lot kote osi pou frer e apre nou pou vin zis en Lasanble ki konsantre lo bann latak personnel, ki mon pa anvi war arive. Alor mon a remersye zot pou zot konprenezon.

Mon krwar nou a bezwen pran poz la me selman nou pa a perdi sa moman travay. Nou ava rebran travay 11er mwen dis - 10er 50. Mersi.

**(BREAK)**

**MR SPEAKER**

*Welcome back.* Nou rebran diskour. Onorab Wallace Cosgrow.

**HON WALLACE COSGROW**

Mersi Mr Speaker. Bonzour Mr Speaker. Bonzour Minis. Bonzour tou Manm Lasanble Nasyonal. Tou Seselwa ki pe skout nou isi Sesel e osi atraver lemonn.

I en plezir pour mwan konman en manm nou setyem Lasanble Nasyonal adres zot tou bomaten e pou egzers mon dwa e devwar repons lo ladres bidze par Minis pour Finans. Prosesis Bidze i enn ki neserman bezwen ganny fer tou le lannen.

E mon oule o konmansman rekonnet zefor e travay dir tou bann zofisy Teknik bann Minister, Departman e Lazans espesyalman bann zofisy Minister Finans ki travay diran lannen pou afen ki nou nobou annan en Bidze pour pei. Mon dir zot mersi de mon prop lapar e de lapar mon *Caucus*.

Mr Speaker tou Seselwa i bezwen konsernen avek son Bidze Nasyonal. Bidze Nasyonal i reflekte zefor nou tou ki travay e ki kontribye dan en fason ou en lot, pou avans nou pei byenneme de lavan.

Mon kontan pou vwar ki i annan bokou lentere dan sa prosesis e ki i annan de plizanpli bokou plis *scrutiny* par premyerman Lasanble Nasyonal, Medya,

Sosyete Sivil me petet pli enportan par nou bann sitwayen. Sa i demontre levolisyon dan nou demokrasi, konprenezon ek matirite nou pep e dezir partisipasyon enkli siv.

Tou Seselwa i bezwen dan en fason ou en lot kapab idantifye li avek Bidze e bezwen kapab war benefis ki Bidze i anmenn pou li. Mon ti promet ki mon pou ede konstri sa Bidze, e la mon le fer tre kler ki dekonstri Bidze i vedir met li anba *microscope* e analiz profondeman serten provizyon e deklarasyon pour benefis nou tou.

Mr Speaker apre lan sanzman Gouvernman pei, parol deor e parol dan labous tou politisyen *LDS*, enkli Prezidan Larepiblik se ‘pasyante’. Nou bezwen annan ‘pasyans.’

Se sa menm group politisyen ki pandan 30 an zot in dir nou ki zot kapab fer diferans e fer pli byen. Se zot menm ki ti fer en kanpanyan an 2020 e promet pep Seselwa ki zot ti pou fer desann pri lavi, zot ti pou met larzan dan pos Seselwa, zot ti pou lager kont koripsyon, e pa bliy sa zafer sakouy pye kot ou, frer ek ser Seselwa ti pou anmas bann fri.

An gro lavi Seselwa ti pou

pli meyer avek zot lo direksyon pei. 1an apre ki nou'n war? En pledwari pour nou pasyante, COVID-19 ki'n ravaz nou pei e nou fanmir; move *management* lo zot par, plis ki 120 nou frer ek ser ki'n malerezman perdi zot lavi enkli 3 zanmi pros ki mon'n lekol avek.

Depans ekstravagan lo zil, *travel* aletranze, bal dan *Dubai* kot zot dans Pti Galo, zot in byen aranz zot avek bann *allowance* ki apre zot dir ti deza la me ki pa korek. Sanzman Lalwa deklarasyon zot bann byen, sa i sa ki nou konnen. Lalis i long frer ek ser Seselwa.

Mr Speaker mon'n ekout atantivman e esper Minis anons tenm pou Bidze 2022. Annefe menm Bidze 2021 ti napa en tenm. Mazorite bann pei ler zot prezant zot Bidze, zot prezant en *theme* ki anglob stratezi e Polisi ki sa Bidze i fonde lo la e Gouvernman an Zeneral e i met en *focus* lo sa ki nou le *achieve* pandan sa lannen fiskal.

E sa tenm i baze lo bann gran laliny Polisi sa Gouvernman. E la mon pa war li drol napa en tenm, akoz sa Gouvernman pa ankor met ater son bann gran laliny Polisi. Zot ankor pe fonksyonn an gran parti lo bann Polisi Gouvernman *United Seychelles*.

En legzanp, Minis pour

Later ek Lakaz ti dir avek Lasanble ki i pou pare avek nouvo Polisi son Minister plis ki 4 mwan pase. E ler mon ekout deliberasyon Minis dan son ladres bidze an se ki konsern Later ek Lakaz napa refleksyon en nouvo Polisi.

Zot ankor pe *chérie* sa ki nou'n kit ek zot. Akoz ti bon. E mon pour retourn lo sa zafer lakaz pli tar dan mon ladres. In annan bokou politik kin ganny fer lo size relansman lekonomi pei, boner sa lannen e zot pe sant laglwar. *United Seychelles* in ganny akize ki avek nou lapros pei pa ti pou'n ouver e pei ti pou'n faid.

Mr Speaker sa i en lot mannev pour detourn latet Seselwa. Ozordi mon oule fer tre kler ki *United Seychelles* ti pou neseserman ouver pei avek larestan lemonn dan en fason pli responsab e organize. Nou stratezi ti pou enn pli byen kalkile prenon kont ki a sa letan COVID-19 ti pe ravaz nou bann kominote.

Nou ti pou adopte en lapros par faz. Seselwa ya rapel ki menm si nou ti ouver pei bokou pei lemonn ti reste fermen avek nou zisteman akoz to lenfeksyon ki ti o. Ler zot pe sant laglwar ekonomik, plis ki 120 fanmir Seselwa pe pler

depar zot pros. Eski zot napa en remordkonsyans?

An 2022 Sesel i an plenn reform ekonomik avek lasistans fon moniter enternasyonal e nou konnen ki sa fon in met bann target ki Sesel i bezwen *attend* pour ki nou kapab kontinyen benefisyé avek zot lekspertiz e osi lasistans finansyel.

Alors nou par war li drol ki Bidze 2022 i preski R1bilyon mwens ki Bidze 2021. Lanfaz i lo sif e sif prensipal se rediksyon nou *deficit* bidzeter dan en dele letan pli vit, san pran kont reperkisyon ki sa i annan lo nou popilasyon.

Savedir redwir depans an relasyon nou prodwir domestik brit. Nou war dan Bidze 2021 la kantite don ki Gouvernman ti pe ekspekte in senpleman pa'n materyalize malgre zot ti pe koz labous plen.

E an rezilta bokou bann proze ki ti pour benefisyé ou konman en sitwayen, ki swa en fanmir ki'n kontribye e ti pe ekspekte zot prop lakaz, ouswa en pti antreprenner ki depan lo bann pti proze Gouvernman pou fer ou biznes marse.

E sanmenm ki zot ti vin dir nou ki zot in fer *savings*, aköz zot in bezwen re aziste Bidze pou pran kont bann don ki pa'n antre. Nou'n osi war ki

Gouvernman pa'n performan dan lan aköz mazorite bann rekritman pann ganny fer, mazorite proze kapital osi pa'n materialize.

Mr Speaker to lenflasyon an Oktob 2021 ti 9.99poursan an konparezon avek menm period 2020 ki ti 1.93poursan, e ki sa i vedir pou nou. Pri komodite ek servis ki nou konsonmen in ogmante konsiderableman e pouwar aste ki nou bann konsonmater nou annan, in par konsekan redwir konsiderableman. I sifi pou zis konpar ou *basket shopping* ki ou fer pour lakour.

An 2021 ou Bidze pour *shopping* lakour pa'n anmenn dan lakour osi kantite konmisyon ki lannen 2020 e bann lannen oparavan.

Sa i tout le kontré avek sa ki LDS ti promet ou dan kanpany 2020. Nou tou nou pe santi lefe ogmantasyon dan pri komodite. Minis in dir ki STC pe ede pour fer pri lavi desann. Eski ou ki ti fer ou dernyen *shopping* dan *hypermarket* ou'n remark sa? Zis mazine konbyen bwat margarin ti kout ou - sorti R17 pou al R26.

Pri lavi i ogmante me Minis i dir pou napa logmantasyon saler an 2022. Pou napa *long service*

*allowance*, e pour bann ki lo Kontra *Public Sector Commission* pou napa logmantasyon a lafen kontra. Noun osi war pou en dezyenm lannen konsekitiv trezyenm mwan saler in ganny koupe. Gouvernman i demann travayer pou pasyante e fer en pti pe sakrifis.

Pandan sa menm letan ki ou pe ganny demande pou fer sa sakrifis e pasyante, bann Minis in piblikman konplent zot saler e dir ki pa ase. Zot in byen aranz zot *package* swa avek nouvo *allowance* ouswa avek benefis ki'n ganny ogmante apre zot dir ti deza la. "Annou koz en kou laverite" *comme* dir sa *fame* msye.

Mr Speaker ankor enn fwa mon demande kan eski travayer Seselwa pou rekipere li? Mr Speaker la ki mon pe koz lo travayer e pour travayer, nou parti *United Seychelles* depi son kreasyon an 1964, sa letan *SPUP*, nou'n touzour lager e travay pou asir en meyer dil pour travayer Seselwa.

En meyer lapey en meyer kondisyon travay e ler i decide pran son retrait en meyer pansyon posib pou viv avek dignite menm si ozordi i annan bokou ki anvi detri sa sistenm sekirite sosyal ek lasistans sosyal ki nou'n met an plas.

43an dan sa pei nou'n fer bokou.

Mon mazin mon gran manman, mon granpapa. Zot in ferm dan zot konviksyon pour nou Parti e menm si dan mon zenerasyon pa tou ki'n swiv dan zot lepa mon promes se ki mwan mon pou kontir sa lalit ki zot in konmanse. Zot in kit deryer en Sesel meyer e se mon dezir pou fer parey pou lot zenerasyon.

Dan sa menm loptik Gouvernman in anons sanzman dan laz retrait sorti 63an pou vin 65an e osi lamannman dan laz ki ou akse ou Fon Pansyon pou vin 65an. E sa pou pran lefe Zanyve 2023 zis dan ankor en pti pe plis ki 1an.

Tou Seselwa ki travay dir i planifye son retrait. Bokou dimoun ki sipoze pe pran retrait sa lannen in fini konmans plan depi menm 5 an pase. I vreman *unfair* e pa normal pou en Gouvernman anons en desizyon sitan enportan, ki annan lenpak lo fanmir Seselwa e averti nou zis 1an avan sa i pran lefe.

Gouvernman i dir zot pou lans konsiltasyon. Konsiltasyon ti merit ganny fer avan ki konsey Minis i aprouv sa desizyon e fer sa lanons. Wi Prezidan Faure ti anons sa

propozisyon dan enn son *speech* Leta Lanasyon. Me i ti osi angaze pour konsiltasyon.

Lazenes Mr Speaker i fitir nou pei. Lazenes i bezwen o sant size diskisyon tou sa ki pou arive dan nou pei. Zenn i angaze dan sosyete sivil, dan ledikasyon, dan *sport*, dan lar, dan spirityalite anefef dan tou domenn Mr Speaker.

Ou sa zenn ki pe kontribye, ki dan pos-segonder pe debourye pou zwenn lemond travay ouswa pou plis letid, reste *focus* e konnen ki menm si sa bidze pa koz pour ou, nou dan *United Seychelles* nou la pou siport ou.

Me i enportan pour pran letan pour grandi. Aprann avek sa ki pli aze e zour ou letan pou arive. Kontinyen persevere aköz parey mon'n dir se ou zenn ki fitir sa pei.

Benefis Sosyal, Bidze pou sa lannen i fer provizyon apepre R1bilyon,445milyon pou *Benefits And Approved Programs* pour Lazans Proteksyon Sosyal. Sa i pou bann diferan lasistans e benefis statiter anba Lalwa Sekirite Sosyal pou nou sitwayen.

En sistenm ki nou ti met an plas pour soutenir bann ki bokou pli vilnerab dan nou sosyete. Nou konnen ki i annan en reform dan sa sistenm ki pe

aktyelman pran plas avek led Labank Mondyal, me sa ki nou pa konnen se ki zistans sa i ete e ki lenpak i pou annan lo sa group pli vilnerab nou popilasyon.

Minis in dir ki i pe reviz *weights* ki ganny servi pou kalkil lasistans aköz zot in rekonnnet logmantasyon dan pri komodite. Zot bezwen fer li aköz zot realize ki zot pe tro sere e pe fer dimoun ki dan bezwen soufer.

Parkont Mr Speaker revizyon *weights* pa pou fer okenn gran diferans si Gouvernman pa adres sa kalite birokrasi ki'n etabli kot sa Lazans depi en pe letan. Sa kantite papye dokiman ki en dimoun i bezwen prezante.

Sa ta letour *Babylon* ki ou bezwen al fer, zis pou ganny en led tanporer, i fer bokou dekouraze. Zot santi ki zot dignite pe ganny abese. Ou a krwar i en pese pou mizer ouswa pou napa.

Kot sa menm Lazans ki zer servis swen domisil ouswa *home care* parey nou dir, ankor birokrasi avek mank konpasyon in anzandre. E la mon pa pe refer lo bann *staff* me plito lo bann direktiv ki ganny donner. *Home Carers* pe ganny demande pour swazir ant zot louvraz *home care* ek en lot

pti louvraz ki zot fer par kote apre zot ler pou aziste zot saler.

Ennler ou a krwar dan plas tir labi kot i annan tou dimoun i ganny pini e zot dignite abese! E la bokou pe demande oli sa logmantasyon saler ki zot, zot ti promet?

Mr Speaker sekter sosyal i enn ki annan en lyen tre pros avek sekter lasante. Annefe en bon sistenm lasante i garanti mwens depans dan sekter sosyal. Dan la mezir ki Bidze in permet, Gouvernman *United Seychelles* in toultan asir sipor finansyel adekwa pour Minister e servis lasante.

Ki swa pour latizann, tretman isi Sesel e aletranze e menm devlopman ek reminerasyon bann travayer dan lasante.

Mr Speaker dan son ladres Minis in koz fortman lo swen spesyalize pou bann pasyans dyaliz. Tou Seselwa i ava rapel ki Prezidan ti fer deklarasyon lo lefe ki in swadizan avek sikse negosye, e ganny en rediksyon dan kou ki sa lakonpanyen pe sarze par pasyan pou dyaliz.

Parkont Mr Speaker Minis i dir nou ki i tre o e pa'n donn detay benefis ki nou'n gannyen ek sa negosyasyon. Ler Minis i dir zot bezwen revwar sa servis. Eski bann pasyan i annan

rezon pou enkyet lo la kalite servis ki zot pou resevwar?

Mon osi dezapwente pou pa tann okenn mansyon lo *COVID allowance* ki bann travayer lasante i sipoze gannyen me ki zot pa ankor tann ni van ni nouvel! Minis pa'n koz ditou osi lo zerans *COVID Fund*. E la ankor nou konpran ki in annan depans signifikan a pepre 3milyon pou *cater* pou loperasyon en o zofisye Minister Lasante.

Bann travayer Lasante i dezapwente avek sa ladministrasyon. Ler zot ti dan Lopozisyon in annan bokou promes ki'n ganny fer. Ozordi sa Bidze pa adres ouswa donn gran lespwar travayer lasante.

Parey mon'n mansyonnen o konmansman mon ladres Mr Speaker, mon ti ava kontan retourn lo sa size lozman pou nou pep. En size ki preokip bokou nou bann dimoun. Apre 43an ki nou'n dan Gouvernman, enn parmi nou bann gran akonplisman se dan domenn lozman.

Ozordi bokou Seselwa i propriyeter zot prop lakaz gras a en Polisi kler, kot bezwen en fanmir in touzour par lao son abilite finansyel imedyat. Atraver finansman direk dan Bidze, bann *Schemes* ki'n ganny met an plas e osi avek led



bann pei zanmi, nou'n konstri de milye lakaz, e nou'n fasilite konstriksyon par bann endividi. Bann lakaz a en standar tre eleve.

Annefe Mr Speaker later ek lozman in touzour en pwen tre for dan bann Bidze oparavan. Mon sagrinen pou ekout deklarasyon Minis ki dan Bidze 2022 Gouvernman in fer provizyon pou konstri Selman 37 lakaz.

Ou ki'n azour avek ou kontribisyon *Home Savings Scheme* avek lespwar ki tre byento ou pou vin propriyeter ou prop lakaz, mon kapab konpran ou dezapwentman ek lenkyetid. Sa Bidze pa donn ou okenn lespwar. E la mon pe mazin bann zabitan mon prop Distrik Plaisance.

Si lot lannen pe konstri zis 37 lakaz, kan ki zot pou devlop Murray Estate avek re devlop *Société du Logement*? Fitir i vreman sonm ser frer zabitan mon distrik. Pli enkyetan ankor se lanons ki Gouvernman in fer pour konstri selman *low cost housing*. Sa ti osi ganny dir isi dan nou Lasanble par Onorab *Leader Biznes* Gouvernman.

Mr Speaker 45an apre nou lendepandans, sa zistans ki nou'n arive ozordi, en Gouvernman ki sipoze annan nouvo nide ek fason fer, i

propoz ek Seselwa *low cost housing*. Sa pa akseptab an 2021. In ganny dir ki Gouvernman i bezwen revwar kalite ek standar lakaz ki i konstri pour redwir lo kou!

Eski nou pe dir zot pe al donn pep lakaz an tol, *cement board*? Nou pa konnen! Napa gran leksplikasyon ki'n ganny donner par Gouvernman lo sa size. Sa ki'n ganny son zoli lakaz lo Perseverans, Roche Caiman ek bann lezot *estates* dan bann lezot distrik, pran swen avek zot lakaz.

Mon per ki nou pa pou vwar ankor lakaz koumsa, tan ki sa Gouvernman kapitalis i kontinyen *run border*! Deklarasyon in osi ganny fer lo size later *land bank*.

Ankor parey konstriksyon lakaz nou Gouvernman *United Seychelles* diran 43an in idantifye e ouver de milye kare later *land bank* ekipe avek lenfrastruktir ek litilite. Bann kare later ki ti met a dispozisyon nou bann sitwayen a en pri tre afordab, i ozordi vo milyon. Se koumsa ki nou'n kre larises e elev nivo lavi nou pep.

Ou konnen Mr Speaker, mon manman ek mon papa pa'n erit okenn later ek zot paran akoz zot ti napa. Ozordi mon manman i kapab kit deryer en pti leritaz pour son bann

zanfan. Nou osi nou ava kapab kre larises zenerasyonnel. Sa i aplikab ozordi pou bokou fanmir Seselwa.

I enportan ki Gouvernman i kontinyen ouver bann kare later e donn loportinite Seselwa pou annan zot prop later. Me, apart en rediksyon minim lo lentere par *Nouvobanq* ki ava permet serten profesyonnel aste en *condo*, napa gran linisyativ dan sa Bidze.

Avek kou konstriksyon eleve, an 2022 sa ki pe al konmans konstriksyon son lakaz pou war li tre difisil. En nouvo Gouvernman ki napa nouvo linisyativ. Mon ti ava swete ki dan sa Bidze ti ava annan *incentives* ouswa *Scheme* menm si i tanporer, ki pou ed sa fanmir ki pe al aste en bal siman R180. Savedir sa si i gannyen aköz siman in vin en msye tou dernyerman Sesel.

Program l'investisman kapital pou 2022 i a en sonm R1.5bilyon, e plis ki lanmwaye sa sonm i pou ganny finanse atraver bann don ek *loan*. Nou ava rapel ki dan revi bidzeter milye lannen 2021, ler ki Minis ti anons bann *budget cuts* ki ti konstitye sa swadizan *savings*, an grann parti sete bann koupir proze kapital.

Sa i konfirmen par lefe ki an 2021 *Capital Project Grant* ti

sipoze R578milyon me parkont, selman apepre 75milyon ki ti materialize. Ankor pour 2022 en sonm 614milyon in ganny prozekte dan Bidze. Pli gran lenkyetid se eski sa bann don pou materyalize? Eski nou pa pou war menm senaryo sa lannen kot mazorite proze i ganny kennsel.

Eski sa nouvo Lazans ki son Lalwa fek aprouve semenn pase in pare pour pran sarz sa bann proze? An prenon kont ki an se moman bann demars striktirel e administrative sa Lazans pa ankor finalize.

Mr Speaker Gouvernman i pli gro kliyan pou sekter prive e bokou i depan an grann parti lo loportinite ki Bidze i prezante pour fer biznes.

Bidze	Kapital
-------	---------

Gouvernman i enportan pour ede asir krwasans dan serten sekter nou lekonomi, prensipalman sekter konstriksyon.

E la mon anvi fer resorti ki i annan en labsans remarkab mansyon 3 gro proze ki'n lo *drawing board* pour en pe letan. E sa se konstriksyon *Government House*, en nouvo Kordgard pli modern ek batiman pour Lofis *Attorney Zeneral* lo *L'île Du Port*.

Tou le 3 ti pou ganny finanse atraver don par

Gouvernman *L'Inde*. Ki'n arive avek sa bann proze? Mon vwar en alokasyon dan *PSIP*, me eski pour materialize ouswa in ganny mete zis akoz ofisyelman e diplomatikman sa don i ekziste?

Minis dan son ladres in osi anonse ki Gouvernman in antre an partenarya avek *GICC* pour konstri en batiman pour Komisyon Reveni. Mr Speaker ler Minis ti anons sa, mon'n ekout en kou. Be pa sanmenm sa Lopozisyon ki ti pe vann en tiket sanzman ki ti kritik sa model?

Annefe Batiman *Independence House Annex* si mon memwar i servi mwan byen in ganny konstri an servan menm model. Zot ti kritike sa. Kwa ki fer sa model *sexy* en sel kou?

Konstriksyon *condo* pour profesyonnel, renovasyon batiman libreri. Be sa dan Lasanble 15 lo 10 pa ti le tann parle. Oli *PPP framework*? Oli Lalwa *PPP*? Sa i enn bann Lalwa ki devret devan nou Lasanble pli vit posib.

Mr Speaker sekter lapes i enn ki tre enportan pour nou lekonomi e annefe mon krwar ki nou pe souzestim son kontribisyon total nou lekonomi. Se pour sa rezon ki sa lendistri i bezwen reste

soutenab. Bokou proze in ganny anonse pou ganny fer pandan lannen 2022 dan bann diferan distrik kot i annan bann kominote lapes.

Me sa ki osi enportan se en diskisyon avek sa bann kominote peser ek zot bann lasosyasyon lo en plan long term, pou zer sa bann lenfrastruktir. Lakominote peser i bezwen annan zot lapartenans pour zer sa bann fasilite.

An menm tan Mr Speaker ler nou pe koz lo soustenabilite sa sekter, nou bezwen osi konsyan ki plis fasilite i ede pour ogmant zefor dan sa sekter, e sa i kapab met bokou presyon lo bann stok pwason ki deza anba bokou presyon.

Konman en manm *Fisheries Transparency Initiative Group* nou'n ganny en apersi leta serten stok pwason dan nou delo. Pa tou ki soutenab. Gouvernman in pronons li lo lenportans sa sekter me parey Angle i dir zot in *fall short* lo linisyativ. Tou sa ki zot pe koz lo la labous plen, se bann linisyativ ansyen Gouvernman.

Mon ti ava pli vo mye tande dan sa diskour ki *SFA* pour entrodwir nouvo aktivite pour eksplwatasyon nou resours maren pour tir presyon lo lapes pwason fon. Diversifye

sa sou sektè artizanal ki dan en mwayen nou kapab agrandi revni me osi vin pli soutenab dan nou bann fason fer.

Lagrikiltir in ganny dekrir par sa nouvo ladministrasyon konman en sektè tre enportan pour relans devlopman ekonomik. E sa pandemik COVID-19 in montre nou lenportans sa sektè pou en pti pei parey Sesel ki izole avek larestan bann gran pei prodikter agrikol.

Malerezman konteni ladres Bidze, i pa donn bokou lespwar sa sektè pou sa kalite transformasyon ki zot pe koz lo la. Dan ladres i annan bokou referans lo kwa ki nou bezwen fer;- fer isi, fer laba. Me i mank me i mank bann *statement* konkret lo kwa ki Gouvernman pou fer pou siport sa sektè pour atenn sa bann lobzektif.

Avek sa desizyon tou resaman pour aboli Lazans Lagrikiltir e santraliz tou pouvwar anba en Minister, mon napa gran lespwar. Menm an dizon sa mon priye ki mon mal e ki sa sektè i kontinyen grandi avek zefor bann prodikter, menm si lentervansyon Gouvernman i minimonm.

Mr Speaker kontribisyon bann lezot sektè dan lekonomi tel koman sektè teknolozi lenformasyon, sektè nimerik

ouswa *digital* e sektè telekominikasyon i tre enportan akoz zot sa katalis pou devlopman bann lezot sektè. Si nou anvi avans devlopman dan ledikasyon e dan lasante, nou bezwen sorti dan bann metod konvansyonnel e entegre plis teknolozi.

Teknolozi dan lasante i ava fer ki nou ava kapab ogmant nou abilite pou detekte maladi pli boner, amelyor tretman e travay lo bann metod prevansyon avek plis lefikasite.

Teknolozi dan ledikasyon i ava ede pou amelyor metod laprantisaz, retir fardo lo nou bann *teachers* ki deza annan bokou pou fer e donn nou bann zanfan en loportinite pou devlop zot potansyel;- e donn zot tou loportinite pour vin inovativ e konpetitiv fas avek en lemonn ki pe vin deplizanpli global an servan teknolozi nimerik.

Gouvernman ozordi, e menm ler zot ti dan Lopoziyon in koz bokou lo la, me oli plan? Kwa ki pe ganny fer diferan pour par egzanp redwir pri *internet*, redwir kou telekominikasyon e anmenn plis bann servis finansyer pou nou pep, atraver bann prodwi telekominikasyon. Koze sanzman ti prometan.

Me aksyon apre 1an ek en Bidze ki'n ganny prepare antyerman par Gouvernman *LDS* i pa montre gran lespwar. Sekter pti e mwayen biznes in osi size bokou kritik dan lepase malgre lakantite zefor ki Gouvernman oparavan ti mete dan devlopman sa sekter.

An gran mazorite se zot ki kre larises pou nou lekonomi e nou pep. Zot konstitye apepre 75poursan biznes Sesel. Ozordi si ou koz avek bokou bann pti e mwayen antrepriz, enn bann pli gro konsern se akse avek kapital. Malgre zefor pou redwir lentere, bokou i ganny tourn an ron avek bann lenstitisyon finansyel.

Zot ankor ganny difikilte garanti ki labank i demann zot, e sa i pour bokou bann nouvo biznes dan bann domenn emerzan. I ankor annan en retisans par bann lenstitisyon finansyel pour pran risk. Se la kot Gouvernman konman fasiliter i bezwen rantre pou siport sa bann nide enovan.

Tro bokou fwa *focus* i lo bann keksoz lepase san get sa pli gro portre. Si in annan defayans dan serten lenstans dan alokasyon later par egzanp, annou koriz li e annou bouze.

Sekter biznes i bezwen sipor ek loportinite e non pa en gouvrenans ki kontinyen

plenny sa ki pann marse dan lepase.

Mr Speaker en lot bann pli gran dezapwentman Bidze 2022 se sa silans remarkab konsernan koripsyon. Apre sa ta tapaz ki *LDS* in fer ler zot ti dan Lopozisyon konsernan koripsyon, ladres Minis pa dir en mo lo la. Ou a krwar dezir pour rod sa \$50milyon e kler tors 15 batri lo bann lezot ka in nepli la.

Bann ki'n vot pou zot pe plennyen ozordi e pe siply zot pour pran aksyon. Bokou koze i kontinyen ganny koze me 0 aksyon. Sepourtan tou resours ek masin Gouvernman i dan zot laporte. Zot annan ozordi tou sa posibilite pou dil ek sa. Sa zafer koripsyon ti zot seval batay pandan bokou lannen.

Bokou ti ganny akize konman bann voler e koronpi. Mr Speaker pandan sa 1an ki noun war? Bokou sa bann non se bann menm dimoun ki afilye avek politisyen dan Gouvernman *LDS*. Eski *LDS* ti serye ler ti rod ou sipor e ou ti fer li konfyans pour li dil avek koripsyon?

Zis mazine resaman lalwa deklarasyon bann byen in ganny amande, pour retir nesosite konzwen ek zanfan politisyen pou deklar zot byen.

Si sa pa en sir konkret ki zot pa serye. Mon pa konnen mwan. Mr Speaker sa pep Seselwa, avek tou fransiz mon dezapwente avek sa Bidze 2022 prepare e delivre antyerman par sa nouvo Gouvernman ki ti fer en pake promes.

Lannen pase zot ti dir sa Bidze pa ti zot bidze e ki sa lannen pep pou war en meyer bidze. Mon pa dezapwente zis akoz mon dan Lopoziyon, me akoz sa Bidze i mank zepis. I plat! I mank kreasyon loportinite pou relans nou lekonomi apre sa moman difisil ki COVID-19 in met nou ladan.

I sifi zis konman en endividi regard sa sekter ki ou ladan, rod sa morso Bidze ki koz lo sa sekter, fer en legzanmen konsyans e dir ek ou lekor si ou krwar i ase e si ou pou bouze ek sa ki'n ganny anonse?

Mr Speaker dan dernyen parti mon ladres mon oule koz en pti pe lo bann siksesiv Bidze depi 2009 an bref ziska 2019, apre ki nou Gouvernman ti'n antreprann en program reform ekonomik. Annefe Onorab Georges atraver ou Mr Speaker, li menm dan son lentervansyon in fer en somer lo sa ki mon anv i koz lo la.

In fer referans ek Bidze 2019 konman en Bidze ki ti met

resours me *still* i ti deside vot kont, menm si in rekonnèt ki ti bon. Apre i akiz nou konman en lopoziyon ki zis vote kont. Kwa ki'n souliny nou bann Bidze pandan sa bann letan?

Anmezir ki nou lekonomi in fer byen, nou'n akimil sirplis noun pas benefis ek pep Seselwa. Dabor mwayenn sirplis bidzeter pandan sa period ti anviron 2.5poursan. Sa in fer li posib pou nou ogmant reserve deviz etranzer pei ziska plis ki \$500milyon.

Pandan sa menm peryod nou'n ogmant saler travayer servis piblik e noun osi revwar saler *minimum*. Nou'n osi revwar bokou bann *Schemes of Service* dan sekter piblik, ki'n fer ki bokou travayer in war zot total *take home pay* ogmante.

Nou'n progresivman fer monte pansyon, retrait, nou'n entrodwir trezyenm mwan saler e osi entrodwi *long service allowance* pou bann travayer kin fer bokou letan dan servis piblik. Bann aksyon konkret pou met larzan dan pos Seselwa e non pa zis koz dan vid!

Nou'n osi met resours finansyel dan bann Bidze pour fasilite lenvestisman bann biznes, e sa in vin konman en loksizenn dan lekonomi. Rezilta se sa performans ekonomik ki nou ti rikorde and 2019.

**MR SPEAKER**

30 minit Onorab.

**HON WALLACE COSGROW**

Mersi Mr Speaker. Si ou pa krwar mon ou kapab krwar Onorab Georges akoz li osi in dir Bidze 2019 ti enn ki ti annan bokou larzan.

Si nou osi regard prodwi domestik brit par tet dabitan pandan sa peryod, nou pou war ki in kontinyen ogmante. Sa i siny ki lekonomi sa pei in performan dan sa peryod.

Alors eski sa portre ki pei in mal ganny zere ki Gouvernman ozordi pe penn i enn ki real ouswa i zis en manev pour maske zot inabilite pou *être* inovativ, zot lenkonpetans pou *deliver* lo zot bann promes? Seselwa ozordi an 2021 i en pep matir e entelizan e kapab fer zot prop analiz kan zot ganny prezante avek bann fe.

Ser frer Seselwa bann fe i la! Lenformasyon i la! Bidze 2022 pa prezant okenn gran loportinite pour fer ni menm en kar sa bann lakonplisman ki monn koz lo la.

An konklizyon Mr Speaker Seselwa pou bezwen soufer ankor lan, pour petet rekipere pli tar e sa si sa promes ki pe ganny fer i senser. Me si bann promes *LDS* lepase i sa bar ki

nou pe mezir zot performans lo la, alors mon napa gran lespwar. Sel lespwar pour Sesel e pep Seselwa, se en nouvo Gouvernman formen par *United Seychelles* an 2025.

Nou pou re fer Sesel fyer! Nou pou retourn konfyans pep Seselwa dan son Gouvernman, e retourn sesel lo sa semen devlopman kot nou ti kite an 2020! Seselwa, konmans *look forward* pou en Gouvernman pli performan an 2025. En Gouvernman *United Seychelles*, parske sa enn ki la, i pou retourn dan Lopozisyon. Mersi Mr Speaker.

**(APPLAUSE)**

**MR SPEAKER**

Mersi Onorab. Nou a ekout Onorab Clifford Andre.

**HON CLIFFORD ANDRE**

Mersi Mr Speaker. Bonzour Mr Speaker. Bonzour Minis. Bonzour koleg Onorab. En bonzour spesyal pou zabitan Anse Aux Pins.

Mr Speaker lentervansyon avan mwan in fer serten alegasyon oubyen in met devan pep Seselwa serten komanter ki nesesit en pe rektifikasyon. Si ozordi Mr Speaker dan Lasanble i annan en mazorite *LDS* e Prezidan Ramkalawan

avek son *Cabinet* i en *Cabinet* e Prezidan *LDS* se akoz mazorite pep Seselwa in swazir *LDS* pou diriz sa pei!

E in fer sa Mr Speaker akoz in vwar ki *US* pa ti pe kapab anmenn sa pei pli devan, e in annan bokou sityasyon ki'n arive anba sa Gouvernman, e alors *LDS* ki *rule border* ozordi. Mr Speaker letan mon'n ekout serten lentervansyon oubyen repons Bidze in ganny dir ki napa en tenm pou Bidze.

Me mwan mon dir sa Bidze i annan en tenm. E mon komans koumsa "fer plis avek mwens." Minis in vini in dir nou ki mannyer Sesel ti ete avan ki ladministrasyon *LDS* i pran e kote i annan en plan pou anmenn sa pei pli devan.

Mr Speaker mon oule fer sorti ki dan *manifesto LDS* eleksyon zeneral paz 36 i dir koumsa;

*"Keeping constituents informed of Government business. The Seventh National Assembly with an LDS Majority must be as forceful in raising questions about Government policies and actions as they were in the Opposition. Questions are meant to put information in front of the people of Seychelles."*

Mr Speaker mon dir sa akoz letan atraver ou, Onorab

Pillay ti fer son repons i ti dir ki nou vin dan Lasanble zis pou nou *rubber stamp* oubyen dir ki tou keksoz i byen.

E mwan mon oule fer sir mon oule dir li ki sa i pa leka, akoz mwan mon enn bann dimoun atraver mon bann zabitan ki'n elekte mwan Anse Aux Pins, mon met bann konsern relevan dan en fason ordonnen, diplomatik pour ki i ganny pran an konsiderasyon oubyen i ganny evalye.

Letan nou koz lo koripsyon Mr Speaker, i kler ki koripsyon i reste en eleman enportan ki ozordi nou pep i koz lo la. Menm *US*. Nou fek tann Onorab Cosgrow in koz lo en pwen ki wi letan nou ti dan Lopoziyon nou ti dir ki nou ti pou fer en fason pou nou rod sa \$50milyon ki'n perdi.

Onorab Pillay letan ki *Chair FPAC* in dir a zot vwar dan sa Lasanble ki i pou al rode. Me selman nou pa ankor war li i pa ankor vin e okenn rapor. Alors eski i pe fer sa travay oubyen non?

Me selman mwan ki mon pou dir i enportan ki nou pep i konpran ki en travay sitan kompleks koumsa ek bann *mastermind* ki ti par deryer, ki'n mazin tre byen ki i pou annan en evantyalite kot pou annan en sanzman Gouvernman e ki'n fer



li osi difisil pou kapab trouve kot sa i ete e ki mannyer in ganny manipile.

Me selman mon kapab dir avek pep Seselwa ki Gouvernman LDS pa pe dormi lo sa dosye. Kwa ki enportan ki nou kontinyelman edik nou pep oubyen pas lenformasyon pou fer zot konnen.

Mr Speaker mon ti a kontan letan Minis i fer son repons i eksplik pep Seselwa oubyen enform pep Seselwa, lo ki pe arive avek sa R80milyon ki ti disparet kot SBFA ki osi in fer ki SBFA ozordi in fermen?

Mon okouran ki i annan serten devlopman, me selman sa ti a bon kekfwa ki Minis i enform pep Seselwa aköz pep Seselwa pa konnen e alors zot kontinyelman demann kestyon. I enportan note ki dan mon distrik Anse Aux Pins, Ile Soleil i en size ki so ozordi avek en mirad *malpractice* ki'n arive laba.

Ankor enn fwa nou'n vin devan medya Prezidan in al vizit *Ile Soleil* - mwan mon'n vizit *Ile Soleil* avek Minis Vidot, nou'n vwar bann sityasyon. I enportan ki pep Seselwa i ganny mentenir okouran ki pe pase, aköz nou ti dir nou pou *tackle* koripsyon e nou pe *tackle* koripsyon. Me selman nou

bezwen enform nou pep kote nou ete e ki pe arive.

Pa tou keksoz ki devan Lakour ki nou kapab anmennen, me selman sa ki nou kapab *disclose* avek pep Seselwa silvouple *disclose*. Mon krwar dan sa konteks Mr Speaker SBC i annan en rol enportan pou li zwe.

I ganny donnen lalis bann *case* ki pas ankor e SBC i bezwen fer son devwar pou li fer sir ki i get sa bann *case* ki pe pase. E i osi anmenn sa a latansyon pep Seselwa. Aköz i en Medya Nasyonal ki li i sipoze fer sir ki nou pep i okouran ki pe pase dan nou pei.

Mr Speaker in annan koze lo sa sityasyon kot GICC pou fer bann *condominiums* e i pou annan bann program, *Schemes* ki'n ganny met an plas avek *Nouvobanq*. Mon konsernen avek sa Mr Speaker e mon pou dir an servan paz 36 dan nou *manifesto* pou mwan eksprim sa konsern la avek Minis.

Minis sey dir avek pep Seselwa si i annan okenn konsesyon spesyal ki ganny donnen avek GICC pour ki li i kapab fer konstriksyon a en pri ki abordab. Mon kontan ki bann dimoun i kapab ganny lakaz a en pri abordab.

Me selman aköz ki lezot pa kapab fer parey? Mon okouran ki i annan ki pou koz apre mwan posibleman zot pou dir ki i annan serten kontrakter i pa delivre. Me si i pa delivre pran aksyon avek li.

Pa pini tou aköz enn oubyen 2 oubyen 10 pa delivre. Aköz nou bezwen fer sir lezot kontrakter Seselwa i kapab benefisye avek sa gato. Si gato pe kwi, si i annan lakrenm lo la zot osi zot bezwen kapab ganny en bout. I enportan. I pa kapab zis en pti bout, en pti git detrwa ki ganny par sa gato.

Letan mon koz koumsa pa vedir ki mon pa byen avek ban dimoun ki responsab *GICC*. Non. *Far from it Mr Speaker!* Mon koz avek tou dimoun. mon byen ek tou dimoun, mon konpran tou dimoun. Selman i enportan ki serten laspe i ganny met devan pou pran konsiderasyon bann lezot dimoun.

Mr Speaker lot pwen se Fon Pansyon, laz retret;- laz retret sorti 63an pou vin 65an Mr Speaker mon annan konsern lo la. Nou'n annan en rankont Vandredi letan nou'n fini Mr Speaker kot mon'n diskrit sa size e mon krwar ki en dimoun parey Onorab Cosgrow in dir i planifye son retret.

i annan letan i pe kontribye dan Fon Pansyon avek bi ki letan i ariv 63an - i annan ki pe travay kot *IOT*.

Avek bi ki letan zot ariv 63an Mr Speaker zot pou pran zot retret. Zot zenou in fermal. Zot leren in fermal, zot nepli kapab travay. Zot a kapab fer en pti keksoz kot lakour, oubyen en pti biznes si zot annan pou fer kot lakour, me selman pou zot al fer sa gro travay i en pe difisil.

Mr Speaker en kestyon ki mwan mon pou demande, si ou dir avek mwan fer mon kontribisyon e mon sipoze ganny en serten sonm larzan letan mon ariv en serten laz, ki dan sa konteks 63an - kote mon larzan in ale? Sa larzan ki mon'n kontribye Mr Speaker nou bezwen dir avek sa bann dimoun kote sa larzan in ale.

Ozordi ki leksplikasyon nou pe donnen, se ki dimoun 'pe viv pli lontan e zot pe mor pli aze. Mon reste konvenki avek sa statistik Mr Speaker. Mon'n demann sa lenformasyon. Annefe la i e lot landrwa kot mon krwar bann Departman Gouvernman Minis, i bezwen pli proactive, aköz ler mon'n demann sa lenformasyon zot dir ek mwan nenk dan en semenn ki mon pou ganny sa.

Mon annan 3 zour pou mwan reponn ou. Mon pa kapab vin avek. Mon pe dir sa aköz mon pa kapab vini pou dir ki poudir laz ki dimoun i viv in sorti en laz in desann, oubyen in monte. Kekfwa Gouvernman i annan sa statistik, be mwan mon pa kapab donn sa statistik aköz letan mon'n demande mon pa'n gannyen dan en semenn.

So, i ankor annan bann landrwa kot nou bezwen fer sir ki si nou annan sa lenformasyon. Aköz si Gouvernman in gannyen i bezwen en landrwa.

E mwan mon'n rod li dan landrwa apropiye, sa lenformasyon ki mon'n ganny dir se sa. Mon pe pas sa pou nou rod en fason ki mannyer nou fer en lenformasyon i a laporte tou dimoun.

Mr Speaker mon krwar i annan bann lot mezir ki nou kapab get ladan, se ki nou kantite larzan ki nou donn en dimoun ki pe pran son pansyon.

Aköz sa i a fer ki Fon Pansyon i a pli kapab zer sa larzan e i a kapab kalkile pou li fer sir ki zenerasyon sa larzan ki la ki dimoun in peye, ki nou pa ava war nou ankor dan 2an pe vini pe dir nou pe sorti 65an nou pe al fer 67an, oubyen nou ep al 70an.

I enportan ki pep Seselwa ki'n fer son kontribisyon i ganny en *account*, en kontrandi lo ki mannyer serten keksoz ki'n ganny fer. Aköz si in annan *malpractice* dan sa sekter Mr Speaker, mon ti a demann Minis pou enform pep Seselwa.

Mwan osi mon ankor konfize lo sa size. E mon pe sey rod lenformasyon. Mon'n travay lo la. I annan dimoun ki pe ganny bokou larzan avek Fon Pansyon. I annan ki ganny plis posibleman ki letan i ti pe travay. Ki mannyer i kalkile mon pa konnen mon bezwen al rod sa kalkilasyon ki mannyer i ganny fer.

So Mr Speaker mon senpatiz avek bann dimoun me mon pou dir zot poudir mwan mon enn bann ki pou siport zot, pou fer sir ki nou annan en fason sistematik pou nou fer sa arive.

En lot *proposal* ki mon ti a kontan, Minis i eksplere oubyen *Cabinet* i eksplere, se ki eski napa posibilite ki nou tir sa responsabilite avek Gouvernman? Pou fer Fon Pansyon vin en keksoz prive parey i annan Lerop. Nou annan en *Private Pension Fund*.

Prezan si Clifford Andre li i anvi pey R2000 dan son *Scheme* Fon Pansyon, ki li apre tan letan, tel laz i pou ganny tan

larzan i ava fer. Si par konsekans Onorab Hoareau i anvi kontribye R1000 i a konnen lo sa *Scheme* R1000 tan letan, tan larzan, tel laz, letan i pran son retreat.

Eski napa sa posibilite pou eksplore ki i a tir sa presyon akoz ozordi tou dimoun pe fer en kontribisyon mandatwar. E se li ki pe fer sa kontribisyon mandatwar, li avek son anplwayer. Alors i bezwen annan en lot fason pou nou kapab get sa e pou nou eksplore.

E sa konsiltasyon ki Onorab Cosgrow in dir, mon krwar i en bon keksoz e nou bezwen fer li dan en fason sistematik kot bann kontribisyon parey sa enn ki mon pe donner, kekfwa i annan dimoun ki annan bann ki pli bon dan zot kontribisyon, ki pou mon nou ava ekoute, nou ava eksplore, nou ava get ki manner sa i kapab ganny fer.

Mr Speaker nou vin lo lakaz, Anse Aux Pins nou lalis lakaz, mon krwar i premye. Mr Speaker dan 10 dimoun i mon vwar dan klinik 9 i annan problemn lakaz i zis enn ki vin dir mwan en lot sityasyon.

37 lakaz pou lantenn 2022 i afordabilite Gouvernman Sesel ozordi. Me selman sa sityasyon lakaz i reste enn ki

pertinan. Mr Speaker a sa pwen mon oule fer resorti ki Onorab Cosgrow atraver ou, in dir avek nou ki pour bann lide ki sekter lapas pe pran se bann lide ki ansyen Gouvernman i ti annan.

Be selman i pa dir nou kwa ki pa dir ek pep Seselwa problemn lakaz se bann problemn ki ansyen Gouvernman ki'n kree, se pa Gouvernman aktyel!

Nou'n *inherit* sa problemn nou bezwen rod en fason pou rezourd li. Nou ti ganny dir dan lepase 3mil lakaz pou ganny fer ziska ozordi ni enn dan sa 3mil nou pa ankor gannyen Mr Speaker.

E pep Seselwa letan ti ganny dir i annan 3mil lakaz pou fer, bokou zot lespwar zot lekspektasyon ti'n monte akoz zot ti anba lenpresyon ki poudir pandan sa letan zot osi zot problemn lozman pou ganny rezourd, akoz zot ti krwar dan sa ki i ti pe ganny met devan.

Ozordi Gouvernman *LDS* pe dir nou pou fer 37 lakaz. Mwan osi mon konsernen, me selman i pe dir akoz se sa ki i annan mwayen pou li fer. I pa pe promet ou poudir i pou fer 3mil lakaz oubyen 5mil lakaz lannen prosenn, apre i pa kapab e delivre e i pe dir ou i pou fer 37.

E sa 37 Mr Speaker nou a demann Minis pou koz avek Minis Lakaz pour ki mon kapab ganny *I mean* Anse Aux Pins pa mwan, Anse Aux Pins i a kapab ganny 20 apre lezot nou partaz avek bann lezot distrik koumsa nou a kapab fer sa lalis lakaz Anse Aux Pins desann pou nou kapab asiste nou bann zabitan Anse Aux Pins ki annan sa problemn.

Mr Speaker mon ti a kontan a sa pwen remersi Minister Gouvernman Lokal. Mr Speaker Anse Aux Pins nou'n war nou avek, nou ti annan nou en *playground* e sityasyon in al Ankour kot Lakour in ordonnen ki sa dimoun i bezwen ganny rann son later.

Bokou enkli bann Ansyen Manm Parlman ki'n deservi Anse Aux Pins zot dir ki mwan, mon pa pe *maintain* sa *playground*. Mr Speaker mon ti a kontan fer kler avek tou dimoun ki poudir sa *playground* pa pou Gouvernman.

Alors nou pa kapab *maintain* en keksoz ki pou prive. In ganny rann avek son propriyeter. Me selman mon oule remersi parey mon'n dir *Local Government* akoz zot in dakor pou zot donn nou sa bout devan Ladministrasyon Distrik.

E mon'n fini negosye pou nou ganny bann zouzou ki nou ava met ladan pou benefisyen nou bann zenn zanfan, nou bann zanfan Anse Aux Pins. Zot ava ganny en landrwa pou zot ale pou zot al defoul en pti git, pou zot kapab zwe e fer en pti pe kriye. Akoz la i pou annan sa *playground* ki nou pe antisipe pandan sa lannen 2022 nou pou konplete, e nou ava fer zot kado sa *playground*.

Mon ti a kontan selman dir Mr Speaker ki nou annan lezot landrwa. nou ti annan en *playground* ki *Eden Island* ti'n *sponsor* anndan kot Chetty Flat. Sey demann bann zabitan silvouple servi sa bann fasilite avek respe, akoz se zot ki benefisyen, se zot zanfan ki benefisyen. Alors se zot ki bezwen pran swen avek sa bann fasilite.

Mr Speaker dan Bidze 2022 mon vwar ki Gouvernman in pran o serye sa problemn trafik ki nou annan dan les, dan sid an pasan par Anse Aux Pins, Pointe Larue pou nou ariv anvil.

E in met dan Bidze larzan pour ki nou ava annan en lot *lane* ki a omwen konsider ki mannyer nou kapab pez sa problemn, ki bokou lannen nou'n vin dan sa Lasanble menm - pa zis mwan, en kantite

nou in koz lo la - akoz parler si nou bezwen ariv kot Lasanble 9er nou bezwen kit kot nou 6er bomaten.

Akoz si nou kit en pti pe pli tar nou ganny trafik ki fer ki si nou pe al fer en lot keksoz i fer ki nou an retar. Alors nou bezwen dir avek pep Seselwa poudir ki Gouvernman LDS pa'n mazin zis son Gouvernman li, in mazin pep Seselwa. Onorab Gabriel mon sir ou pou kontan akoz ou pou vwar en amelyorasyon letan keksoz i pase dan Pointe Larue.

E sa osi i pou pran konsiderasyon sa ban problem delo, *over flooding* ki arive letan lapli i tonbe. Akoz letan sa semen i ganny fer pou annan son laspe drenaz ki pou kontinyen al ansanm avek sa.

Alors konsiderasyon pe ganny pran par sa Gouvernman pou fer sir ki bann problem ki nou'n *inherit from the previous administration*, pe ganny *tackled*. Me nou pa kapab fer tou en sel kou. Sa mon krwar tou nou siporter e enkli bann siporter *US* zot konpran i pa tou ki kapab ganny fer en sel kou.

Mr Speaker enn bann keksoz ki mon ti a kontan dir se rapor ki mwan koman *MNA Anse Aux Pins* mon annan avek Minis Lenvestisman, mon salye li, mon remersye li pou sa

lantant ki nou annan. Napa enn fwa ki mon pran kontak ek li ki i pa'n reponn mon telefonn, oubyen si i pa kapab ki i pa'n *re call* mwan pli tar.

Me dan sa konteks mon ti a kontan dir ki letan nou pe travay lo *Ease of doing business* Mr Speaker ki i annan, Minis in koz lo la, nou pa get *Ease of doing business* zis pou etranze. Nou get sa *Ease of doing business* osi pou sa Seselwa.

Enn bann konteks ki mwan mon ti a kontan dir se letan bann pti, bann dimoun ki annan lakaz si oule son zanfan kekfwa in al etidye, i santi i annan en lasanm ki i kapab lwe avek touris, e lasanm i *very nice*. Me i annan bann standar ki ganny mete ki dir ou fodre ou annan en lasanm 8met ou 6met, ou fasilite twalet fodre i 3met lo 4met.

E sa Mr Speaker i pe anpes Sesel ganny en pe reveni! Akoz sa Seselwa ki kapab lwe son lakaz, definitivman annou fer Minister Touris oubyen lekel Departman Lasante zot al vizite, zot gete. Akoz sa touris i annan dimoun ki'n vin koz ek mwan ki dir mwan touris letan i koz ek zot i dir zot be mwan pa en zean mwan, akoz mon bezwen dormi dan sa grander lasanm?

E sa Mr Speaker i osi fer ki sa touris i bezwen plis e sa dimoun ki si i oule fer en pti letablisman i bezwen depans plis akoz i annan bann standar ki zot pe mete ki mwan mon krwar i pa apropiye. Mwan mon'n viv Lerop, Lanngleter bokou nou, bokou nou in viv Lerop ki'n al Lanmerik Latin, i annan *Colombie* ensidswit.

Konmsi Mr Speaker i annan - mwan mon'n reste dan lotel ki ou *barely* kapab vire. E Lanmerik sa Mr Speaker *New York, La France* ou *barely* kapab vire ek ou valiz ou bezwen ler pou ou tir en keksoz ladan ou bezwen met li lo ou lili, met li plat, kouver ou valiz apre remet sa bann keksoz ladan, remet ou valiz debout akoz napa lespas.

Eski touris, nou letan nou al dan en pei nou diferan avek sa dimoun ki kot nou? Mon krwar pou bezwen get sa akoz sa pou ed sa Seselwa fer en reveni la ki nou dan sa bann sityasyon parey, kot lekonomi pe komans *pickup* e i osi i ava ede pou fer sa lekonomi monte. Alors i enportan ki nou tir sa bann restriksyon oubyen nou pran li *on a case by case basis*.

Mr Speaker en lot keksoz ki mon'n ganny, ki'n vin a mon latansyon wikenn se ki bann

*car hirers* nou ki annan bann loto prive nou al fer nou tes, tes nou veikil tou le lannen nou pey nou patant avek pou lasirans. Me zot, zot bezwen tou le 6 mwan al fer ankor en lot tes, savedir zot peye ankor 6 mwan pou zot fer en *self-drive test*.

Mr Speaker sa i kre en *burden* lo zot. Akoz zot santi ki sa morso larzan ki zot pe fer zot bezwen toultan annan keksoz pou peye, pou peye. Konmsi on dire si ou deside pou investir dan sa domenn, ki fer ki ou pa pou kapab ganny bokou larzan oubyen ase larzan, toultan ou bezwen pe depanse. Sa mon krwar i en lot landrwa ki nou bezwen gete.

Mr Speaker bokou in koz lo program sosyal, Gouvernman *LDS* in met larzan de kote, Minis in dir nou dan Bidze, larzan in ganny met de kote pou kontinyen avek bann program sosyal. Alors pa bezwen fer pep Seselwa krwar ki Gouvernman *LDS* in vin tir tou keksoz dan zot labous oubyen dan zot pos, pou fer sir ki zot pa ganny naryen.

O kontrer, o kontrer Gouvernman *LDS* in vini, in vin met en lord, kot ti napa lord. In vini in dir avek pep Seselwa ki si ou pe abiz lo sa sistenm ou pa pou gannnen. Si i annan

loportinite pou ou al travay, al travay.

Akoz mwan mon leve mon travay Mr Speaker mon fer 2 travay mon. Mon isi avek lot kote. Mon'n travay Mr Speaker akoz mon santi ki mon bezwen sonny mon fanmir, mon santi ki mon bezwen viv, e si mon pa travay mon asize mon pa pou kapab viv Mr Speaker.

Alors i enportan ki nou edik nou bann dimoun ki vin kot nou, nou pa zis dir li be *LDS* ki'n tir sa *URS*. Non! nou'n fer akoz ti annan labi ladan. E i enportan ki letan i annan *massive abuse* Mr Speaker nou sanz sa program. Nou pa pou kapab dil avek sa dimoun akoz ki masiv sa labi ki annan e koripsyon in tro bokou dan sa bann sekter.

Mr Speaker Anse Aux Pins i en distrik ki nou pe ganny bokou lenvestisman. Bokou batiman pe monte e i annan lotel ki pe vini, *Reef Hotel* pou ganny *renovate*. Mon'n ganny loportinite pou mon ganny en konversasyon avek propriyeter Reef Hotel e en konsep ki in met devan pou mwan mon war li fantastik.

E mon ti a kontan ki letan sa proze pe demare, nou annan kontribisyon dimoun me selman ou rezidans silvouple nou bezwen gete oubyen i a

tann *minimum* akoz sa devlopman i pou benefisye nou menm.

Sa msye ki'n pran sa in dir mon i ti a kontan letan i fer louvertir en dimoun ki aze dan mon distrik, i ganny sa loner pou li fer sa louvertir. E pou mwan sa bann konsep Mr Speaker i bann konsep ki fantastik.

E ki in dir mwan i ti a kontan ki avan i demoli, pou li rekonstri, nou annan nou bann dernyen bal ki ganny fer dan sa landrwa. Definitivman i pe get laspe sekirite si sa batiman i kapab *security wise* i kapab fer sa bann kalite zafer. Me i bann lide e ki fantastik akoz nou tou nou konnen *Reef Hotel* ti en *landmark hotel* dan Sesel.

Alors pou annan devlopman e bann devlopman i pou bann ki enteresan e ki bon. Mr Speaker etan ki Chairman avek Komite Ladefans nou'n ganny sanz vizit bokou landrwa enkli Praslin, La Digue, kot nou'n vwar zot kondisyon ki Kordgard i ladan, *fire services* i ladan.

E nou kontan ki dan Bidze in annan alokasyon pou devlop Kordgard La Digue, e ki fer ki nou travay i pa'n anven e ki depans ki'n ganny fer pou nou ale i pa'n anven, akoz i annan en rezilta. Sa wikenn Mr



Speaker nou ti pas Anse Boileau kot *SFRSA*.

Me mon annan en konsern pou mwan met devan Minis. Minis gete ki mannyer Gouvernman letan i annan investiser prive ki pare pou zot kontribye pou donn Gouvernman en fasilite tel ki *Fire Station* Anse Boileau kot sa investir in pare pou fer, me Gouvernman i dir li donn nou sa larzan nou, nou a fer.

Gouvernman avan in dir donn zot sa larzan zot a fer. So eski nou kapab *reactivate* sa? Lentere sa lenvestiser aköz i ankor la li, pour ki i a tir en presyon lo Gouvernman, i a fer en keksoz. I ava donn Gouvernman pa li ki pou *maintain* i ava donn Gouvernman, Gouvernman i a fer sa mentenans ladan.

Me selman dan sa konteks nou pe gete nou ti pe demande si kekfw nou kapab diskrit avek li pou elarzi sa prose ki i a pran konsiderasyon osi Lapolis e i annan sa problem akse kot zot pe dir *divert* semen ki *SFRSA* e sa investiser pa pe pran sa anba son lezel.

Alors Gouvernman i bezwen antre *at least SLTA* antre, pou get ki mannyer i annan posibilite nou, nou'n gete nou pa bann teknisyen be selman nou'n gete Sanmdi nou

war i annan bann posibilite, *at least* i annan de posibilite ki nou kapab fer *access* pou nou kapab annan sa devlopman.

E i enportan aköz in annan 4 oubyen 5, Onorab Arissol in sorti 4 oubyen 5 dife ki'n pran dan sa rezyon laba, e savedir i montre nou ki poudir i annan en nesesite pou nou annan sa stasyon. E sa i ava osi annan en konfor pou sa bann dimoun ki pe travay laba, aköz zot letan nou'n al gete zot konfor Mr Speaker atraver ou, Minis zot konfor i deplorab.

Mon osi mon pa ti pou oule sorti kot mwan pou mon al travay dan sa kondisyon laba. Alors sa i bann keksoz ki nou bezwen eksplere e gete ki mannyer Gouvernman annou kapab fasilite, oubyen ede pou sa bann dimoun fer ot kontribisyon dan sosyete.

Mr Speaker dan sa 1an ki Gouvernman *LDS* in o pouwar mon annan plezir pou mwan dir ki i annan en proze ki la kot bann Pillay ki ti lo latab pou apepre 5an e plis, 5an letan mon vini Mr Speaker, avan mwan ti la, sa proze in ganny materyalize.

Alors mon oule dir mersi Gouvernman *LDS* mon sir ki lafanmir Pillay ek Monthy ki anndan la i osi rekonesan. E ki menm si i ti'n konplet sa proze

ti annan serten problemn ki Gouvernman in fer sir ki in vin rektifye *at least* sa bann problemn.

Dezyenm keksoz ki mon ti a kontan remersye Gouvernman e mon kontan mon'n lager bokou pou sa bann proze se finalman, finalman mon dir Mr Speaker nou pe al ganny nou bazar. Nou bazar pou zabitan Anse Aux Pins akoz i en bazar ki ti'n ganny promet ti pou fer zis avan eleksyon ti pou komanse zis avan eleksyon par ladministrasyon avan, me naryen pa ti ganny fer.

Mersi Minis Ferrari avek ou Gouvernman pou fer sir ki sa proze i ganny demare. E nou donn nou langazman, nou donn nou langazman ki nou pou servi li byen e la nou pe fer nou lasosyasyon peser pou fer sir ki zot, zot *manage* sa bazar. Mr Speaker ...

### **MR SPEAKER**

30 minit Onorab.

### **HON CLIFFORD ANDRE**

Wi Mr Speaker. I reste mwan zis 2 pwen mon a fini en pti kou, Mon ti a kontan lo sa konteks Mr Speaker avan ki mon terminen pou dir ki *STC* Minis in dir nou *STC* pou mentenir bann pri e rode ki mannyer kontinyelman i fer pri desann

pour ki i a reste abordab pou mazorite dimoun.

Dizon sa Mr Speaker mon ti a kontan remersye tou zabitan ki'n desann Lendi swar, 6er diswar mon ti fer en rankont pou mwan ganny zot pwennvi lo Bidze, dir zot ki mwan mon pe al met devan e pran zot kontribisyon.

E mon ti a kontan remersye zot senser zot in desann an gran nonm e ki mon pa pou zanmen les tonbe. E mon pa pou zanmen kit zot deryer letan mon annan loportinite pou mwan zwenn zot, pou ki zot kontribisyon i ava sa kontribisyon ki mwan mon'n fer, ki zot in don mwan sa manda pou mwan fer dan sa Lasanble isi.

Avek sa Mr Speaker mon ti a kontan dir avek Minis ki mon pou donn sipor sa Bidze menm si mon tous lo serten pwen ki mon krwar i pertinan. Me selman pou Sesel kontinyen bouz devan anba direksyon Prezidan Ramkalawan avek *LDS*, avek *LDS* ki dan sa Lasanble mon garanti pou mon sipor e sipor zabitan Anse Aux Pins. Mersi Mr Speaker.

### **MR SPEAKER**

Mersi Onorab. An konsiderasyon pou bann travay komite ki pe arive pandan *lunch*

*break* mon pa pou tro anvi al reo pre avek midi edmi donk mon pou termin la.

E mon a *remind Assembly Business Committee* osi ki nou miting i ler kar, so si zot kapab gard sa randevou. Nou a rebran travay apre midi 2er e nou a kontinyen avek deba lo Bidze. Mersi. Nou pran poz.

**(BREAK)**

**MR SPEAKER**

Bonn apre midi tou dimoun pou kontinyasyon nou travay. Nou pou ekout Onorab Wavel Woodcock pou son diskour.

**HON WAVEL WOODCOCK**

Mersi Mr Speaker. Mr Speaker les mwan konmanse par dir ki ler mon'n ekout plizyer bann Manm *US* koze lo sa Bidze, monn tonm lo en sel konklizyon. E sa konklizyon se ki zot bezwen en bon pe leson lo ledikasyon finansyel ek lekonomi.

Alor Mr Speaker mon konsey pour zot se ki Labank Santral pe ofer bann kour ledikasyon finansyel, alor ti ava byen zot fer laplikasyon pou zot swiv sa bann kour, akoz seryezman mon kanmi dan zot plas.

An plis Mr Speaker, mon ti ava menm envit Minis ki son

*background* i dan lekonomi, finans ek *banking*, pou volonter pou donn zot en pe leson dan sa domenn. Ler mon'n ekout zot, mon konpran akoz nou'n tonm dan sa gran trou det ek koripsyon.

Mr Speaker dan lepase Minis Finans dan Gouvernman *US* ler zot ti prezant Bidze zot ti annan plizyer term;-

‘*Data dan tata*’,

‘*Tinel*’,

‘*LNG*’,

‘*Met Seselwa lo lalin.*’ Sa bann zafer tenm Bidze sa Mr Speaker i en konsep sosyalis kominis, marksis, bann konsep *Chairman Mao, Mao Zedong* Prezidan La Chine 1949 a 1976 avan koudeta.

E tou kou zot in annan zot en bann kalite tenm, tenm Nasyonal, tenm Festival Kreol, tenm isi tenm laba. Me petet en tenm ki ti pou ale avek zot, se en tenm koripsyon, gaspiyaz, vol bat latet ek mansonz.

Mr Speaker sa Bidze ki'n ganny prezante avek nou Lasanble par Minis responsab pou Finans, i enn i byen detaye, ki montre nou kote nou sorti e ki direksyon ki nou pe ale.

I pa en Bidze bat latet e fer krwar me i en Bidze responsab e realis pour etabli fondasyon pour nou pei re debout lo son lipye. Toultan nou paran in dir

nou ki fodre nou koup nou lenz dapre nou latwal e lenportans annan en *savings* pour letan dir. Mr Speaker lemonn antye pe lite kont en pandemik ki'n non selman afekte lasante nou pep, me in osi anmenn en kriz ekonomik ki nou pei i bezwen sirmonte.

Mon en pti pe sagren ler mon'n tann bann Manm lot kote latab servi *COVID-19* pou fer politik bon marse avek. Mr Speaker menm si ozordi nou lekonomi pe refer, gras a bann bon desizyon ki nou Gouvernman in pran, i pa vedir ki tou keksoz i an roz.

I enportan ki nou get keksoz dan son konteks, ki nou konpran kote nou sorti e kote nou ete ozordi. Minis dan son ladres Bidze in fer kler dan son lentrodiksyon kote nou pei ti ete ler *LDS* ti ganny elekte avek en gran mazorite dan eleksyon le 24 Oktob 2020.

Mr Speaker, aköz *COVID-19* plizyer pei ti anba *lockdown*. Menm Sesel ti'n bezwen ferm nou lafrontyer. *Arrival* Sesel ti'n diminyen, nou ti fini lannen 2020 avek Selman 114,858 mil touris ki lwen avek 384,204 viziter ki ti vin Sesel an 2019. Nou lekonomi ti lo son zenou aköz sekter *tourism* ti pilye prensipal nou lekonomi.

Biznes ti ater net, ti annan *mass redundancies* e ti napa ase travay Sesel. Lo Praslin ek La Digue, aköz nou lekonomi i preski antyerman depan lo Lendistri Touris nou ti ganny tape pli for.

Bokou biznesmenn ti bezwen *downsize, scale down* zot biznes, *flight* Mahe/ Praslin ti diminyen, bann *ferries* ti redwir lakantite voyaz ki zot fer, plizyer *car hirers* ti bezwen vann zot loto pou kouper zot depans e kou loperasyon;- bann bato *excursions* ti ater, bann bato *cargo* osi ti ganny tape tre for e i annan menm biznes ki ti fermen.

*Craftsman, artist, mizisyen, propriyeter restaurant, artisan, e lezot* biznes ki depan lo *Tourism* ti ater net. Avan ki Lasanble ti ganny dizourd an 2020, nou ti aprouv en Bidze plis ki R1bilyon pour ed Gouvernman *US* sa letan.

Me i malere ki apre ki Lasanble ti ganny dizourd, zot in mal zer sa larzan. E bokou biznes ki pa ti merit ganny asiste ti ganny larzan anba *FA4JR*. Minister Finans ozordi pe bezwen fer demars atraver Lakour pour *recover* sa bann larzan.

Move zesyon *taxpayers money* par ansyen Gouvernman

i enn bann rezon prensipal akoz ki ler *LDS* ti pran pei nou ti war nou dan en gro trou ki *US* ti'n fouye e met nou pei ladan.

Mr Speaker deswit nou Gouvernman ti konmans fer demars pou retir nou pei dan sa kriz ki nou ti ladan. E Prezidan Ramkalawan ti konmans fer demars pou ganny vaksen pour nou pep. I malere ki ler nou ti konmans program vaksinyasyon *US* ti *boycott* sa program. Menm si zot ti al pran zot vaksen an misouk dan kasyet apre.

Nou Gouvernman in fer demars e nou'n ganny plizyer kalite vaksen, *Sinopharm*, *Covishield*, *sputnik* e *Pfizer*. E nou pep pann bezwen pey en sou pour sa bann vaksen. Zis mazine konbyen ti pou kout nou pei si nou ti pou bezwen pey pou tou sa bann vaksen.

Pour premye 3 mwan 2021 selman 6,785 touris ti antre Sesel, e nou Gouvernman ti deside reouver pei le 25 Mars 2021. *United Seychelles* sa letan ti kont reouver nou *Airport* e si nou ti ekout *US* ozordi lamazorite Seselwa dan sekter piblik ek prive ti pou napa en travay.

Nou lekonomi ti pou'n *collapse*, e nou pei ti pou'n pri lo en brizan. I kler ki *PL/US* pa enterese avek nou pei, me zot

lafen pouvwar. Zot pare pou kit nou pei lo son zenou, si i pou ed zot azanda pou retourn o pouvwar.

Mr Speaker nou Gouvernman ti pran bann desizyon difisil. Menm si plizyer sa bann desizyon pa ti popilis me i ti dan lentere nou pei e pour ed *recovery* nou pei. Menm si sa lannen nou pou dan en *deficit*, akoz bon disiplin fiskal nou Gouvernman, nou *deficit* pour bokou pli mwens ki ti'n ganny prozekte pour sa lannen. En *deficit* primer R1.6 bilyon konpare avek en *defisit* primer R 2.6 bilyon, dan Bidze orizinal pou lannen 2021.

Ozordi Sesel louvraz i annan an labondans. Loportinite i la, e Gouvernman pe met bann striktir, regilasyon e fasilite an plas pour *recovery* nou pei e osi pou relans plizyer sekter ki ti'n ganny negligize dan le pase pour ede agrandi nou lekonomi.

Mr Speaker nou lekonomi ti'n kontrakte par 9.9 poursan an 2020, e prozeksyon pour 2021 se en krwasans pozitiv pou vin 6.1poursan e dapre Minis Finans pour lannen 2022, krwasans lekonomi i ekspekte ariv 7.2poursan.

Plis lanfaz pe ganny mete lo sekter lapas e sekter lagrikiltir. Sekter lagrikiltir ek

sekteur lapés pe ekspekte grandi par 3 pousan an 2022.

Nou Gouvènmàn pe met lanfaz lo konstriksyon bann lenfrastriktir lapés dan plizyer distrik pou ankouraz lapés artisanal. Tou lede distrik Praslin, Grand Anse avèk Baie Ste Anne pe benefisye avèk en proze lapés.

Depi sizyenm Lasanble mon pe demann en *Ice Plant* pou Distrik Grand Anse Praslin avèk lezot lenfrastriktir parey *gear store* e amenazman lasosè ek bazar Grand Anse Praslin.

Aprè vizit ki Minis ki responsab pou Lapés Minis Ferrari ti fer lo Praslin, i ti donn langazman ki proze pou enstal sa *Ice Plant* pou konmansè sa lannen. Proze *Ice Plant* in fini konmansè. Byento peser Grand Anse Praslin i avè benefisye. Fode note ki sa proze i enn ki pou plizyer lannen Gouvènmàn *US* ti'n promet me zot pann zanmen fer.

Renovasyon lo bazar ek *gear store* i dan staz *planning*. Mr Speaker kot i konsèrn taks bann peser endividi ki dan sektè lapés zot pou kontinyen ganny sa egzansyon ki egziste ozordi. Ki nou pe ekspekte bann peser pas sa benefis lo konsonmator.

Minis in koz lo defayans ki egziste ozordi dan koleksyon reveni apropriye dan sektè *retail*. Ti annan en deklarasyon ki en Minis *US* ti fer dan le pase, ki anviron 80 pousan *retailers* i deklare ki zot pa fer profi kan an realite zot pe fer profi.

Alor mon sipòrt desizyon Gouvènmàn pou met bann kondisyon adisyonnel pou laysens bann ki dan sektè *retail*. Premye kondisyon se ki tou antite pou bezwen annan en *cash register*. Dezyenm tou antite pou bezwen annan en masin *point of sale* pou donn opsyon son kliyan pou pey ek son kart labank.

Dezyenm faz ki Gouvènmàn pou travay lo la, se fer sa *cash register* konekte direk avèk sistenm Komisyon Reveni Gouvènmàn in fer resorti ki i an diskisyon pou en don pou finans sa sistenm. Sa i pou anpes bann *retailers evade tax* e fer ki plis reveni i antre dan kont piblik.

Minis in osi dir ki *STC* pou kontinyen rod plis lefikasite dan son lopeyasyon e son sistenm prokirman, pou asire ki napa okenn logmantasyon lo bann marsandiz debaz. *Middlemen* in ganny koupe. E Fodre ki Lepep Seselwa pa zanmen bliye ki ti annan en

pwen kot *United Seychelles* ti pe tir dile avek park.

Depi 2013 ziska 2019 zot ti lwe en kare later *V10104 Bois De Rose* avek *STC*. *US* ti pe lease sa later avek Gouvernman pour R73,000 e zot ti *sub-lease* sa later pour R800,000 par mwan avek *STC*. Apre Parti Lepep/*US* ti vann sa menm propriyete avek *STC* pour R17milyon. La ozordi zot vin fer nou krwar ki zot enterese avek vant Seselwa.

Se nou Gouvernman ki enterese avek vant Seselwa. Pa zot. Zot, zot in *enjoy* zot larzan 'forgo' e donn bal dan kont piblik. Zot in akimil bann ptipti bout later e fer *building* 5 letaz ek *swimming pool* lo lasyer sa pep.

Kanpanny *RRP STC* in redwir pri plizyer komodite par 7 poursan dan kategori 1. Pour sa bann komodite pri i 33 poursan pli bon marse konpare avek pri dan bann lezot laboutik. Minis ti donn enn de legzanp parey *premium* diri *basmati* ki kout R29 par kilo konpare an mwayenn R38 dan bann lezot laboutik.

Delwil *Sunflower* kot *STC* i kout R23.75 konpare an mwayenn R41 dan bann lezot laboutik. *STC powdered milk* i kout R32 konpare an mwayenn R44 dan bann lezot laboutik.

Avek logmantasyon ki pe arive dan kou transportasyon marsandiz *cargo* ek *freight*, *STC* pe zwe son rol pou fer sir ki napa ogmantasyon dan pri komodite dan kategori 1. Gouvernman i rekonnet ki i annan bokou plis pou fer, me atraver *STC* Gouvernman i angaze pou kontinyen met plis zefor pou negosye bann pli bon pri avek son bann fournisseur e pour li kapab pas sa benefis avek popilasyon.

Minis in osi anonse ki Gouvernman in diskite e agree avek *GICC* pou konstrir bann *condominium* pour bann profesyonnel. E *Nouvobanq* in dakor pou ofer bann *loan* a en to lentere 5.5 poursan avek en peryod repeyman ziska 30an.

Yer en Onorab lo lot kote latab ti fer en *statement* ki *LDS* pe pran ek sa ki pov e donn avek sa ki ris. Me sa ki enteresan se egzakte man sa ki sa Onorab in fer, in aste en later Gouvernman Linyon pour R30mil apre revann sa menm later pour plis ki en R1milyon apre i vin aste en *condominium* Union Vale, Mahe e bar plas en *return graduate*, en zenn profesyonnel. Mon annan levidans.

**MR SPEAKER**

Onorab aret en pti kou. Mon tann bann Manm kote latab laba pe kriy 'foul.' Mon pe demann ou eski ou annan zistifikasyon pou sa bann keksoz.

**HON WAVEL WOODCOCK**

Yes mon kapab *substantiate* Mr Speaker mon annan dokiman.

**MR SPEAKER**

Ou annan zistifikasyon pou sa bann *statement* ki ou pe fer?

**HON WAVEL WOODCOCK**

Wi mon annan Mr Speaker.

**MR SPEAKER**

Ok.

**HON WAVEL WOODCOCK**

Sanmenm sa ki apel pran ek sa ki pov, donn ek sa ki ris.

*(laughter)*  
*(Disruption)*

**MR SPEAKER**

Onorab. Ale wi, mon a ekout lot kote. Ok, Onorab Pillay wi.

**HON SEBASTIEN PILLAY**

Mersi Mr Speaker. Mr Speaker, pandan sa de zour ki nou'n diskit Bidze, napa en Manm lo sa kote latab ki'n fer referans personnel avek okenn Manm.

Nor fer okenn referans personnel avek okenn personalite politik. Personn pa'n fer sa. Akoz i pou *impute*, i pou *impute en improper motive*. Onorab Woodcock, sa ki pe i fer la i en *imputation*.

E mon krwar ki dan lespri ki nou, lapros ki nou'n pran se pou nou koz lo sa ki'n vin met devan nou. I devret koz sa ki'n vin met devan li.

Eski ti neserer pou li al fer en latak personnel zis pou kapab zistifye son pwen? Si i napa en pwen...

**MR SPEAKER**

Eskiz mwan, sa en- Mersi Onorab Pillay.

**HON SEBASTIEN PILLAY**

*But this is, this is the point. The point se ki i pe deza pe kas Standing Orders. E si ou pe demann li pou li substantiate, en improper motive. bring a substantive Motion to the matter.*

**MR SPEAKER**

Mon adres sa silvouple. I en pwen sansib, me selman i annan en diferans ant *facts*, si en keksoz in arive. Sa ki'n *impute proper motive*, se ki Onorab Pillay pa kapab dir poudir sa Manm in servi bann term in vole, oubyen in soz.



Si i pe zis *state en fact* ki en Manm in fer, e ki i pa dir plis ki sa, mon krwar sa mon bezwen aksepte. Onorab Sophola ou santi ou ki pe ganny vize la?

**HON NOLINE SOPHOLA**

Mersi Mr Speaker. Wi mwan ki pe ganny vize. Me selman mon anvi eksplike. Onorab Woodcock mon later mon'n aste ek mon larzan! Mon vann ki manner mon anvi! Napa en Lalwa ki dir mwan ki manner mon pou vann mon later!

Me selman mon demande ki Onorab Woodcock, i al pey son alimoni! Mon pa fer parey li pou pran larzan, pou donn bal partou kote kot i ale! Mersi Mr Speaker.

**MR SPEAKER**

Onorab Woodcock, sa bann ka personnel, i anmenn nou dan en kantite diskisyon. *Ok?* Si ou'n fer, si ou'n fer en *statement* poudir en Onorab ti aste en later en pri, apre i vann en pri. Mon pou les li pase, me selman pa al pli lwen ki sa lo Manm ki la devan. Mersi.

**HON NOLINE SOPHOLA**

*(Off-Mic)*

**MR SPEAKER**

I depan, i depan ki ou dir Onorab Sophola. Mersi.

**HON NOLINE SOPHOLA**

*(Off-mic)*

**HON WAVEL WOODCOCK**

*Ok* Mr Speaker.

**MR SPEAKER**

*Ok* Onorab Woodcock. Kontinyen.

**HON WAVEL WOODCOCK**

*Ok* Onorab Woodcock. Laverite i ofans son met. Mon a pey son fiy alimoni *ok?*

**HON NOLINE SOPHOLA**

*(Off-mic)*

**MR SPEAKER**

Onorab Woodcock silvouple. Tenir mon konsey an konsiderasyon. *Ok.*

**HON NOLINE SOPHOLA**

Akoz sa ki pas dan bann dan bann lezot ...

*(Mic switched off)*

**MR SPEAKER**

Arete. Onorab Sophola. Mon'n donn ou loportinite pou fer leksplikasyon, ou'n fer. E mon pe demann Onorab Woodcock, pou pa al pli lwen lo sa size. Alor i a kontinyen. Mersi.

**HON WAVEL WOODCOCK**

Ok napa problemm, Mr Speaker. Laverite i ofans son met.

*Minister* Gouvernman Local e Zafer Kominoter pe ganny en alokasyon 20milyon pou bann pti proze kominoter, pou 2022, konpare avek 10.5milyon dan Bidze Revize 2021.

Grand Anse Praslin, mwan avek *DA*, nou'n fini soumet nou lalis 5 proze pou lannen 2022. Minis in osi anonse ki *tax* ki ti 25poursan lo profi ziska 1milyon. E 30poursan lo okenn profi, par lao 1milyon apartir le 01 Zanvyé 2022, pou sanze.

*Tax* pou prezan vin 15poursan lo profi ziska 1milyon, e 25poursan lo profi ki par lao R1milyon. Sa i ava soulaz bann biznes, e ed zot retenir en pe plis larzan pou reenvestir dan zot biznes.

Minis in osi fer resorti ki Labank Santral in osi redwir son to lenteré Polisi Monneter par 3 poursan depi dezyenm kar 2020, pou ede siport lekonomi pei.

Sa desizyon i fer ki lenteré dan bann Labank Komersyal in desann. To lenteré lo *loan* lakaz in desann par 0.84poursan, sorti 7.55poursan, lafen Septanm. *Sorry*, sorti

7.55poursan lafen Septanm pou vin 6.71poursan.

Pour *loan* biznes ki bezwen sekirite, in annan en rediksyon 0.72poursan an mwayenn dan to lenteré.

A lafen Septanm, an mwayenn to lenteré lo sa kalite *loan*, ti 11.28poursan, e la aprezan i 10.56poursan. Tandis ki *loan* biznes ki pa demann sekirite, in annan en rediksyon 1.28poursan an mwayenn, sorti 16.57poursan, pou vin 15.29poursan.

Rediksyon dan to lenteré i ekspekte, siport ogmantasyon aktivite dan sektor prive. E an retour siport zefor pou relans lekonomi. Fodre note ki lamazorite labank in rekonmans donn *loan* biznes ek *loan* lakaz.

Mr Speaker prodiksyon poul in kontinyen ogmante depi 2020, malgre *pandemic COVID-19* e Departman Lagrikiltir i konfidan ki byento, avek bann mezir parey akse avek finans, e tir restriksyon nou pou kapab depas sa rikord 1,560 *metric ton*, ki ti anrezistre an 2006.

Prodiksyon dizef osi in kontinyen ogmante pou ariv pres 39 milyon, pou ariv pres 39 milyon dizef ver lafen 2020. Ki reprezant 100poursan prodiksyon lokal.

An sa ki konsern prodiksyon *pork*, a lafen 2020, Departman Lagrikiltir in rikord en prodiksyon total, 587 *metric ton*. Sa i fer ki i annan 41 pousan prodiksyon lokal.

Target nou Gouvernman se sekirite alimanter. Menm si nou pe fer fas avek pandemik COVID-19 pandan sa dernyen lan, prodiksyon poul ek *pork*, in kontinyen ogmante.

Sa i montre ki lanfaz ki nouvo Gouvernman pe mete lo Sekter Lagrikiltir pe aport fri.

Mr Speaker, Gouvernman in fer alokasyon R50milyon pou sibvansyon to lentere lo bann *SME's*, ziska 3milyon pou ed bann Pti e Mwayen Antrepriz e biznes. An plis ki sa Gouvernman pou osi garanti en *Bond* lavaler 150milyon dan premye kar 2021, pou asiste Labank Devlopman *DBS*, pou donn *loan*, sa bann sekter kle parey *Tourizm*, Sekter Lagrikiltir, Sekter Lapes, Lekonomi Ble, *Digital Economy* e Sekter Finansyel, pou ede dan sa transformasyon ekonomik.

Sa i montre ki nou Gouvernman pe met divan anba lezel bann Pti e Mwayen Biznes, pou ankouraz lantreprenarya e lepanouisman bann sekter enportan dan nou pei.

Mr Speaker ozordi nou Gouvernman i bezwen fer

alokasyon, 95.5milyon *tax payers money*, avek *Air Seychelles* pou det ki sa lakonpanyen in annan avek *Etihad*.

Akoz en Lagreman kabri dan sak ki Parti Lepep, *United Seychelles*, in sinyen avek *Etihad Airways*, ki fer ki nou Gouvernman, i dwa latet koson ozordi.

San bliy sa gro det ki *Air Seychelles* i dwa bann *Bond holders*. Sa R95.5milyon ti kapab ganny servi pou pey trezyenm mwan saler ozordi. Nou Gouvernman i bezwen bous trou ki Gouvernman *US* in fouye.

Mr Speaker menm si nou lekonomi i lo staz *recovery*, e nou Gouvernman i bezwen annan disiplin fiskal, nou Gouvernman pe investir e pe met an plas serten lenfrastruktir enportan, pour zabitan Praslin avek La Digue.

Bann lenfrastruktir ki pou ankouraz lantreprenarya, e lezot fasilite pour soulaz lavi nou zabitan. R6000 enstalasyon, ek *maintenance crash barriers*, Vallee De Mai e Grand Anse ek Baie Ste Anne.

2.7milyon semen Pasquere, La Plaine Hollandaise. En proze ki mon ti pouse pou konmanse dan sizyenm Lasanble. Menm si

proze pe pran en pe letan pou konplete. Akoz kontrent bidzeter, pti-a-pti nou pou arive kot nou destinasyon.

R8milyon, dan Bidze 2022 pou en *Vehicle Testing Station* Praslin. En proze ki depi sizyenm Lasanble mon pe demande. Pralinwa i ava aret esper plizyer erdtan dan en gran laliny, kot *SPTC Amitié*, detrwa fwa dan en mwan, pour teste zot transport.

En lot proze ki Gouvernman presedan in promet pour plizyer lannen me zot pa'n *deliver*. Dan lan nou Gouvernman pe *deliver*.

Mr Speaker dan le pase mon'n anmenn Mosyon regardan renovasyon lo Lopital Baie Ste Anne Praslin. E pou met an plas bann fasilite nesesser. Mon'n fer en vizit kot sa lopital avek Minis Lasante dan Gouvernman avan, e sa lannen avek nouvo Minis Lasante.

Mon'n osi akonpany Prezidan Ramkalawan lo en vizit ki ti fer kot sa lopital. Mon kontan ki dan Bidze 2022, i annan 1.5milyon pour renovasyon lo sa Lopital, e 3.5 milyon pour *Oxygen Plant, Clinical Lab, Laundry* ek *Hyperbaric Chamber*.

Fodre note ki pandan sa bann dernyen lannen *Clinical*

*Lab* ti dan en *store* kot lopital ki pa *conducive* ditou. I osi annan 1.35milyon pour Grand Anse Praslin *Annex and Dental Surgery* kot Klinik Grand Anse Praslin.

Apré vizit mon Komite, Komite ki mon *Chair MYCC La Digue*. Mon kontan pou vwar ki R1.75milyon in ganny *allocate* pour renovasyon La Digue *Sports Complex*. E alokasyon R1.5milyon, pou renovasyon bann lezot fasilite lenfrastruktir sportif.

Sa *Sport Complex La Digue* i dan en kondisyon deplorab. E dan en miting avek *CEO NSC*, mon'n ganny lenformasyon, mon'n ganny enformen, ki serten travay renovasyon pour osi ganny fer lo *Water Sport Centre*, Grand Anse Praslin, basen naze Baie Ste Anne e lo bilding ki fer *judo* Grand Anse Praslin.

Minis mon vwar dan Bidze en *Grant financing* R54.484 milyon pou en *Youth Hope Residential Center* avek en alokasyon 16 milyon dan Bidze 2022. Petet Minis i kapab donn nou en pe detay lo sa sant e kote i pou sitey, i pou baze?

*Ile Eve Industrial Estate* i enn bann landrwa, ki mon'n met bokou lanfaz lo la depi sizyenm Lasanble. Mon kontan pou vwar ki i annan en

alokasyon 13milyon dan Bidze 2022, pou met an plas bann lenfrastruktir neseseur pour devlopman sa zil.

Me anvi ki sa proze pa pou fini deswit, Minis ki responsab pou *IEA* - *IEA* li menm, an diskisyon avek Lotorite Distrik ek lezot parti prenon, pe konsider fer alokasyon later, avek enn de biznes, ki pare pou met bann lenfrastruktir parey *utilities*, elektrisite, delo an plas *at their own cost*.

I annan anviron 50 morso later *Ile Eve* pou fer alokasyon san kont bann later, ki'n ganny *allocate*, me pa'n ganny devlope. Grand Anse Praslin *Daycare* in konplete, e fek ganny *lease*.

Ti annan en pe defayans avek sa bilding. *Tiles* lo miray ti grennen ler *DA* avek nouvo propriyeter ti al fer vizit kot sa *daycare*. Me travay in ganny fer pou rektifye sa problem. Kot i konsern lerozyon lakot, i annan en alokasyon 3.6milyon dan Bidze, pou fer *rock armoring* Anse Kerlan.

Fodre note ki lakot Grand Anse i ganny afekte bokou avek lerozyon lakot, depi La Pointe, Amitié, Ros Korbizo ziska Anse Kerlan.

Anba *Seychelles Infrastructural Agency, Social Housing project*, mon vwar en

alokasyon 277.3 milyon *Saudi Fund*, anba *foreign loan financing*. E en alokasyon 32.6 Milyon pour lannen 2022.

Mon konnen ki dan le pase Gouvernman *US*, in depan bokou lo bann Pei Zanmi pou fer bann proze lakaz, parey Gouvernman *La Chine* ek Gouvernman *Lenn*. E zot ti annan en proze 3000 lakaz ki zot pa'n kapab fer aköz, zot pa'n kapab vann *Assomption* parey zot ti anvi.

Mr Speaker, petet Minis i kapab donn sa *Lasanble* en pe detay lo sa *Saudi Grant*. Mon konnen ki nou annan en Gouvernman, ki vremen rezilyan. E atraver bann negosyasyon avek bann Pei Zanmi, deza nou'n benefisyè avek plizyer keksoz;- parey vaksen, Lopital latant e plizyer lekipman medikal. Dan son konklizyon mon ti pou apresye si Minis i kapab donn nou en pe detay lo sa size.

Mr Speaker dan sa lan, anba nou Gouvernman, mon'n vremen apresye konsiltasyon avek bann Minis. Kot i konsern bann proze e bann konsern dan distrik. Zisteman, en proze ki mon pe pouse pour mon distrik Grand Anse Praslin se en *Vilaz Artizanal*.

Mon'n fer *site visit* avek Minis pour *Lenvestisman* e

Lantreprenarya, Minis Devika Vidot, ansanm avek *DA Grand Anse Praslin* kot sa proze pe ganny propoze. Vizavi Erport kot vye *STC warehouse*.

Mon'n osi fer en vizit avek Lotorite *Planning* ek *ESA*, e plan pour sa proze pe ganny drafte. Mon swete ki Gouvernman i ava finans sa proze a en pli kour dele letan posib. Akoz sa proze pour ankouraz aktivite ekonomik e benefisyè bann *craftsman*, artisan, artis, mizisyen e plizyer bann lezot pti biznes dan nou kominote.

En lot proze ki mon pe swete i materyalize dan le fitir. Se en semen primer pou konekte Zimbabwe, Grand Fond, *Newcome* avek Mon Plaisir. En tel proze pou ouver Grand Fond pour devlopman touristik. Sel *viewpoint* ki ou vwar 9 zil.

Mon'n osi met lanfaz lo de *assets*, ki nou annan ki kapab anmenn valer azoute dan nou lendistri *tourism*. Ozordi nou pei ler i fer *marketing*, i met plis lanfaz lo nou lans. Me nou montanny, sirtou nou bann *nature trails* i vreman zoli.

Me pa tou bann *nature trails*, ki ganny rekonnet par *SPGA*. I annan bann ki ofisyel, ki ganny dezinyen konman *nature trails*. Apre i annan en

bann ki zis bann natif sa distrik, an partikilye ki konnen.

Si lo nivo kominote, ou menm Nasyonal, an partenarya avek bann partener, bann biznes, lotel eksetera. Nou kapab devlop e annan en *maintenance plan*, pour sa bann *trail*. I pou anmenn en reveni adisyonnèl pour nou pei.

Lot *asset* ki nou annan se bann atlet spor lo lanmer, parey *kite surfing*, *windsurfing*, *sailing*, eksetera. Nou kapab devlop *water sport* pou fer *sport tourism*. Nou annan bann *sportsmen* profesyonnel ozordi, labote nou lanmer, nou bann zil tropikal.

Pa bezwen konmans lwen Mr Speaker, konmans Grand Anse Praslin. Met bann lenfrastruktir nesese an plas, e envestir dan *sport tourism*. Mon plis ki sir ki i pou profitab.

Mr Speaker, mon annan lespwar ki nou pei pou *fully recover*, ki nou pou retourn lo nivo ekonomik 2019. E nou pou sirpas tou bann rikord ekonomik lepase.

Akoz nou annan en Gouvernman ki responsab, ki annan en plan pour sa pei, ki krwar dan bon zesyon larzan Lepep Seselwa, ki krwar dan bonn gouvernans, latransparans e rann kont.

Ki pa zis koze, me pran aksyon, ki pa pou vol sa pep. Me ki pou travay dan lentere e lepanouisman lepep Seselwa. Avek sa de mo, mon dir ou mersi Mr Speaker.

**MR SPEAKER**

Mersi.

***(APPLAUSE)***

**MR SPEAKER**

Mersi Onorab. Mon apel Onorab, Onorab Sylvanne Lemiel.

**HON SYLVANNE LEMIEL**

Mersi Mr Speaker. Bonn apre midi Minis, tou koleg Manm Onorab e tou dimoun a lekout.

Mr Speaker, si i annan en moman letan dan lannen, ki pep Seselwa i aport plis latansyon lo travay Lasanble, se letan Minis Finans, i vin prezant Bidze dan Lasanble Nasyonal.

Vandredi le 12 Novanm 2021, 9er bomaten, bokou dimoun ti devan zot televizyon, oubyen serten ti pe ekout radyo pou konnen kwa ki nouvo. E ki bon nouvel ki Gouvernman atraver son Minis Finans ti pe vin anons zot.

Mr Speaker, lopinyon lo sa Diskour Bidze, i divers. Me parkont bokou ti pe mazine ki

zot ti pou ganny en pti soulazman. Sa i aköz pep Seselwa, in tandè ki bann dirizan *LDS* ti pe dir ki lekonomi pe aranze.

E tou i montre ki nou lo bon semen. Bann Minis in ganny logmantasyon dan zot *allowance*, e resaman nou ti pe ganny enformen, ki nou'n fer en *savings* R1.2bilyon.

E dan en dernyen *interview*, medya ti montre Zofisyè *IMF*, pe dir ki i enpresyonnen avek progre ekonomik ki Sesel pe fer, e ki pei i dan bon direksyon.

Sesel in rekipere apre sa kriz finansyel ki *COVID* ti'n anmennen. Se sa, ki'n fer pep Seselwa annan en pti pe lespwar.

Me apre sa prezantasyon Bidze, bokou sa bann ki ti pe annan lespwar, prezan pe viv dan dezespwar. Bokou i dir ou, ki zot pa vwar zot dan sa Bidze. Bokou i dir ki sa Bidze i enn ki pe kontinyen soulaz bann ki annan, me sa ki napa pe vin pli napa.

En zabitan in koz avek mwan apre sa diskour. In menm dir mwan ki pandan letan kanpanye eleksyon, *LDS* ti dir ki Sesel pou tou son zanfan. Me la in remarke ki ozordi, papa i tir sa premye lasyet manze, i donn gran frer e

gran ser. Me pou bann ki pli pti, i dir napa pou zot.

Se sa santiman sa madanm ki'n koz avek mwan, apre ki'n ekout Ddkour Bidze. Mr Speaker, tanka mwan. Mon regard Bidze 2022 koman, en *corporate welfare budget*. Enn ki pe kontinyen anmenn Polisi redwir *tax*, pou benefisyé gro biznes.

Me bann ki pli vilnerab, napa preski naryen pou zot. Mon pa'n vwar nanryen ki pe mete, ki pou tous pos, oubyen pli byen amelyor lavi Seselwa. Mon ti pe panse ki pou annan en soulazman pour travayer avek saler pli ba.

La mon ti pe maziné ki Gouvernman, ti a konsider fer travayer lo en saler ziska R10mil, al se zot avek en keksoz an plis sa lafen lannen. Me Gouvernman in dir, ki li i pe vin avek en revizyon saler nek an 2023. Sa i dezapwentan.

Ozordi, nou bann fanmir ordiner pe pas dan bokou difikilte. Serten pe kontinyen perdi lanplwa ;- serten pa pe kapab trouv sa travay apropiye ki zot kapab fer. Bokou osi pa kalifye pou lasistans sosyal, menm si zot al fer aplikasyon.

E anmenn tou dokiman neser ki zot ganny demande. Minis in enform Lasanble ki *weights* pe al ganny revwar. E

mon espere, ki plis dimoun ki dan bezwen reel a kapab ganny asiste e ganny en pti soulazman apre ki sa *weights* in ganny revwar.

Mon oule sezi sa loportinite osi pou ankouraz bann ki pa ankor trouv en lanplwa dan mon distrik, pou kontinyen serse, sirtou la ki Minis in dir pou annan 733 nouvo *post*.

Petet zot a sanse, e ki an 2022 zot a kapab trouv en lanplwa. Ozordi nou vwar ki deviz etranzer in redwir, sorti R22 r pou vin R15. Me nou pe vwar ki pri lavi i kontinyen ogmante. E la Minis, e osi Gouverner Labank Santral in konfirman ki pou kontinyen annan presyon lo pri komodite.

Sa i vedir ki dimoun avek saler pli ba ki pou kontinyen fer sakrifis. Me larzan dan pos Seselwa parey ti'n ganny promet, pou napa menm. Minis in enform nou atraver son diskour, ki son Gouvernman i bezwen met det Gouvernman a en nivo pli soutenab. Be ki nou vwar dan larealite?

Nou stok det pei an 2021 i R18.6bilyon e nou annan ankor det avek *IMF*, *AFDB*, *World Bank*. E osi lezot sipor *loan*, ki Gouvernman in pran, in estimen pou \$210 milyon.



Sa pou fer ki det pei pou ogmante, e det par sitwayen osi pou ogmante. I bon note, ki Gouvernman presedan ti ganny kritike bokou par Lopoziyon sa letan akoz logmantasyon dan det pei.

Me ozordi, nouvo Gouvernman in met sa soulye. E zot in vwar akoz pei i bezwen andete parfwa, pou ki masin lekonomi pei i kontinyen marse. Zot aksepte prezan, ki nou ti bezwen prete. Dan tousala, Seselwa i bezwen espere pou vwar mezir tanzib ki pou amelyor zot lavi.

En lot realite dan nou pei ozordi Mr Speaker, i bokou Seselwa ozordi i depan lo labank pou swa fer zot lakaz, oubyen devlop zot biznes.

Gouvernman i bezwen travay avek bann labank, an sa ki konsern, lentere lo *loan* lakaz ki 7poursan. E *loan* san sekirite li i 18poursan. Lentere lo *savings* li i zis 2poursan.

Ler ou regard sa lespas ant lentere lo *loan*, e lentere lo *savings*, i tre gran. Mon rapel dan sizyenm Lasanble, LDS ti anmenn en lager lo sa zafer lentere lo *loan*, e lo *savings*.

Alors mon pou demann Gouvernman pou fer sa ki zot ti promet pou fer ansanm avek Labank Santral, al negosye avek bann labank. E amelyor sa

problem lentere lo *loan* e osi lo *savings*.

Mr Speaker, Sesel ozordi Gouvernman pe konfiz nou lo son bann program. Pran sa size lakaz. Gouvernman i bezwen asiste dimoun, ki napa mwayen pou ganny en lakaz. E la ler mon pe dir en lakaz, i pa nenport ki lakaz. Me enn ki konfortab pou en fanmir viv ladan.

Ziska ozordi, bokou dimoun i ankor lo lalis kot *Housing* pe esper en lakaz. Mon distrik pa en leksepsyon. Gouvernman presedan in fer bokou an sa ki konsern lakaz sosyal pou asiste dimoun avek en meyer lozman.

Menm si i pa'n parfe, me bokou dimoun in benefisye. La nou'n ganny enformen, ki Gouvernman pe revwar kalite lakaz, ki i pou asiste dimoun ki ankor pe esper en lakaz.

Zot pe sorti lo proze *Social Housing* e pe al konstri *low cost housing*. Ti a bon nou ganny en bon deskripsyon, sa bann kalite *low-cost housing*, ki Gouvernman LDS pe al konstri, pou bann ki ankor pe esper en lakaz.

Dan son diskour, Minis in fer resorti ki Bidze 2022 pe fer provizyon pou konstri selman 37 nouvo lakaz. E fer provizyon met lenfrastruktir pou 88 nouvo

kare later. Me, mon vremen konsernen avek sa lanons. Akoz bokou dimoun pou vwar zot pe esper pou ankor bokou lannen.

Ler nou lo sa size later ek lakaz, mon oule fer resorti ki Anse Royale, sa proze 24 lakaz ti komanse an 2019 par Gouvernman US, pou byento pare pou mwan ganny enformen si selman 20, dan sa 24 lakaz ki pou vin pou zabitan Anse Royale. E 4 pou al pou Minister ki responsab pou Lilizasyon Later ek Lakaz pou donn dimoun ki sorti dan lezot distrik.

E nou devret note, ki nou napa okenn konstriksyon lakaz dan nou distrik an 2022. Kot i konsern later, mon espere ki sa lannen ki pe vini, alokasyon in ganny met dan Bidze. Ganny servi pou konplet lenfrastruktir pou proze *land bank* Dan Banbou.

E ki alokasyon i a ganny fer koman tou lenfrastruktir i fini ganny met an plas. Sesel an 2021, apre ki ou'n aste ou later, investir dan ou lakaz, konstrir ou fwaye, ou bezwen prezan vin gardyen tou sa ki ou'n fer.

Mr Speaker ozordi, ka vol e lezot krim in ogmante dan tou kominote. Voler nepli per, pou antre dan lakaz dimoun gran lizour, avek zouti pou vole e osi fer vyolans. I vremen enportan

ki bann diferan mezir sekirite, i ganny investir ladan e ganny desantralize dan bann distrik.

Sa i devret en size ki Minis dan son diskour Bidze, devan nou Lasanble ti devret adrese. Depi 2019, mwan ansanm avek ASP Ronny Julienne, ki ti Zofisye Ansarz Stasyon Lapolis Anse Royale sa letan, ansanm avek en group zabitan Anse Royale, ti'n travay lo en proze met *camera* sirveyans dan nou distrik, atraver kontribisyon CSR diferan biznes sa letan.

Me, nou pa ti aboutir sa proze akoz CSR in aboli. Me mon pa'n dekouraze. E avek larantre nouvo *ComPol* Mr Ted Barbe, mon'n remet sa proze devan li. E mon pou kontinyen swiv de pre, mannyer tou demars pe ale avek lasistans Lenspekter Monthy.

Mon espere, ki byento nou a kapab materyaliz sa proze enstalasyon *camera* dan nou distrik, pou ki nou zabitan e biznes ava en pe pli an sekirite.

Letan mon pe koz lo sekirite distrik, mon ankor enn fwa, mon'n ankor enn fwa ganny aprobe avek Mr Gilbert Frichot, en *businessman* dan Anse Royale pou li *sponsor* distrik, ankor apepre 40 *LED streetlights*, atraver son CSR lannen pase.

Mon oule dir en gro mersi Mr Frichot pou son komitman e zenerozite, anver distrik Anse Royale.

Mr Speaker, Anse Royale i en distrik, kot i gou viv. E kot nou zabitan, i bann dimoun ranpli ek talan. La nou annan enn dan sa Lasanble. Nou'n konn plizyer sikse, atraver nou bann *sportsmen*, e lekip sportif pandan bann lannen pase.

Mon note Bidze 2022, pe fer provizyon pou R3.75bilyon, milyon pou Anse Royale *Sports Complex*. Mwan, mon pou esper delegasyon NSC, vin dan Lasanble, pou mwan ganny plis detay lo ki zot pe vin *renovate*, akoz *sports complex* li menm pa ankor konstri.

Wi, nou annan bann diferan fasilite, parey en laplenn, *track and field*, ki demann en bon *maintenance*. Nou annan *court tennis*, ki mon'n ganny enformen ki detrwa endividi in apros NSC.

Pe demande pou zot fer reparasyon lo la, e servi pou montre bann zenn tenis. Sa i byen. Mon akeyir bann tel linisyativ. Mon profite pou dir sa bann dimoun ki'n vin devan pou ede, donn en koudmen dan devlopman *sports* dan Anse Royale. Mersi.

Nou osi annan *court basketball* e *court volleyball* ki

demann serten *maintenance* e osi *fencing*. Alors mon pou egzize ki NSC, i vin dan distrik e zwenn avek zabitan e *sportsmen*, pou donn plis lenformasyon lo sa size *sports complex*.

Mr Speaker, lasante en pep i devret primordyal pou nenport Gouvernman. Mon vwar dan Bidze 2022 ki *Public Health Authority* dan Minister Lasante in ganny en ogmantasyon dan son Bidze.

Mon rekomande ki servis lo nivo bann klinik e osi Lopital Sesel i amelyore. E ki bann pasyan ki lo bann tretman spesyalize i ganny zot bann tretman, oubyen latizann de kalite a tan.

Bann lekipman medikal ki pasyan i servi i touzour annan dan stok. E ki zot ganny tousala a tan san gran retar. Letan mon lo sa topik lasante piblik.

Mon oule demann Minister Lasante, pou pa bliy sa *Outpatient* Klinik Anse Royale ki mon konpran, i ankor lo *drawing board*. E ki bann zabitan, i ankor pe espere pou ki servis *outpatient* i ava sorti kot *inpatient*.

Savedir i ava sorti dan Lopital, e ki sa lopital i a ganny servi pou ladmisyon bann

dimoun malad, ki reste dan rezyon sid.

Fodre ki Gouvernman i *walk the talk*, lo sa ki, lo sa zot ti dir a plizyer repriz, ler bann *leaders* in vizit Anse Royale. Fodre ki zot vin a laoter lekspektasyon ki zot in donn sa pep.

Ledikasyon nou zanfan i devret touzour reste, priyorite en Gouvernman. Nou pou fer sir lo sa kote latab ki sa Gouvernman i kontinyen investir dan nou zanfan. E osi nou bann zenn, akoz se zot ki bann fitir dirizan.

Mon krwar ki Minister Ledikasyon pe ganny en Bidze, mon vwar ki Minister Ledikasyon pe ganny en Bidze en pe mwens ki lannen pase.

E mon espere, ki sa pa pou afekte loperasyon administrativ bann lekol. Depi 2019, Gouvernman US, atraver Minister Ledikasyon pe travay lo konstriksyon en lakres, modern Anse Royale.

E mon espere ki an 2022, sa proze i a konplete. E bann zanfan a kapab benefisye avek plis fasilite ki pou annan dan sa lakres. E osi pli gran lespas pou etidye dan en latmosfer pli konfortab.

An konklizyon Mr Speaker, mon konstate ki lannen 2022 pa pou enn ki

fasil, pa pou enn ki fasil ditou. Akoz dimoun pou kontinyen ser sang. Lamizer pou kontinyen ogmante. Akoz keksoz pa pe amelyore pou bann ki pli dan bezwen.

Gouvernman i kontinyen vin koz bokou koze lo zot lakonplisman. Me kwa ki zot pe fer ki reel pou nou pep, i reste difisil pou vwar. Mon demann zabitan mon distrik pou kontinyen reste rezilyan. Lavi pa fasil.

Me ansanm nou pou sirmont sa defi. Mon reste touzour akote zot dan sa bann moman difisil ki nou pe pas ladan. Mon swet tou mon zabitan kouraz, boner e bonn sante pandan lannen 2022. Ki Bondye i beni zot. Mersi Mr Speaker.

**(APPLAUSE)**

**MR SPEAKER**

Mersi Onorab. Prezan mon ava apel Onorab Philip Monthy.

**HON PHILIP MONTHY**

Mersi Mr Speaker. Bonn apre midi Mr Speaker. Bonn apre midi tou koleg Onorab. Bonn apre midi tou zabitan Cascade ki pe ekoute.

Mr Speaker, ler ou ekout serten group dimoun, e sa i enkli sa bann *MNA US* lo lot

kote latab, serten swadizan dokter, bann gran profeser lo *facebook* e serten ki swadizan, ti bann gran siporter *LDS*, ou pou krwar ki Sesel i en Leta ki'n fel. En *failed state*, parey nou dir an Angle.

Zot pou fer ou krwar ki nanryen ki sa Gouvernman pe fer pa bon. Zot a donn ou lenpresyon ki Sesel in retourn an 2008 ler sa Gouvernman *SPPF* - akoz son move zesyon nou lekonomi, zot ti faid sa pei, apre blanm sa lo kriz ekonomik mondyal.

Annan menm ki oule fer nou krwar, ki Prezidan Ramkalawan in pran sa Pei otaz. E zot pe menm sey fer sa pep krwar, ki sa swa demokratik ki zot ti fer le 24 Oktob 2020, ti enn ki ti move.

Mr Speaker, konman en kretyen, mon pou remersye Bondye, pou sa lasazes ki'n met dan sa pep, ki nou'n kapab fer sa desizyon, ki pe ede tir sa pei dan sa leta katastrofik e koronpi, dan la fason ki i ti pe ganny dirize dan lepase, anba sa Gouvernman *US/SPUP/SPPF*.

E met li dan lanmen bann zonn ek fanm Seselwa, ki vreman annan lanmour pou sa pei, ki apel Sesel. E la volonte pou fer en travay fran e onnet, san mazin byennet endividyel.

Mr Speaker, apre tou sa lannen ki nou'n lager pou tir sa pei dan lanmen sa parti ki'n anmenn bokou soufrans, viktimizasyon ek lanmertim parmi sa pep.

Plizyer dimoun i eksprim sagrinasyon, dan sityasyon ki Sesel e lemonn antye in retrouv li, ladan ler nou'n vin o pouvwar.

Annan ki eksprim lapenn pou Prezidan Ramkalawan. Akoz tou sa lager e sakrifis ki in fer, i ti'n devret ganny sa pei dan bann kondisyon pli favorab, ki sa. Be Mr Speaker, tou keksoz dan lavi i ariv pou en rezon.

E i annan en rezon akoz Bondye in swazir pou donn sa Gouvernman *LDS*, sa pei dan sa kondisyon, a sa moman. Kestyon ki nou devret pe demann nou lekor se ki leta Sesel ti pou ladan ozordi, si sete *US* ki ti'n ranport laviktwar dan sa dernyen Eleksyon.

Si an 2008, kot touris ti pe debarke par gran kantite, kot nou ti pe menm reve, kot nou pa ti pe menm reve, si pou annan en pandemik ki pou ravaz lekonomi mondyal an 2020.

Me kantmenm sa, sa Gouvernman *SPPF*, ti reisir faid sa pei. Seselwa i devret alors pe mazin ki leta nou ti pou

ladan ozordi anba en ladministrasyon *US*. Zis parey Onorab Georges in fer resorti dan son deliberasyon.

Mon bann frer ek ser Seselwa, Bondye i konnen ki i fer. E annou alors mazin de fwa avan nou konmans zis fer bann kritik ki souvan pa zistifye.

Les mwan mon a dir zot ki kondisyon nou ti pou pe viv ladan, si sa pep ti'n mal fer son swa.

Ler ou ekout ansyen Minis Finans dan Gouvernman *US*, e an plis ler ou pran kont sa kantite bal ki ti pe ganny donner dan sa *Scheme FA4JR*, enkli son *URS*. Labi dan bann lasistans sosyal, kart *STC*, milyon dan *rent* ki ti pe ganny, ki ti pe benefisye zis serten endividi byen privilezye, ou demann ou lekor, si tou travayer Seselwa ti pou pe anmenn en saler kot lakour lafen dimwan? Si tou fanmir ti pou kapab met en lasyet manze lo latab?

Ansyen Minis Finans ti fer kler, ki menm saler pa pou garanti an 2021. Avek sa kantite bal ki zot ti pe donner, plizyer travayer ti pou tre posibleman vwar zot napa swa me pou aksepte en koupir saler.

E kot trezyenm mwan saler ti'n fini ganny dir pa pou garanti. E la fason ki sa pou

ganny donner pou osi bezwen ganny revwar. Se ansyen Minis Lalanne, ki ti fer tou sa bann deklarasyon Mr speaker. Mon pa pe akont okenn zistwar la mwan.

Me ki nou vwar la,? zot oule krisifye *LDS*, ler pou byennet pei. An prenon kont ki lekonomi, an pronon kont ki lekonomi i ankor dan en defisit bidzeter. E nou'n deside sispann trezyenm mwan saler, zot pe fer zot pas pou bann bon boug, ki annan byennet sa pep a ker.

Kan zanmen zot in deza reve pou donn sa pep en trezyenm mwan saler. Zot devret kanmi pou menm pronons sa mo trezyenm mwan. Akoz zanmen zot in vreman annan en leker pou sa pep, apard ki zis rod bann mannev, pou kapab anbet sa pep zis pou ganny vot.

En kapasite sa Gouvernman *US* pou pran bann desizyon brav e ki pa popilis, ti pou fer ki sa pei ti pou anfans plis ankor. Se sa leta ki nou ti pou ladan mon bann ser ek frer Seselwa, si nou ti'n remet sa Gouvernman ki annan en latitid lese fer o pouvwar.

Me *LDS* i en parti ki son prensip i konpletman diferan avek sa parti ki konmela i apel son lekor *US*. Zis pou sey fer sa

pep krwar, ki zot en nouvo parti e zot bann lanz. Me parey sa dikton i dir nou, “en leopard pa zanmen sanz son bann tas lo li.”

Mr Speaker, mon konnen tou Seselwa ki annan en serten laz, pou bezwen mazin sa bann lepok, kot nek zis swadizan per fondater ti demann nou bann Seselwa ordiner pou ser sang.

Me pandan ki nou ti pe sere menm, kot ni komodite dan laboutik ti napa, kot sa peryod nou listwar nou rapel li byen konman peryod ‘napa’, en serten group ti pe byen pase.

Laferm Lostrali, sepa konbyen morso later, kont dan bann labank aletranze, plizyer lakaz pou bann galan, blok flat partou kote, lalis i long Mr Speaker.

Me sa Seselwa ordiner ki i ti pe fer pandan sa letan? Nek nou ti pe ser sang menm. Nou ti sere, ziska lapo vant ti koste ek led. Me zot, sa bann privilezye, zot ti pe riye, *all the way to the bank!*

Seselwa pa en Nasyon ki bliy vitman. Sa bann labi i ankor vif dan nou lespri. E se pour sa rezon, ki zot vwar zot ozordi, pe sey aprann ki mannyer pou vin en Lopoziyon.

Sa i tou senpleman rezilta zot bann aksyon koronpi, ki sa pep in ganny ase avek. E pa pou zanmen retourn ankor dan sa peryod nwanr nou listwar.

Alors Mr Speaker, Seselwa i bezwen konpran ki si pandan sa bann peryod kot pei ti sipoze pe fer byen. Me kantmenm sa, nou ti pe ganny demande pou fer sakrifis, zot bezwen dakor avek mwan, ki prenon kont sityasyon ekonomik mondyal, e sityasyon ekonomik Sesel, i demande ki nou mentenir en disiplin strik, en disiplin fiskal strik pou ankor en pti pe letan, avan nou konmans vwar nou pe benefisy direkteman.

Ler sa bann reform ki pe ganny inisy, par sa tim teknisyen konpetan, i remet sa pei lo semen prosperite ankor. Se sa ki sa Bidze pe demann nou pou fer Mr Speaker.

Mon’n dir ankor en pti pe letan, akoz deza ler ou get sityasyon pei kot i ti ete ler nou’n vin lo pouvwar e progre ki nou’n fer dan lan, nou pa pou bezwen esper 2025. Zis avan eleksyon, pou pas dimyel lo bor ver parey US i oule fer sa pep krwar.

Mon konnen akoz zot pe sant sa sanson dimyel lo bor ver avan eleksyon. Akoz se zot bann spesyalis dan sa domenn Mr Speaker. Se zot ki abitye pas

dimyel. E apre ki zot in ganny elekte, sa pep i konmans pas atraver, tou sort kalite soufrans.

*LDS* pa en parti ki pou vin zis anbet sa pep avek bann zoli promes, zis avan Eleksyon parey zot abitye fer. Si nou ti parey zot, sa bann desizyon brav e ki pa popilis, ki Prezidan Ramkalawan in pran pou redress sa pei pa ti pou'n ganny pran.

Akoz nou, nou get byennet pei avan mazine, si nou pou perdi vot, ouswa non. Apre ki nou'n pran tel, ou tel desizyon.

Plizyer sa bann mezir ki'n ganny anonse ti'n devret ganny pran byen lontan Mr Speaker. Me sa Parti *US* pa en parti ki annan kouraz. Zot zis koze, koze, e koze. Reform dan sistenm pansyon, ogmant laz retret, pri bis, tousala zis zot ti koz lo la.

Me zanmen annan kouraz pou vin devan sa pep, ek sa bann lanons ki si ti'n ganny fer depi avan petet ti ava soulaz sa pei, en pe plis. *LDS* pa en parti ki kapon Mr Speaker. Dan zis lan lo pouwar, deza nou pe temwanny bann progre remarkab, ki Sesel pe fer.

Parey Minis Finans in fer resorti dan son ladres, nou'n erit en pei kot sityasyon ti

vreman trakasan, kot pandan sa premye 3mwan lannen 2021, zis 6,785 touris ki ti antre Sesel.

E deviz ki ti pe pas atraver nou sistenm banker, e Biro Lesanz, ti zis \$118milyon. Pandan sa menm peryod, mon mazine Seselwa i rapel byen, en Dolar ti pe kout an mwayen R21.50, e larzan kolekte atraver *tax*, ti zis R1.4bilyon. Pei pa ti dan bon ditou, Mr Speaker.

Avek reouvertir nou lafrontyer, an Mars 2021. Pandan ki bann gran savan ti pe pas zot letan kriy *lockdown*. E ti pe esey tou, pou dekouraz sa pep pou pa pran vaksen, ki nou'n vwar?

Pou peryod Avril, ziska Oktob 2021, deviz ki ti pas atraver nou sistenm banker e Biro Lesanz, ti \$366milyon. E Dolar ti desann pou ariv R15.

E la Mr Speaker, olye apresye sa bann progre enorm ki nou lekonomi in fer dan sa pti peryod letan, i annan ti refize aksepte sa realite, e konmans dir ki annan trik dan zwe.

Sa i montre ou klerman, ki priyorite sa bann dimoun se pa byennet Sesel e Seselwa. Me plito zot prop azanda personnel, kot si pei i anfans plis dan defisit, pou zot sa i en lavantaz. Akoz zot a kapab servi sa pou



fer zot bann politik bon marse avek e kree dout dan lespri nou pep.

Mr Speaker, Onorab Cosgrow i kontan dir ki *LDS*, in vann Seselwa en kabri dan sak. Atraver ou Mr Speaker, mon ti a kontan donn Onorab Cosgrow, en pti leson lo sa dikton 'kabri dan sak.'

Ler Albert Rene ti fer koudeta an '77. E apre i ti vin lo radio Sesel, pou anbet Seselwa an dizan ki en group zom in deside ranvers pei, e zot in apros li pou vin Prezidan e in aksepte. Sa ti en kabri dan sak!

**(APPLAUSE)**

**HON PHILIP MONTHY**

Ler i ti dir tou Seselwa, pou lib, pou partisip dan devlopman politik e ekonomik pei. Apre li menm li i ti dir avyon i pase, bato i pase, sa ki pa kontan kite ale! Sa ti en kabri dan sak!

**(APPLAUSE)**

**HON PHILIP MONTHY**

Ler sa ki ti opoze ti vwar li deryer en baro feray, parey ou Mr Speaker, kot annan osi ti zis disparet, sa ti en kabri ki sa Gouvernman *SPUP* ti vann Seselwa atraver koudeta.

E pa bliye, pa tro lontan, ler zot ti vin dir Seselwa ki zot

pou *forgo* zot bann benefis, an solidarite avek sa pep. E apre zot ti pas par laport deryer, Onorab Cosgrow parmi, sa ti en lot kabri dan sak Mr Speaker!

**(APPLAUSE)**

**HON PHILIP MONTHY**

E sa, pa ti zis en pti ogmantasyon 2500 *entertainment allowance* sa. Me nou pe koz milyon la, Mr Speaker. Bann lepok vin anbet Seselwa in fini, e pa pou marse.

Si zot anvi en zour reganny sa sans pou diriz sa pei ankor, mon pou konsey zot pou rekalkil zot lapros ki zot in swazir.

Mr Speaker, atraver sa Bidze Gouvernman in fer sir ki menm si nou ankor pe *run* en defisit bidzeter. Gouvernman in mentenir tou son depans.

E sa pou fer sir ki sa moman difisil e ki nou pe pas ladan, pa vin pli difisil ankor pou nou bann sitwayen ordiner. Mon ti a kontan nou pep i aprann apresye sa Mr Speaker.

I parey en papa oubuyen en manman, ki met son lafyerte de kote dan moman difisil. E al pret larzan avek vwazen, pou kapab pey son bann det. E fer sir ki son bann zanfana pa dormi vant vid.

Ler sa vwazen in pret ou sa larzan, ou pa kapab prezan les ou zanfan vant vid, e al pey en tiket pou al *Dubai*. Pa koumsa i marse sa. Ler ou ekout sa bann *MNA US* lo lot kote latab, se sa ki zot pe dir nou fer.

Me Mr Speaker, vant Seselwa i priyorite sa Gouvernman *LDS*. E nou, nou pou tay nou palto, dapre grander nou latwal ki nou annan. Ler ou pret larzan, ou pa kapab fer bann depans grandyoz, sankwa sa krediter ki'n pret ou sa larzan, pou vin repros ou.

Priyorite sa Gouvernman *LDS*, se fer sir ki sa pep i kontinyen ganny akse avek tou servis nesaser, a sa moman aktyel ki nou ladan.

Priyorite se fer sir ki okenn travayer Seselwa pa pou bezwen pran en koupir saler, parey *US* ti pe mazin al ladan. Se sa ki sa Bidze pe fer.

Mr Speaker, atraver bann desizyon dir e brav ki sa ladministrasyon *LDS* in pran, me ki pa'n fasil, sa pe ede pou stabiliz nou sityasyon ekonomik.

Ler nou ti deside inyor sa kantite tapaz ki *US* ti pe fer, lo la fason ki dapre zot sa sityasyon *COVID* ti pe ganny zere, me pou reouver nou

Erport, nou'n vwar ki sa in ede relans nou lekonomi.

Zot ti akiz Prezidan Ramkalawan konmkwa li ki responsab pou lanmor sa bann dimoun ki'n *décéder* avek *COVID*. Serten zot bann dokter *facebook* ti pe dir, ti pe dir nou pran legzanp lo *Maurice*. Mr Speaker, tout an montran mon solidarite avek pep Morisyen. Akoz mon annan zanmi pros *Maurice*, e mon annan menm zanmi dan Gouvernman Morisyen.

Akoz 62 ka lanmor, dan en semenn i sagrin mwan bokou. E sa i devret fer nou dir merci sa Gouvernman *LDS*, Dr Gedeon, ek tou travayer lasante pou sa travay ekselan ki zot in fer. Menm si annan, ti pe priye pou nou sityasyon vin pli pir.

Me menm si nou'n fer progre, parey Minis Finans in fer nou remarke, reperkisyon ankor pe kontinyen e lekonomi pa ankor rekipere a 100poursan.

E i enportan ki nou kontinyen ini ansanm, konman en pep pou rekonstrir nou pei. E pa les nou ganny divize par sa trwa fo profet, e sa bann nanryen fer ki vin apiy Lorloz tou le sanmdi.

Akoz nou konn tre byen ki zot bann dokter dan senm lafreyer ek konfizyon, parey zot

bann reprezantan la anndan dan sa Lasanble pe esey zot mye pou fer.

In ganny dir ki napa nanryen dan sa Bidze pou bann zenn. Be Mr Speaker, mon vwar R11milyon pou mentenir e *upgrade* bann fasilite sportif.

Kestyon se lekel ki pe pratik sport dan pei? Nou bann trwazyenm-az? Tou sa bann lenfrastruktir sportif, in ganny les tonm an rin anba sa ansyen Gouvernman. E Onorab Sophola menm in admet ki laplenn La Digue in ganny abandonnen. Kestyon se lekel ki'n *MNA* lo sa zil pandan tou sa bann lannen?

Mr Speaker, Bidze 2022, i fer en provizyon R273milyon i pou *scholarship*. E sa a permet ki nou bann zenn a kontinyen pourswiv zot letid lo nivo iniversiter, pou asir relev pli tar.

Alor Mr Speaker, mon pa pe konpran ler bann *MNA US*, i vin dir nou ki napa nanryen dan sa Bidze pou bann zenn. Minis in osi anonse ki pou annan fasilite kredi atraver *Nouvobanq*, a en to lentere tre ba ki pou 5.5poursan.

Mon asire ki nou bann zenn profesyonnel, pe akey sa nouvel avek bokou lentere. Akoz finalman, sa i a permet ki zot a kapab pran zot desten dan zot lanmen, e konstrir zot prop

lakaz. Olye vwar zot ganny kit ater, a sak fwa ki annan bann proze *condominium*. Akoz zis serten privilezye, ki ganny akse avek sa prodwi Mr Speaker.

Provizyon pou *grossup* bann saler, ki dezormen bann *allowance* a form parti lapey de baz, pou permet nou bann sitwayen pou pli fasilman, ganny akse avek kredi. I a osi fer ki zot benefisye plis, ler bann benefis i ganny kalkile.

Sa i en demars ki lontan bann travayer pe demande Mr Speaker. Me sa ansyen Gouvernman ki ti sipoze annan en leker pou tou Seselwa, ti sourd lo zot.

In ganny dir ki Gouvernman *LDS*, pe zis vin koup riban bann proze ki *US* in konmanse. Mwan Mr Speaker, mon annan sa pou dir, en zanfan ler i ganny konsevwar, i bezwen apre pas dan prosesis nesans, kot avek lanmour son paran, ek swen nesaser i grandi pou vin en sitwayen responsab.

Ki kantite sa bann proze ki pe ganny konplete anba Gouvernman *LDS*, ki *US* ti'n zis taye pou konmanse, me apre in zis aret dan semen? Proze bazar Cascade i en legzanp. Zis 1an o pouvwar, proze i deza dan en staz avanse, avek en provizyon R4.3 milyon ki'n ganny bidzete pou konplete.

Sant Sosyal Cascade, in brile depi plis ki 6an pase. E nou bann zenn dan distrik pandan tou sa lannen, zot in napa en landrwa kot zot kapab angaz zot dan bann aktivite sosyal e edikatif.

I pa drol si plizyer zot in tonm dan labi sibstans. Sa enn proze i deza dan faz *tender*. E tre byento konstriksyon pou konmanse.

Avek zis R200mil ki nou'n gannyen dan distrik pou 2021 nou'n kapab konplet en proze pou soulaz soufrans bann zabitan dan leo Cascade, an alan kot *waterfall*. Ki ler lapli i tonbe, ti fer li enposib pou sa bann zabitan travers sa pon menm si ou ti dan en transpor.

Sa sityasyon i enn ki sa bann zabitan ti pe viv avek pandan plizyer lannen. Me nanryen pa'n ganny fer dan lepase.

Lot proze ki pe al konplete se touzour pou rezourd en problem *flooding*. Safwasi Petit Paris, kot la ankor Mr Speaker, sa bann zabitan sa rezyon pe fer fas ek sa sityasyon, pandan plizyer lannen, me nanryen pa ti'n ganny fer.

Avek R700mil ki'n ganny *allocate* pou bann proze distrik pou 2022 i a fer ki nou kapab, nou pou kapab konplet plis proze dan distrik. E la mon anvi

dir ek mon bann zabitan ki mwan, ansanm ek *DA*, bann zofisyete proze sorti Gouvernman Lokal, pou idantifye. E ti lo teren yer pou idantifye e dokimant bann proze ki pou ganny antreprann an 2022. E ki pou ede pou anmenn plis konfor ankor pou nou bann zabitan.

Mr Speaker, ler mon tann mon bann koleg, lezot koleg *MNA* pe koz lo lakantite proze lakaz, ki pe ganny antreprann dan zot distrik, mon pou dir bann zabitan Cascade ki nou sanse.

Nou annan sa premye proze *24unit* ki dan en staz tre avanse. E i osi annan provizyon pou plis *unit* lakaz ankor dan distrik. Mon'n ganny sans vwar sa bann plan, landrwa in fini ganny idantifye. E mon zis swete ki finansman, a kapab ganny konfirman, pou ki sa bann proze a kapab demare byento.

Mr Speaker, mon oule dir sa bann manrmay ki vin zve *football* lo *court* dan aswar, ki byento *court* pou ganny en nouvo *fence*, pou permet zot pratik zot *sport* dan meyer kondisyon posib.

Laplenn *football* Anse Dejeuner, pa zis ganny netwaye detrwa mwan avan Eleksyon. Me sa laplenn i lo en *schedule*

netwayaz e koup zerb par NSC. Ki fer ki i prezan fasil pou sa bann zenn servi sa fasilite ler zot anvi.

Mr Speaker, annan plizyer lezot proze parey *resurfacing* bann semen segonder. Ki nou bann zabitan zanmen ti pe ekspekte si pou arive, prenon kont lakantite lannen ki zot ti pe espere.

Cascade pe bouze pti-a-pti, menm avek resours limite. Plizyer mon bann zabitan in fer sa remark avek mwan. I reste ankor bokou pou nou fer. E la mon pou lans en lapel avek bann gran *businessmen*, ki zot *business* i baze dan mon distrik, oubyen lo *Zone* Endistriyel Providence, ki trouv dan mon distrik.

Pou vin devan e ede dan devlopman distrik Cascade. I annan plizyer ki deza pe fer sa. E mon pou profite pou mwan remersye zot.

Annan en bon lanbyans kot sa pti bazar tanporer ki nou'n fer, menm si nou ti rankontre serten rezistans o konmansman. Akoz mon ti krwar ki sa later i pou distrik e non pa propriyete prive serten endividi.

Mr Speaker, mon bann zabitan ti fer listwar dan dernyen eleksyon, ler zot ti met zot konfyans dan mwan pou

anmenn nou distrik lo en lot nivo. Mon promet zot ki mon pa pou zanmen dezapwent zot. Akoz mon sel lentansyon, se vwar mon distrik devlope e kondisyon mon bann zabitan amelyore.

Napa nanryen ki pou ariv avek en baton mazik. Me mon asir zot ki mon pa'n vin la pou anrisir mon lekor, avek plizyer morso later, ki swa dan distrik, oubyen lo *Zone* Endistriyel.

Mon la pou fer en travay onnet, san preferans politik e favor. Ian in pase, e i reste ankor 4an pou ale. Annan investiser ki pe montre lentere, pou vin *invest* dan bann proze lotel dan nou distrik. E mon bann zabitan i a ganny met o kouran, o firamezir ki sa bann propozisyon i ganny analize e konsidere.

E zot partisipasyon osi dan bann miting konsiltasyon, pou ganny konsidere. Bann tel proze a ede kree plis lanplwa pou nou zabitan. E anmenn touris direk dan nou kominote.

Mr Speaker, mon en dimoun ki ler mon annan en travay pou fer, mon konsantre dan mon responsabilite, ki mon annan. E mon inyor tou tapaz otour mwan.

Mon konnen ki dan lavi, ou pa pou kapab fer plezir tou

dimoun. Me en keksoz i serten,  
*Mon pa pou zanmen les tonbe!*  
Mersi.

**(APPLAUSE)**

**MR SPEAKER**

Mersi Onorab. Mon krwar nou a pran poz la. Me selman nou a retourn en pe boner. Nou a retourn, 3er50 - 4er mwen 10. Mersi.

**(BREAK)**

**MR SPEAKER**

Bon nou a kontinyen. Mon apel Onorab Sathya Naidu, pou son entervansyon.

**HON SATHYA NAIDU**

Mersi Mr Speaker. Bonn apre midi Mr Speaker. Bonn apre midi Minis. Bonn apre midi tou koleg Onorab ki prezan. E en bonn apre midi spesyal pou zabitan Saint Louis ki a lekout e pe swiv sa sesyon.

Ladres Bidze par Minis le 12 Novanm ti'n dire pou apepre 90minit. In tous lo plizyer size. E ler mon'n regard sa diskour, e mon'n tann sa diskour. Mon kapab dir ti'n vin dan trwa staz.

Premye staz i ti'n kouver lo nou bann lakonplisman, dezyenmman in adres bann defi, e in koz lo bann defi dan en

fason fran e onnet. E in osi trwazyenm staz met devan, en plan lo ki mannyer eski sa larzan an term 10milyon, en pti git an plis pou ganny depanse pandan lannen 2022.

Son diskour ti en diskour ki ti'n prezant en plan ki realistik, ki anliny avek sa sityasyon ki nou pe pas ladan. Annefe an 2008, dernyen fwa nou ti'n tann *IMF* ti sa letan kot zot ti'n vin devan e zot ti'n donn nou sa sipor nesese.

E sa letan ti annan apepre 8 kriter, ki ti pe ganny servi. Si zot pou regard, bann program ki nou ti'n bezwen swiv i en pe parey ozordi. Par ler listwar i repet son lekor. I tant pou repet son lekor ler nou pa aprann lo nou bann fot ki nou komet.

E i aparet ki Gouvernman presedan in repet menm fot. E ozordi, nou ti'n bezwen erit pei, dan en moman difisil. O komansman sa lannen, mon rapel Minis ti pe fer resorti ki nou pe rod *budget support* avek *IMF*.

Me o komansman, mon santi ki *IMF* pa ti pare pou donner. Baze lo sityasyon ekonomik, e nou ti'n bezwen pran en mezir ase brav pou reouver nou frontyer. E sa letan, ler nou'n ti'n fer sa nou ti'n ganny vaksen a en dele letan apropiye.

Enn bann premye pei dan Lafrik anefè, ki ti'n ganny vaksen *sinopharm*, apre ki Prezidan Ramkalawan ti'n al UAE. E mon osi bezwen felisit, Minis Radegonde pou sa travay ki'n fer pou asire ki nou Sekter Tourizm, i retoun lo en nivo ki akseptab.

Annefe an sa ki konsern nou performans fiskal. Nou'n sirmont, ouswa nou'n sirpas tou nou prediksyon. Sa i montre ki nou pe fer tre byen. Lo size vaksinasyon, byensir lot kote zot ti'n obzekte. Zot ti pe dir *lockdown*. Me wi ler nou ti dan Lopozisyon nou ti dir *close down*.

Me selman sa letan nou pa ti konnen ki savedir COVID-19. Nou pa ti konn severite COVID-19. E COVID-19 sa letan ti pe ravaz lemonn. Lemonn li menm pa ti konpran ki savedir COVID. Me ler nou, nou ti pe pran en desizyon, pou reouver frontyer, nou ti rekonnèt ki ti napa akse aktivite ekonomik a sa letan.

E nou ti'n vreman dan en kriz, e nou ti'n bezwen pran sa desizyon. E vaksen, in ede. E se pourtan pou sa rezon nou'n annan bann pei ki'n vin ver Sesel.

E in annan moman kot, *the infection rate* ti'n monte. E *Israel* par lenstans zot pa ti

desann Sesel. E alors, annou azir dan en fason konsyan, pou realize ki COVID pa ankor ale. Nou Sekter Tourizm i reste frazil. E fodre nou kontinyen swiv bann restriksyon ki an plas.

Mon pa kontan met sa mas, me selman mon swiv gidans lasante. E anefè nou tou nou pou met nou mas. Akoz? Pou protez nou kont sa viris. E i enportan ki sa pep laba deor zot konpran nou pa ankor sorti an sa ki konsern, *victorieux*, anliny avek sa lalit kont COVID.

E COVID in kontribye ver sa sityasyon ki nou la ozordi. E byensir en sistenm US ki'n mal zer larzan piblik, in fer keksoz vin bokou pli pir.

Lo bann size ki'n ganny adrese, nou'n tous lo tourizm. Wi nou bezwen *package* nou Sekter Tourizm dan en serten fason pou atir bokou plis touris, pou desann Sesel, pou depans zot larzan. E par ler nou santi, napa ase loportinite ki nou pe kree, pou kapab fer touris depans zot larzan.

E ler nou pe get lavil. Mon swe se ki Mer Lavil, i kapab enterakte avek mwan, avek sa 5 lezot Onorab, kot nou bann distrik i baliz avek lavil. E fodre ki nou annan en konversasyon pou fer nou lavil vin en landrwa

ase vibran e vivan. Fodre ki lanfaz i ganny mete sa lannen pou fer le neseseer lo sak kote.

Lo size ledikasyon, ankor en fwa nou Gouvernman pe montre lentere ver bann zenn. Safwasi, i annan en larzan ki pe ganny bidzete pou *scholarships*. E lannen pase ti annan en bon pe zot ki ti en pe krentif aköz zot pa ti pe ganny sa loportinite pou zot vwayaze pou zot fer zot *course*.

Ankor enn fwa ti annan en lyen avek *COVID*. Me safwasi nou vwar ki, menm pou vwayaze konmela ou bezwen pran ou vaksen. So pou bann ki pa ankor pran zot vaksen, la, i lemoman pou zot fer le neseseer aköz konmela, kot nou pe arive, nou bezwen vaksen paspor *by the looks of it*.

E alors, lo kote ledikasyon nou pe montre nou lentere ver bann zenn. Mon remarke ki i annan en plan pou revwar *curriculum* lo en baz Nasyonal, pou fer sir ki i reflekte larealite sa sityasyon ki nou viv ladan.

Mon swe se ki *personal social studies*, i ganny revwar, aköz i en neseseer, i en priyorite, pou enkilke bann valer ki pou kapab permet nou ganny en zenerasyon ki pou bokou pli responsab.

Kot nou pe pa vwar zot pe tonm dan bann latrap ki laba

deor, tel ki drog, e *teenage pregnancy* e plizyer lezot problem ki pe enpakte zot lavi negativman. Fodre ki pou donn zot bann zouti neseseer, a en tre zenn az pou zot konpran ki savedir lavi.

E i enportan ki sa size, i vin en size ki *examinable*. Aköz pli gran legzanmen dan lavi, se lavi li menm. E fodre ki nou kapab edik bann manrmay an sa ki konsern sa. E i enportan ki paran osi, i pran zot responsabilite o serye ver zot zanfan.

Bokou fwa, mon vwar dan nouvel bann *high performers*. *I'm sorry* parler zot lorizin se Azyatik. Zot pe koz an Angle poudir ki mannyer, zot in travay pou ganny 5 a 4 As.

Mon swe se ki mon vwar plis manrmay pe prodwir bann rezilta. Me selman nou bezwen realize, nou bezwen realize, ki i annan serten etik ki vin avek sa bann rezilta.

E i enportan lo kote, disiplin, i annan en lanfaz adisyonnèl ki ganny mete. Pou nou kapab asire ki bann manrmay i konport zot. *Good discipline will equate to good performance*. E nou bezwen, kapab met en kantite lanfaz lo la.

An sa ki konsern lasante. Lasante wi, byensir i en



priorite. E mon oule pran sa moman, pour felisit tou bann travayer dan lasante. Mon konnen, i pa'n fasil ditou. E mon konnen ki i annan en posibilite, i kapab vin bokou pli entans an sa ki konsern sa travay ki zot pe fer pou gard nou sen e sof.

E ler nou pe regard *procurement*. E i enportan ki Minis in souliny sa, poudir ki zot pe regard ladan. Akoz in annan en kantite gaspiyaz, dan lepase an sa ki konsern medikaman. E ziska ozordi, nou tande poudir i annan en ta medikaman ki'n ekspire. So i enportan ki nou get byen ladan.

E nou pe met lanfaz lo labi sibstans, drog, nou pe koz lo prevansyon. Mwan mon santi ki nou bezwen met lanfaz lo lasante mantal. 43an sa sistenm ki'n la, zot pa'n vreman get dan bann servis lasante mantal. I en dan en leta deplorab.

E nou pou bezwen travay fortman. Mon dakor pou vwar ki i annan larzan pou en sant reabilitasyon. Sa ti la lannen pase, mon swete ki sa lannen sa nouvo lazans ki'n ganny etabli. Pour delivre lo bann proze kapital, i met sa lanfaz par deryer sa pou asire ki nou koman en Gouvernman *du jour*

ki la, nou en Gouvernman ki serye lo kote lasante.

E, lo size akse avek medikaman, mon vwar *S.I. 25. Cannabis* lo en laspe medisinal, spesifikman. Mon pa pe koz lo plantasyon, mon pa pe koz lo nanryen. Mon pe koz lo laspe medisinal. *S.I. 25* lafason ki i ete, mon vwar li dan en fason ki vreman *restrictive*.

E ou a dir zot in zis pas sa regilasyon baze lo en *court case*, ki ti'n ganny anmennen, senpleman pou bous lizye dimoun. So sa i en keksoz ki enportan pou nou kapab koz akse avek medikaman.

Lo kote *public service*, i byen ki nou pe adres sa defi. Mwan menm mwan personnelman, ler mon pe sey angaz avek serten Departman, mon pe ganny en retar. So sa dimoun ki laba deor, en dimoun ordiner, ki pe sey fer le neserer pou li kapab ganny en, sa led avek Gouvernman.

Li osi pe fer fas ek sa retar. E mon swe se ki bann *public servants*, sa 10,400 ekek zot ki la, pa ekout sa bann parol ki sa bann dimoun i dir dan zot Konvansyon poudir anmenn politik dan travay.

E i kler ki bann azanda koumsa ki met nou pei an retar. E se sa ki kree enstabilite, akoz bann dimoun i fristre akoz zot

pa pe ganny sa servis. So i enportan ki nou pe regard dan *public service*, nou pe koz lo *result based management*.

E i annan en plan byen detaye, kler poudir lafason ki i pou ganny enplimante. E mon swe se ki ler, nou pou vwar enplimantasyon sa program ki an plas. Dimoun pou kapab, dir wi. I en sistenm ki'n la pou plizyer lannen.

Me selman lafason ki sa sistenm ki pe fonksyonnen anba nou Gouvernman, anba nou direksyon, anba nou direktiv i enn ki efikas. Lo kote distrik, mon bezwen desann en pe dan distrik - Akoz mon'n pas, port-a-port. Mon'n fer serten komitman.

E zabitan Saint Louis, in vot mwan, in vot pou mwan zot in anmenn mwan isi pou kapab, delivre lo serten keksoz. E mon rekonnèt travay ki mon predeserer in fer. In debat fortman pour drwa mon bann zabitan.

E i annan keksoz ki mwan mon'n vwar, ki li in dir ki apre mwan mon'n kapab fer en swivi lo teren. Enn bann legzanp se travay ki li in fer pour lafanmir Adela. In koz pou zot, in koz pou zot. E la sa lannen, zot in ganny 5 *unit*, pou zot kapab antre, pou zot kapab viv dan landrwa konvenab.

Wi, zot kapab dir sa ti en proze *US*. Zot ti kapab dir kontinyasyon. Me pour nou kapab fini sa travay, i annan en ta lezot keksoz ki nou, nou bezwen fer. E lo nou kote sa leksperyans ki mwan mon'n pas ladan avek *MHILT*, *there was a lot of work that had to go!*

So pa krwar keksoz i fasil, pou fini bann proze ki pozeman zot, zot in komanse. E nou, nou pe fer li dan en letan - dele letan bokou pli rezonnab. Zis get tou bann bazar ki'n ganny fer atraver *SFA*.

Minis Dezinyen pe fer en travay fantastik. Nou vwar partou kote, devlopman. E dan distrik Saint Louis osi in annan devlopman. Lo size *housing* in en problem ki'n la pou plizyer lannen pou nou distrik, pou nou tou.

E mon'n kapab prezant en rapor avek Minis Billy Rangasamy apepre 10 paz. Mon'n donn tou lenformasyon, lo bann problem ki mon bann zabitan pe fer fas avek dan bann *housing estate*. Zot, zot pe dir ki zot in donn nou lakaz?

Mon anmenn Onorab Wallace Cosgrow kot ex-Gees, kot apepre 16 a 20 *unit* pe *crack* partou. *This is your legacy!* Zot in fer bann lakaz la ozordi, zot dan en leta deplorab. E nou

bezwen depans en kantite larzan vizavi *maintenance*.

Be mon apresye ki travay ki mon'n kapab fer, konzwent avek Depite *CEO PMC*. Dan 9 *housing estate*, 3 pe al pas anba *refurbishment*. Sa se ex-Gees, Dan Koko, avek Rue Frère Mariste.

E lo size Dan Koko, *huh* konnen ki'n arive? Bann dimoun in fini pey pou zot lakaz zot, zot pe atann lavant! Ler mon al get bann korespondans, zot dir *technical issues*. 3an pase sa! 3an pase zot dir *technical issues*. *And you know what the technical issues is?* Zot ti'n perdi plan. *Huh!*

Be se sa kalite sistenm ki nou ti'n annan. E ou konnen ki pe arive? Travay pe ganny fer. Zot pe fer bann plan pou dimoun ganny zot lavant. *This is your legacy once again*.

Lo size, lakaz li menm, dan sa 37, nou pe ganny 6 *unit*. Pa en gran zafer. Me touzour en keksoz. E lo size later. Nou'n toultan ganny dir lo kote Saint Louis, i annan mankman later, napa later. I annan travay ki nou lo kote Lotorite Distrik, nou'n antreprann, pou kapab idantifye bann diferan landrwa.

E ou konnen menm si lakaz pa pe al ganny fer *at least* lo kote planifikasyon e plizyer lezot travay, i ava ganny fer. E

kekfwal ler 2023-2024 sityasyon i amelyore. O tan ki lemond li menm, i pe pas atraver sa transformasyon ki nesesser, nou pou kapab fer lakaz.

E nou pou kapab delivre, atraver bann plan ki nou, nou koman Gouvernman *du jour* ki nou annan. *Social housing* zot pe dir *low cost housing*. *Well* i parey en semen, ou annan diferan grad loto. Be finalman ou pe dray, ou pe ariv ver ou destinasyon.

I pou annan serten dimoun ki pou *afford* en *i10*, i pou annan en lot ki pou kapab *afford* en *Mercedes*. *But you have to do it within your means*. E i enportan, pou nou pa pran sa *low cost housing and then bring it down* konmsi en move keksoz.

Mon ti apresye si Minis dan son repons i ti kapab fer resorti ki kalite materyo zot pou itilize, ler zot pe konstrir sa lakaz.

E mwan mon santi ki bann dimoun ki pe rod en lakaz *they just want a place to live in which is conducive*. I annan en ta problem *overcrowding* partou kote. E dan Saint Louis, nou annan apepre 139 dimoun. E ou konnen sa sistenm 43an ki'n la, ler mon pas dan sa bann lalis, ler mon regard sa kantite pwèn, ouswa sa kantite keksoz

ki zot in akimile. Ler mon zot regard zot zistwar personnel. Ler mon vwar dimoun pe vin plere, devan mwan, i irit mwan, i fer mwan vreman ankoler!

E ler mon regard lafason ki lakaz osi in ganny distribye, zot in zis met politik dan lakaz. E les mwan zis dir dan kote Saint Louis, mwan mon pou fer sir, ki si i annan kriter sa bann kriter i pou ganny aplike ler i konsern *Housing Allocation Committee*. Sa i fason ki nou, nou travay.

Lo size sant kominoter distrik Saint Louis, o bor sant kominoter, Mr Speaker i annan tou sord tranzaksyon ilegal ki arive. E i annan tou sord kalite aktivite delenkan osi ki arive. E mon lofis i pa tro lwen. Toulezour mon vwar sa bann keksoz ki pe arive.

E mon vwar bann zenn, manrmay. E mwan koman en zenn ki le vwar bann zenn pe viv en lavi bokou pli meyer, i afekte mwan sa – toulezour! E zis o bor li, i annan en laplenn dan en leta deplorab. En *basketball court*, pli *move* ankor.

E dan son totalite sa landrwa *it's very depressive*. E mon demann mon lekor, kwa ki sa sistenm ki'n la tou sa lannen in fer? Wi dan Lasanble in ganny fer resorti a plizyer repriz. Me ni en fwa, zot pa ti

vreman annan mon bann zabitan aker, senpleman akoz politik!

Sa latitid met politik, ouswa tret dimoun dan en diferan fason, ouswa pou zis pou favoriz zis en serten group, se sa ki'n anmenn zot dan Lopozisyon ozordi.

E an sa ki konsern sant kominoter, mon pe retourn lo la. I pou annan travay ki pou ganny fer, pou sekiriz sa bann batiman. Nou pou fer renovasyon lo sa batiman. E mon vizyon se pou fer sir ki sa sant kominoter i vin en landrwa vibran, vivan. Kot Lendi ziske Sanmdi pou annan kek keksoz ki pou ganny fer pou zot epanouisman.

E ler nou pe koz sa *basketball court* avek sa laplenn, mon vizyon se itiliz sa R760mil, ki pe ganny donner dan sa Bidze ver sa laplenn. E si fodre mon lyez ek sekter prive, mon ava fer li. Akoz mon konnen atraver *Business Tax Act, Schedule 5* ou pou kapab apros bann biznesmenn pou ou kapab ganny bann donasyon.

Mon pa konnen akoz zot pe zis al lo CSR-CSR. Silvouple tyek sa Lalwa, *ok?* E an totalite i enportan pou mwan pran mon fristrasyon met akote e dir sa; i enportan ki nou realize ki nou tou koman bann dirizan, nou

annan en gran responsabilite ver nou pei.

Espesyalman la i pe pas dan en letan san presedan. I enportan ki nou met nou diferans akote. E koman en zenn, mon pa konnen, ki bann veteran dan politik i annan pou dir. Ouswa bann Manm ki'n deservi plis ki en manda.

Be selman mon vwar sa en pe drol. Tou le bomaten, nou debout, nou sant nou Lim Nasyonal. E dan nou Lim Nasyonal i vremen promouvwar sa lespri linite. Me apre sa ki nou fer? Nou fer lekotr. E an plis ki sa an deor travay, mon vwar en lot kalite latitid.

Be sa i apel lipokrizi. Pou sa bann siporter *US* la, i enportan ki zot realize, ki annan lezot Onorab, lot kote latab nou koz byen. Nou tret nou parey frer ek ser, dan sa bann lenstans kot nou pa pe ensilte kanmarad an deor. Kot nou pa pe al lo rezo sosyal pou denigre personn.

Nou pa pe touy nou lekor. Be zot koman sa bann siporter, be ki pou rezon ou a pe ensilte ou prosen? Respe i en keksoz ki vremen enportan. E i enportan pou zot realize ki serten politisyen la, zot bann pli gran ipokrit! *I'm sorry Mr Speaker, but this is the fact of the situation.*

E fodre ki mon fer sa resorti, akoz pou sa bann siporter ki swiv tou sa ki zot dir e zot met li an pratik. I pa pou anmenn nou okenn par Mr Speaker. Dan sa Bidze, mon vwar en Bidze ki pou donn nou pei ek nou pep lespwar. Lo lot kote latab zot dir bann zenn pa pe ganny ankadre dan sa Bidze.

Be tou bann - parey in ganny fer resorti, tou bann lenfrastriktir sportif be lekel ki pou itiliz sa? Nou annan *National Library* osi. I annan en sonm ki'n ganny bidzete pou sa. Be eski sa nou pa pe koz anver nou bann zenn? *SNYC* i enn bann *heads* ki pou pase pli tar.

Minis pou Lazenés ek Spor, be li osi i pou pase, be ki bor eski zot ape rode, ki bor zenn i ete. Parey zot ape rode ki bor koripsyon, ki mannyer eski nou pou adrese? Be i annan en Bidze pou *ACCS*.

E mwan le pran sa moman avan ki mon terminen, pou dir ki mon'n vremen enpresyonnen lo lafason ki travay pe ganny fer par nou bann Lapolis. Mwan mon'n enn bann pli gran kritik anver nou Lapolis, poudir ki zot pa pe fer byen.

Me kot zot pe fer byen fodre ki mon rekonnèt sa. I annan lespas pou zot kapab amelyor zot performans. Me selman lafason ki zot a pe

detekte krim, wi i en konsern pou konn tou sa ki pe arive. Espesyalman ler nou pe sey konsantr pou anmenn plis touris. I pa byen ditou.

Me selman mon apresye sa travay ki zot a pe anmennen. E mon osi vreman apresye lo lafason ki zot a pe konport zot dan sa bann sityasyon kot zot a pe trouv drog. I enportan ki zot pa les zot ganny koronpi. Dan lepase nou'n tann mannyer i annan serten zofisy ki'n les zot ganny koronpi.

E se sa ki'n les drog ariv kot in arive dan nou sosyete. E en keksoz ki mon kapab dir, ki mon'n bliye pou fer resorti espesyalman zabitan ki pe reste dan Belonie kot pou 4an, in annan en *file* ki'n asize. Nou pran sa *file*, nou regarde. Zot dir en msye pa le donn later alors nou pa pou kapab fer sa semen.

Be ler nou koz ek sa msye, zot donn li de bout later dan en vale, dan en montanny, be i napa akse avek semen, be byensir i pa pou oule donn son later.

Be ou konnen kwa? Zis lo lot kote semen, ti annan en bout later apepre 2mil met kare, ki pou Leta, be ou pe dir mwan ou pa ti kapab fer sa? Be, mon swe se ki ler sityasyon ekonomik pou permet nou i enportan ki sa semen i ganny

fer. Akoz i pou enpakte lavi 43 fanmir.

E mon pou al lo Semen Kato osi. Sa semen, sote 30an dimoun pe demande. E Mr Speaker, mon pou bezwen mansyon non. I dan bann korespondans, i annan non ansyen Vis-Prezidan, Mr Vincent Meriton. Onorab Simon Gill. Dan sa bann korespondans i parey en *pingpong match*.

Finalman zot a pe zis bat latet dimoun. E ozordi kwa ki nou'n kapab fer? Atraver *SLTA*, pou la premyer fwa en *survey* in ganny fer, en rezidan in vin devan pou dir i pare pou donn en *turning point*. Tousala se progre ki'n ganny fer Mr Speaker.

E mon oule zis fer ankor en lapel, avek zot dan Lopoziyon. So silvouple pa fer politik avek lanmor dimoun! Silvouple aret fer dimoun krwar konmkwa, nou pe mor, i annan dimoun pe mor avek *famine*.

Lo kote *Red Cross* sa madanm ti'n vin devan poudir napa okenn laliny. Aret kree en lenpresyon konmsi keksoz i mal. Vin devan avek bann solisyon. Ed nou amenn sa pei devan.

Aret sey diviz sa pep. Aret asiz par deryer *fake profile* pou dir tou sord kalite mansonz lo

ou prop ser ek frer ki pe travay ansanm avek ou! Se tou ki mon annan poudir Mr Speaker. Mersi.

### **MR SPEAKER**

Mersi Onorab. Onorab Johan Loze.

### **HON JOHAN LOZE**

Mersi Mr Speaker. Apre 20an ki distrik Saint Louis in vot *SNP*, prezan *LDS*, mon kontan pou vwar ki zot fyer ki zot pe fer bazar. E ki nou'n kit 9 *housing estate* avek zot ki paret mwan zot tre mekontan.

Be mon ti ava konsey ou petet aret rode aköz ki nou, nou dan Lopoziyon. E konmans *be a little bit mindful*, lafason ki ou, ou pe al retourn dan Lopoziyon. Mersi Mr Speaker.

Mr Speaker *de le* debi, annou komans par sitye nou lekor dan realite. Parti *SNP* ki reprezante ozordi devan nou koman *LDS*, in vot an faver Bidze zis en sel fwa dan zot listwar.

E kontrerman avek sa ki pe ganny dir, zot pa ti vot an sipor pei. Zot pa ti vot an sipor lekonomi. Zot pa ti - e zot sertennman pa ti vot an sipor reform. *SNP* ti vot an sipor zot prop logmantasyon saler - en logmantasyon saler ki ti'n ganny negosye par zot dirizan,

ki ozordi i Prezidan Ramkalawan.

Sa menm *SNP* e son dirizan, ti pli tar sorti e demann Prezidan Michel pou *resign*, e pou fer nouvo eleksyon. Aköz i pa ti'n dir dimoun ki i ti pou annan reform *IMF*. Sete sa zot sipor pou reform.

Parey bokou keksoz avek nou Gouvernman ozordi, sa zistwar ki zot ti siport reform *IMF* i zis sa - en zistwar. E i annan bokou zistwar ki sa Gouvernman in rakont nou pandan sa bann dernyen mwan.

Gouvernman in senm en klima mansonz e fo lenformasyon kot si ou annan ou rezon, zot kapab konvenk dimoun ki ou annan tor. Zis parey sa trwa manrmay anba pye mang Saint Louis ki ti ganny perskite san rezon. Kot mansonz in ganny rakonte lo zot. Me erezman, *Palais de Justice* in reisi pou fer lazistis lo zot sor. Sansan, fouti!

Lannen 2020 lemonn ti vin lo en *standstill*, gras a lepidemi *COVID-19*. Pandan letan ki Gouvernman Sesel ti pe komans aprann navige fas avek sa dezaz global ki ti ankor tre nouvo. Lopoziyon *LDS* pa ti pe donn ladministrasyon Prezidan Faure okenn sans pou konpran e zer sa problem.

Zot ti pe finyole pour nou *lockdown* pei. Sa letan fer konferans lapres pou politisyen eksprim zot lopinyon, ti *ok*. Me ti ariv en moman kot lemond li menm ti'n *lockdown*, e Sesel ti osi *lockdown* ansanm avek larestan lemond.

Sa ti en sikonstans COVID-19. E non pa en kreasyon *United Seychelles*. Se a sa moman ki *FA4JR*, *SETS*, e sa fame *URS*, ti antre dan zwe pour ede anpar e prezerv nou pep. Me pli enportan ankor pour anpar e prezerv nou bann biznes ki moter ekonomik pei.

*URS* ki ti deza an egzistans, ti ganny servi koman en zouti dirzans pou absorb en gran mazorite nou bann travayer lotel ki ti pe ganny fer *redundant*. E serten nou bann *returning graduates*, ki par mal sans ti pe retourn lo marse lanplwa, dan en moman *economic shutdown*.

Sa gran logmantasyon lo *URS* ver lafen 2020, ti napa nanryen pou fer avek eleksyon. Me plito avek realite ekonomik e marse lanplwa tar an 2020. Mon'n fer sa pti analiz lo 2020, senpleman aköz i annan en pwen tre senp ki nou lo nou kote nou pe fer. Sa sikse ekonomik ki'n vin avek reouvertir *l'aéroport*, in selman posibil gras a sa bann mezir ki

ladministrasyon Gouvernman Prezidan Faure ti pran an 2020.

Aksyon ladministrasyon Prezidan Faure, in permet nou bann travayer pou viv en lavi relativman eze e an pe diran dezase ekonomik pli difisil ki nou pei in zanmen fer fas avek. E in egalman permet nou bann biznes pour reste a laflot e vyab, fas avek gro faid ki ti pe menas pour poz lanmen lo zot tou.

E se sa menm lafors travayer, e sa bann menm biznes ki Polisi Gouvernman *US* in ede preserve, ki pe akseler sa moter ekonomik Sesel depi reouvertir *l'aéroport*.

Reouvertir *l'aéroport* lo li tousel, san en lafors travayer sen, e an bonn sante, san bann biznes vyab, enerzetik e vibran, pa ti pou zanmen vin sa sikse ki nou koman en Nasyon, nou ti a swete i vini.

Alors, *credit, where credit is due* Mr Speaker. Lot *reality check* ki nou bezwen ozordi diran sa deba lo Bidze, se ki lekonomi Sesel anba sikonstans normal, i enn ki ekstrememan performan.

I mars sitan byen ki an lannen 2019, nou ti'n fini vwar ki nou performans an 2020 ti pou enn ki ti pou etabli bann rikord dan mazorite bann lendeks ki servi pou mezir nou bann performans ekonomik.



Sikse ekonomik Sesel dan sa bann prosen lannen avenir i prensidir otomatik. *It is a given, comme* dir Angle. Akoz sa baz pour sikse i deza la. En travay kontinyel ki'n ganny fer, pour batir sa lekonomi Sesel modern depi 2008 ziska ozordi.

E la mon pou demann zot en leskiz pour sa ki mon pe al dir. Me Minis Hassan avek son Bidze pa pe vin met okenn de fondasyon. Fondasyon ekonomik Sesel i deza an plas. E se en fondasyon solid ki nou'n batir.

Sa ki zot, zot pe sey fer ozordi, se parey zot labitid, koup riban, e pran tou kredi pour tou bon travay zot prosen, apre blanm li pour tou sa ki pe mars mal. Dan sa 2-3an, letan larzan ava komans ronfle dan labank, la ankor i pou gras a Prezidan Ramkalawan, e Minis Hassan, ki fek envant lekonomi Sesel yer bomaten menm.

E depi Mars 2021, zot in *singlehandedly* kree tou sa biznes ki annan Sesel ki pe ede pou kree larises. Zot in egalman kree sa bon repitasyon enternasyonal, ki Sesel i annan dan konservasyon lanvironnman, e koman en *premium holiday destination*.

Mon vreman rode keler zot ganny letan pou dormi sa de dimoun, vi ki zot pe fer sitan

kantite mirak, e mervay, viv nou sover ekonomik avek son *sidekick* par ekselans.

Mr Speaker, Sesel i annan li en lekonomi ki pe fer vreman byen. Akoz i ti ganny tre byen zere. E en lafors travayer ki vreman prodiktiv e efikas. E avek en retour a normalite, lekonomi pou retourn lo sa nivo performans ekselan kot i ti ete an 2019. E kontinyen amelyore, dan en fason natirel parey in fer depi 2009.

Depi premye Bidze ki sa Gouvernman in prezante, zot in komans met an plas, bann mezir, ki annan lentansyon pour soulaz bann biznes. E kree lespas pour zot kontinyen grandi e devlope. E ankor dan sa enn Bidze, nou vwar serten mezir ki pou permet biznes pou respire, e rekipere dan en fason ki zot ava kapab pli byen kontribye.

Nou pei pa pou kapab fer en *push* ver *economic recovery*, san bann biznes ki sa moter ekonomik pei. Ki eksplik bann mezir ki vize pour stimil biznes. E egalman, ou pa kapab *push towards economic recovery*, san en lafors travayer ki san poursan motive.

Ou pa kapab pe elev biznes e *businessmen* dan pei avek *economic stimuli*. Me selman a la menm enstan, ou

pe profite pou klak ou lafors travayer plen dan figir.

Ou pa kapab donn enn, lesyel avek later, selman lot ou aras li son trezyenm mwan. Ou *freeze* tou nouvo peyman *long service allowances*. E pou bann ki lo kontra, pou napa okenn *performance allowances*.

E konmsi sa pa ti ase, ou pran desizyon pour ogmant laz pansyon fer li vin 65an, san okenn konsiltasyon. Aprezan, zot oule annan lodas pou blanm zot desizyon lo lanons ki Prezidan Faure ti fer dan SONA 2017.

Prezidan Faure ti fer en lanons, e i ti met en propozisyon devan Lepep Seselwa. Zot, zot in fer en desizyon inilateral, san okenn form konsiltasyon avek travayer Seselwa. Konmsi li son lopinyon pa konte dan okenn fason kot i konsern son pansyon.

Ozordi LDS i nepli krwar dan legzistans lapovrete. Zot nepli rekonnet legzistans problem imen. Zot in nepli annan en zorey pour ekout soufrans zot bann frer avek ser Seselwa.

Tou problem ki egziste, ou ti deza egziste dan sa pei in deza fini ganny rezourd par sa baton mazik ekonomik ki zot dirizan pe aplike. Me si ou bous ou zorey, letan ki ou tann ou

frer pe kriye, sa pa vedir ki ou frer pa pe kriye.

I pa vedir ki ou frer i byen, i selman oule dir ki ou, koman en zonn dan lopilans, ou'n fini oubliy ou nesans. E dan zot ka LDS, zot nesans in fini ganny efase net, dan zot prop lespri. Ozordi zot pe vwar zis lopilans avek palto.

Partou kot ou pase dan Sesel ozordi ou zwenn fanmir dan difikilte, fanmir ki napa okenn rekour, e ki pa konnen ki pou fer, e kote pou vire pou ganny en lasistans.

*Welfare* Sesel anba direksyon zot milyonner, ki pa'n zanmen konnen ki savedir lamizer. In vin zis en bann zoli sif lo papye, zis en bann zoli statistik, zis parey zot bann statistik lanplwa.

ASP, in vin en zouti ki zis fer dimoun soufer. Zot en nespes tourbiyon ki la pou fer dimoun tourn an ron. Sa zafer *welfare, who feels it knows it* Mr Speaker. Me sa ki pe pas atraver ki pe rakonte ki mannyer ki sa prose in vin zis en nespes martir koumsanmenm.

Kot sa ki pli malere pe ganny arase son dinyite zis pour en pti morso lasarite. Zis konmsi in vin en pese pour en dimoun napa, dan sa klima

napa, ki nou pep pe viv ladan ozordi.

Zot Gouvernman pe demantibil tou sa ki annan pou fer avek asiste sa ki pli dan bezwen. Zot vreman fyer, e vantar zot Bidze R10bilyon. Me dan R10bilyon, zot pe fer zis 37 nouvo lakaz, e klerman sa pa en probleman pou zot. Akoz malere ki pe esper lakaz avek Gouvernman. Sa bann menm malere ki zot in anvoy kot *Red Cross*, e ki Legliz Katolik dan son bonte in bezwen antre pou donn goute.

Klerman sa pa en fatig, ni en konsern pou zot. Akoz an 2023 zot pe al larg dilo, e dapre zot Seselwa pour konpletman oubliye ki *LDS* ti'n abandon zot, dan zot moman bezwen.

E Seselwa pou vire e anbras zot ankor koman bann sover zis akoz sa pti larzan ki pe vin *too little, too late*. La mon avar rapel zot ki diran kriz ekonomik 2009, ladministrasyon Prezidan Michel ti reisi negosye en don \$30milyon avek *Abu Dhabi* pou fer lakaz.

Nou Gouvernman pa ti fer zis 37 lakaz avek en Lopital La Digue. Menm dan difikilte nou dimoun ti reste priyorite. Zot probleman zot, se ki dimoun pa en priyorite pou zot, sirtou pa dimoun ki pli dan bezwen. Zot

in sekwe pye, e zis palto ki'n tonbe, en bann palto tord, byen mal fagote, lanmans pli long ki lot!

Zot pe zis fer nou R18mil riy nou, avek sa zantiyes palto ki pa ni menm ale avek zot! Zot in abandon sa pep dan son moman bezwen, zis pou al aranz zot lekor dan fason pli ridikil posib.

Mr Speaker, mon tann bokou protestasyon Lopoziyon ki nou'n pran lo lazenes. Minis in prezant nou avek en Bidze ki'n konpletman oubliy lazenes. E la mon repete wi zot in oubliy lazenes.

Sa Gouvernman in sitan oubliy zot, ki ni en mansyon zot pa'n merite gannyan dan sa premye Bidze ki'n ganny prezante par *LDS*.

Kestyon ki bokou zenn pe demande ozordi se, eski sa Gouvernman i konpran potansyel ki ganny reprezante par nou zenn? E si zot pa pe konpran, ki mannyer eski sa Gouvernman pour reisi realiz sa potansyel enkrwayab, ki annan dan nou zenes?

Sa menm Gouvernman ki fek elimin le sel striktir gouvnanans, kot reprezantasyon zenn ti ganny determinen par bann zenn zot menm.

Nou bezwen enkli zenn a tou pri dan gouvrenans pei. Nou bezwen met en plas, an plas mekanizm apwopriye pou enkli zenn dan prosesis fer desizyon. Eski sa Gouvrenman i poudir i konpran poudir ki lesel lespwar pour sa pei se nou lazenes? Se selman dan zot ki sa pei li menm pou finalman reisi realiz tou son promes.

Analiz bann problemn spesifik ki pe ganny rankontre par zenn lo tou nivo, e aplik bann solisyon sible pour aport solisyon, i en fason pour redwir en kantite presyon lo lasosyete an zeneral.

Tre resaman mon'n dir, ki nou pas tro bokou nou letan pe fer konversasyon lo nou bann zenn ki'n tonbe. E ki nou pa angaz nou ase avek bann zenn ki pe *struggle* dan letid, ki pe *struggle* avek lanplwa, ki pe *struggle* dan lantreprenarya, e ki pe *struggle* lo nivo fanmir, ki pe *struggle* avek lozman.

I annan bokou nou zenn, ki malgre zot bezwen en led, zot reisi pou reste a laflot, e zot pa pe tonm dan lenfliyans. I annan bokou nou zenn ki pe *shine* e fer sikse, me personn pa pe rekonnet sa *struggle* ki zot in pas atraver pour ariv kot zot ete.

Annou rekonnet ki nou zenn i bezwen en koud pous.

Zot bezwen rekonesans e lankourazman sorti dan tou lenstans sosyete. Aranze Minis, annou balanse silvouple. Lazenes se nou fitir e nou lespwar. Annou komans azir *comme* tel.

Mr Speaker i annan sa size *GICC* ki'n leve e i pe sisit bokou komanter. E ki mwan osi mon krwar mon pou bezwen dir de mo lo la. Mon oule fer tre kler, ki nou pa pe kestyonn ni *IDC*, ni *GICC*. Me nou *issue* i avek lafason fer e nivo lipokrizi sa nouvo Gouvrenman.

Mon rapel lepok ki Onorab Larue ti pe koz lo sa size *GICC* avek tou son bann '*Green*' piti. Sa i parol Onorab Larue, pa pou mwan!

E pwen kontansyon sa letan, sete ki Gouvrenman pa kapab ale e negosye direktman avek *GICC*. E zot ti osi ensiste, ki *GICC* pe fer milyon atraver bann laranzman avek Gouvrenman.

Me la ozordi ki'n arive, ki nou vwar nouvo Gouvrenman pe antre dan bann menm kalite laranzman ankor avek *GICC*? Sa Gouvrenman ti promet ki avek zot, tou keksoz ti pou *above Board*.

E ti pou ganny fer dan latransparans. E dan plas latransparans, nou vwar Minis vin devan nou avek en fe

akonpli, kot ankor zis parey ansyen Gouvernman, nouvo Gouvernman in antre dan en negosyasyon direk avek *GICC*.

Akoz ki en '*expression of interest*' pa'n ganny lanse, kot *GICC* ti'n kapab *compete* lo en laplenn nivo avek son bann lezot konpetiter dan sa *field*? Sa ti pou'n pli meyer pour tou bann parti konsernen, ki enkli son *GICC* li menm, ki ozordi i trouv son lekor ankor o milye en lot *polemic*.

E pa krwar ki se nou koman Lopozisyon ki pe lev sa bann konsern, senpleman aköz ki nou anvi. Me la deor i annan bokou dimoun ki pe swiv bann deroulman. E sa i enkli bann siporter *LDS* ki pe kestyonn en kantite bann nouvo fason fer Gouvernman, ki pa anliny avek son bann promes ki zot ti vot lo la.

Mr Speaker mon oule rebran en tenm ki *Leader* Lopozisyon ti leve dan son repons;

"Sa Bidze i plen avek lenkonsistans e kontradiksyon. *Tax* pour Sekter Lapes pou aplik en fason, me pou Sekter Lagrikiltir pou aplik en lot fason.

Mezir *tax* tanporer, lo lenportasyon veikil i ganny tire. Me de lot kote nou ankor pe dekouraz konsonmasyon, e nou

pa pe donn okenn *loan* pou konsonmasyon. E veikil li i enn bann pli gro *item* konsonmasyon.

Nou annan en Bidze ki swadizan 10bilyon. Me dan 10bilyon nou pa kapab trouv 147milyon, pou nou pey 13enm mwan saler. Bidze i 10bilyon, me avek 10bilyon nou kapab fer selman 37 lakaz. Avek 10bilyon, nou pa kapab pey ni *long service*, ni donn logmantasyon, e ni pey *performance allowance*."

Minis, zenerasyon Mer Koulev in fini lontan Sesel. I nepli egziste sa kalite nivo bet ki pou anval tou sa bann kalite sotiz. I annan en bon rezon aköz zot in kasyet nou tou bann kondisyon zot bann negosyasyon avek *IMF*.

Malgre ki zot in ganny en ta pake larzan, me zot in fel dan negosyasyon. Zot in fel Sesel e Seselwa. Letan ki ou al negosye koman en amater parmi profesyonnel, ou vin avek en Bidze ki plen avek vid, e sa i antyerman lo *ou* Minis!

Mr Speaker ozordi napa ki pa pe ganny dir lo nou koman en Lopozisyon. Lamazorite zot laba, lot kote, pe fer li zot devwar pou donn nou leson. E nou'n menm ganny dir ki se zot ki konn pli byen ki savedir Lopozisyon aköz zot in fer 30

an. Me sa ki zot pe oubliye, se ki napa person ki konn zot pli byen ki nou.

Mon pou servi en legzanp, zis en sel legzanp pour ilistre zot koman en Lopozisyon. Ozordi nou vwar zot dan Gouvernman ki pe eksplik sa R1.4bilyon *welfare*. E mon pou felisit zot, akoz ki zot pe fer li tre byen. E zot pe menm lager pou fer konpran ki tou i ankor parey, e ki nanryen pa'n sanze.

Me eski zot rapel kwa ki zot ti fer koman en Lopozisyon sa bann dernyen lannen? Eski zot rapel pe servi sa menm 1.4bilyon, ki zot pe defann ozordi pour anbet e manipil dimoun?

Eski i annan okenn dimoun ki'n vot pou zot, ki rapel zot pe kriy ki ozordi pli gran konponan Bidze se *welfare*, e ki *US* pe kit dimoun depan lo *welfare* avek R1.4milyon? E la ozordi se zot menm zot ki bezwen pas sa R1.4milyon.

Mr Speaker ozordi sa Bidze i ankor egzakteman parey. Mon servi sa legzanp, senpleman pour ilistre ki kantite visye, e destriktif ki zot *LDS* ti visye e destriktif koman en Lopozisyon.

La ozordi ki zot dan Gouvernman, zot pe bezwen anval sa bann menm koulev ki

zot in semen par lake. E le sel rezon ki zot pe sey balans *shade* lo nou, koman en Lopozisyon. Se akoz ki zot pa ti'n ekspekte pou ganny opoze.

Zot pa ti ekspekte '*nou*' pou debout avek zot, e pou *call* zot *out*, a sak fwa ki zot deregle. Zot pa ti ekspekte '*nou*' pou fer nou travay koman en Lopozisyon.

Ler ki zot ti'n abiy zot lekor dan *allowance* palto mal fagote, zot pa ti'n ekspekte ditou, ki zot sekre ti pou ganny devwale deswit, dan gran kler, pour lepep antye konnen. E pou menm bann *MNA LDS* konnen, akoz zot pa ti konnen.

Ozordi i annan en kantite dimoun ki pe reisir gard zot lanplwa, senpleman akoz zot konnen, zot *LDS* zot konnen ki nou pou fer en ta tapaz si zot bouz tro vit, e tro brit pou met zot bann plan an aksyon.

Menm parey pou *welfare*, e serten lezot benefis sosyal, ki zot konnen si zot al an tro, nou pou kriy lasasen. E tou dimoun pou konnen kwa ki zot pe fer. Zot forse donn dimoun, menm en pe benefis malgre zot pa anvi.

Nou la pou *provide checks and balance* Mr Speaker. E nou deza pe fer li, e nou pe fer li tre byen. Toudmenm en keksoz ki mwan mon pa konpran avek

zot, depi kan eski *LDS* in vin sansib koumsa? Depi kan eski en senp pti keksoz i fer zot kriy ‘napa linite’, ‘i annan diskord’, e ‘i annan dezord?’

Zot sa parti ki ti *harass* Prezidan Michel “*J Pwason*”, e “*Planter Pwason*.”

Zot ti *harass* Prezidan Faure e apel li “*Danny Baton*.” Ozordi zot zis tann sa mo “*boufon*” e zot sot anler e zot oule mor! Sa zafer ‘*boufon*’ i apel pa dir sa.

Be la kwa ki’n sanze? Kwa ki’n sanze dan zot fason ozordi? Mon kit sa lanmenm trankilman. Mon pa pou al plis ladan.

La ozordi zot oule fer bel lapres, e lans gran, gran lapel pou linite. Me zot sel legzanp linite ki zot kapab vin avek se en mansonz, en lalang! Zot menm zot pa’n kapab trouv en legzanp linite konkret, apard sa swadizan vot pou Bidze, kot zot ti vot pou zot prop lapey.

E le sel legzanp ki mwan mon’n kapab trouve, pou elabor sa linite ki zot, zot pe sey dir zot ti annan, ti sa *joint* Mosyon kont piratri, table par Onorab Potter e Onorab Ramkalawan.

Me selman imedyatman apre ti annan bann *recordings* ki ti sorti kot zot bann dirizan ti pe negosye direktman avek pirat, par deryer ledò Lotorite. E

en pe letan pli tar, zot ti pibliy plan Baz *Coast Guard* dan Regar, dan plen milye en konba kot *Coast Guard* ti pe lager kont pirat. Sa i zot linite - met a risk nou bann Zofisye *Coast Guard*.

Mr Speaker, *LDS* zot pa en legzanp zot. E zot napa okenn leson pou donner dan fason pou fer travay Lopozisyon. Zot in toultan en Lopozisyon visye, e destriktif, e i paret ki sa bann mers i ankor avek zot.

Me toudmenm, la mon oule fer zot rapel, ki nou travay tre byen avek zot kan fodre. A sak fwa ki en Lalwa i vini pou ede tir Sesel lo Lalis Nwanr Linyon Eropeen, kot *LDS* in ede met nou. Nou premye pou kontribye, pou ede, e pou travay etrwatman avek zot, pou fer pase sa Lalwa.

Tou Konvansyon ki pou benefisye Sesel nou debout la akote zot. Tou Lalwa lo Drwa Zanfan, ouswa lo Proteksyon Zanfan, egalman, san kestyon nou la pou siport zot, nou la pou siport zot Gouvernman pou aport sa ki meyer pou Sesel.

Kot nou santi ki zot pe fer byen, e ki zot pe aport dibyen pour sa pep, nou pou toultan la akote zot. Me malerezman, sa i pa leka ozordi. Me mon konsey tou dimoun pou swiv deliberasyon Lasanble Lendi. E

zot a trouve kwa ki mon pe koz lo la.

Mr Speaker, an konklizyon, mon oule dir avek Gouvernman, pou silvouple fer pli byen. Travay for pou aport dibyen avek byennet pour sa pep kin ganny konfye dan zot lanmen.

Zot in ganny eleksyon wi. Sa nou dakor e nou rekonnet, me kwa ki zot fer pour sa pep? Ki mannyer eski zot pou tradwir zot gran viktwar elektoral dan en laviktwar pour sa pep, e non-pa zis pou zot?

Zot pa pour kapab kontinyen vin dir keksoz parey pe fer plan, pe travay lo Polisi. Me selman zot pa donn en gidans kler lo ki fason ki zot pour atenn zot bi.

Lannen 2020, letan partou ti'n sonm, e lemonn ti'n vin menasan, e nou bann MNAs nou ti'n al kasyet COVID se nou, se travayer Seselwa ki'n leve, e desann toulezour pou fer marse sa pei.

Travayer Seselwa ki swa son doker, koman son pilot, son SPTC ki ti kontinyelman marse toulezour, Lapolis, Larme, bann ki ti pe travay dan lotelri, e Minister Lasante.

Eski zot realize ki Minister Lasante ti'n fer sorti en moratwar an 2020, ki ti defann son *staff* pran konze, e ladan pa

tou son *staff* ki ti menm *entitled* pou ganny *allowance* COVID. Menm si zot tou ti pe pran risk pou desann ansanm e vin travay.

Eski nou pe konsidere, ki presyon ek stres ki nou bann *teachers* i anba la pour adapte avek sa nouvo realite COVID? Nou bann *teacher's* pa bann profesyonnel lasante zot. Me zot pe bezwen *manage* zanfani ki pe ganny bann pti mo, bann pti mo ki normalman zanfani i gannyen, me pa COVID.

E an menm lenstan zot bezwen *manage* leson en lot group zanfani ki pe fer en semenn kot lakour.

Nou bann pilot e *ground crew*, ki ti asir en servis kargo esansyel ant Sesel e larestan lemonn diran bann moman pli difisil. Nou bann peser, e propriyeter bato in asire ki Seselwa i kontinyen ganny en bouyon, a en pri abordab menm diran moman difisil.

Nou bann *pharmacist* Seselwa, ki'n la akote nou, e osi pa oubliy travayer *PUC*, *Cable*, *Intelvision* e *Airtel*.

Lafors travayer Seselwa in ganny teste. Zot in ganny teste avek dife, zot in sorti *victorieux*. Se zot nou bann vre ero, e se pour zot ki nou bezwen sant leloz, pres benediksyon, e senm bon parol. Akoz se zot ki'n fer



tou byen, non pa nou, ni Gouvernman.

Pou dir fransman, mon vremen dezapwente avek sa Bidze. Akoz i tro dan faver bann byennere. Sa Bidze in vin en desepsyon total pour nou lafors travayer e pour tou bann ki pe rente, tou bann ki'n eskente, pour relev sa pei. E lo sa baz, mon pa santi ki mon pou kapab donn ou Bidze sipor Minis.

Dan sa Bidze plen avek vid ou'n anmennen napa nanryen pour nou travayer, apard en promes politik pou zot aste eleksyon *wholesale* an montan 2023, avek en gro larg dilo logmantasyon saler.

Mon sipliye, ki ou balanse Minis, rod en fason, sers en larzan kekpar, sey fer en reazisteman, e rod en fason pour aranz nou bann travayer Seselwa.

Mon pa oule termin lo en not politik Mr Speaker. Mon pa oule termin lo en size kontansyon. Alors mon pou termin lo sa pwen ki nou tou nou kapab agree lo la.

Travayer Seselwa i presye, pour nou tou isi anndan, e presye pour sa pei ki apel Sesel, in ler pou sa Bidze komans reflekte sa.

Baze lo sa Minis, Seselwa pour annan bokou desizyon pou fer an 2025. E pa

souzezim lafors desizyon sa pep Minis. Mon pa pou dir nanryen plis lo sa size. Mersi Mr Speaker.

**(APPLAUSE)**

**MR SPEAKER**

Mersi Onorab. Mon krwar nou ava aret la pou ozordi. E nou a kontinyen demen. Mon ava apel zot pou rezwenn demen bomaten 9er. E bonn sware zot tou. Nou a *adjourn*.

**(ADJOURNMENT)**